



# DAAROL ALADIIN

Banndiraabe, janngoobe, teddube –

Widtooji kollii wonde demngal Pulaar ina aldi ina yaaji. Doo noon amin njidi hollude on won ko on ngoowaani yiide, hono oo doo - **j**

Kala dooji don hono ngal alkulal j paamon ko alkulal ñ **j = ñ**

<b>j</b> amri	=	ñamri	<b>J</b> nale	=	Ñale
<b>j</b> ebbe	=	ñebbe	<b>J</b> een <b>j</b> o	=	Ñeeñ <b>j</b> o
a <b>j</b> de	=	añde	<b>J</b> a <b>j</b> nude	=	Ñaññude

Meedi wadde e nder laamorgo e ngootiri e leydeele Siin, leydi ngootiri ngaldundi no feewi, njaajndi, kono ko en muumbe innde mayri. E nder ngoon laamorgo, gorko gooto bi'eteedo Mustafaa ina hodnoo e maggo, ko o ñootoowo o wonnoo. O alaano meccal so wonaa ñootol. Ko o baasdo o wonnoo haa diwti e gollal ngal Alla feccani mbo ngal, alaa ko o waawi faggaade heen, walla o yeñcina haa o wuurna heen, joom suudu makko e bidngel maɓɓe ngel Alla yedi hakkunde makko e joom suudu oo.

Ɓidɗo o wi'etee ko Aladiin. Nde tawnoo baasal ngal sabbinii e maɓɓe haa diwti, addani jinnaabe bee welsindaade nehdi cukalel ngel, hono Aladiin. Aladiin faggiima jikkuuji ooñiidi; o woni suka bonɗo nehdi, ñaaddo, canndolindo, gaayido, calaniido yumma e baaba fof.

Nde yahnoo haa o fuddii yaafaaɗe (mawnude), jinnaabe ndonkiti marde (hanndaade) mo. Aladiin yahata ko e belaade mum, so o yalti galle pudal naange ko maa mutal nde o arta; sabu haaju makko e himme makko fof ko ñallude dogde e mbeddaaji, ina fijda e kuywe, ina weeta e nokku renndo ko wa'ino caaleeje jakkaa e ko wa'i noon. Ina ɓuri teskeede, Aladiin ɓuri waawde tawdeede ko e miñiraakoñ mum; ko been o ñallata foldude e diin nokkuuji.

Nde yahnoo haa Aladiin yonti janngude meccal, baaba oo foodi mo, takki mo sara mum mbele janngina mo ñootol. Baaba o jannginirta mo ñootol ko alaa e sago, sabu Aladiin no wa'i aayaade nii, alaa baawdo jannginde dum meccal godngal. Ndeen dum wadi, baaba fuunti, mooyti, hulɓini, kono dum fof dee alaa ko nafi, sabu addanaani Aladiin huccude e golle no o yidiri nih.

Mustafaa hono baaba oo, kala nde fali daande, Aladiin mos-mosta dogaa saloo artude oon ñalawma fof. Nde juude Aladiin naati e juude baaba oo fof, baaba oo fiya haa nguru ummo, leepta mo leepte caɗtude. Duum fof e wa'de noon Aladiin tutolini, o buccotaako.

Doon rewi haa Mustafaa dacciti mo haa laabi, woppidi mo e sago makko; heddodii e kuɓɓam bernde. Aladiin aayii ma, kuɓɓam bernde rewii baaba woppaani, suno ina beydii yaha daccaani, lebbi seeda fawtii heen Mustafaa hawri e lajal.

Mustafaa maayii, heddiima Aladiin e yumma mum. Yummiraado oo, ndeen anndii Aladiin wonaa jogordo heptude gollorgal baabiraado ngal, o yetti feere yeeyde kabirde gollorde Mustafaa woppunoo dee, mbele o waawa faggitoraade ngalu. Nde tawnoo ko o mottoowo, ko nguun ngalu o heɓɓitirto motto, mbele seeda mo hebata heen o ina waawa wuurnude mo kanke e biyiiko, Aladiin.

Aladiin beydiima tayde boggi, sabu kulol baaba nattii wonde e mum, etee o denyaaki yumma oo hay seeda, o beydii ko sanndolinde. E ndiin mbaadi yumma oo ina moolanoo mo Alla, sabu hay heen sahaaji so yumma oo wonii e felde mo, omo wi'a omo darto dum. Aladiin beydii jartodinde haa yottii duubi sappo e joyi ina jokki fijjude e cukaloŋ, o hebaani hakkille ndaartude no o feewniri jango makko.

Wadi ŋalawma gooto e nder ŋaldi, gorko gooto kodo wirtii mo. Omo wondi e cukaloŋ ebe pija, hono no be keewi wadde; oon kodo gorko dartii woni e ndaarde mo.

Oon kodo gorko ko ŋenngotoodo moolanaado moolee. ŋenngotoodo oo wi'etee ko ŋenngotoodo baleejo, sabu iwdi makko ko Afrik, kadi ko o baleejo. O yottii e leydi hee tan ko e dee balde dɗi.

Hakkunde ŋenngotoodo oo e Aladiin ina metti faamde, gede dɗi ina heen:

- kanke ŋenngotoodo oo ina gasa tawa ko baawdo heɓtinde yiyaam e yimbe. Duum woni o faama e yeeso Aladiin denndaangal gede de o sokli tawa ina mbaawa gasnude faandaare dangal makko.
- walla noon tawa ko o bidtudo gede galle Aladiin'en haa o humpitii fof e nguurndam mum'en.

Ndeen o faamii ko suka oo yidi, o badii dum, o foodi Aladiin bannge, o seerndi dum e sehelaabe mum, be njoñii. Ndeen be njoñiima, o wi': "Bidingel am baaba maa, wonaa Mustafaa ñootoowo oo?"

Aladiin hebbitii wi': "Ko noon tigi baaba; kono o maayii."

Nde o jaabii ngol jaabawol tan, ñenngotoodo o hippii e makko, heddii ina simmitoo, ina haamtoo, ina farkinoo, hollude sunaare mum e oo kabaaru mo o nani e hunuko ngel cukalel.

Ndeen Aladiin yi' baabiraado ina woya dii bojji cadtudi, o wi': "Hol ko saabii ada woya?"

Baabiraado wi': "Hol no mbaasirat mi woyde? Ko mi baaba maa cawndiido; Mustafaa ko mawni am moy'yo, mo alaa nanndo . Dii duubi bennudi fof ko mi danninoodo. Jooni noon Alla artirii kam, mido wonndunoo e damaawu mawdo e yi'ondirde e mawni am, haa kabru daa mi oo kabaaru bondo, coloowo goddol. Mi haalan maa oo kabaaru woni felmannde muusnde e am, sabu mi yi'aani mawni am. Kono haa hannde mi nimsaani, sabu aan koɓɓite daa tan ko e baaba maa. Ko dum moomti gondi am, sabu mido waawi ndaartindaade mbaydi baaba maa e ndi maa ndii; ko mbaydi maa ndi nii wadi mi sikkitaaki tiindii mi e maa. O werlii junngo e bata, o wi': "Hol to yumma maa hodi?"

Doon e doon, Aladiin haalani mo.

Ñenngotoodo baleejo oo rokki mo kañnjara cewdo wi'mo: "Bidingel am yah to yumma maa, mbi'aa mo mido salmina mo, so mi dañii sahaa maa mi ar salminde mo, mbele mido buubnira gite am do mawni am hodnoo duubi e duubi haa balde mum ngasi doon."

Ndeen ñenngotoodo oo seertii e bidingel mum, ngel faggii e dumunna dabbo ngel, hono Aladiin; oon dogani neene mum ina wondi e weltaare, sabu kañnjara mo baaba mum cawndiido rokki dum oo.

Ndeen Aladiin yottiima , wi' : "Neenooy! Tiidno haalan am so mido jogii baabiraado goddo."

"Alaa bidingel am, a alaa baabiraado cawndiido to bannge baaba maa, a alaa kaawiraado ne to bannge am."

"lih miin noon mi yi'i jooni gorko biido ko baaba am cawndiido. Duum tan yonaani, sabu nde kabru moo mi sanjkaare baaba am tan, o hippii e

am omo woya, omo maɓɓoo e am. Finnde ko kaalan maa mi koo ko goonga ko oo kaalis mo gorko oo rokki mi. O nulii kam nii yoo mi yottin salminaango makko fa'de e maa; kadi so o dañii maa o ar gaay janngo ngam salminde ma e fawde yitere makko e hoɗorde baaba am wuurno haa maayi.

Yummiraado oo wi': "Goonga nii, baaba maa, ina joginoo miñiraado godɗo, kono oon maayii ko ɓooyi. Mi meedaani nande omo jogii godɗo. Be kaaltaani godɗum ko fayti e ñenngotoodo oo."

Janngo mum kadi ñenngotoodo oo tawi Aladiin ina fija e dingiral godngal, ina fijda e sukaaɓe wodɓe; o jaɓɓii Aladiin kadi hono no wadnoo hanjki nii. O woni e yeewtidde e mum. Caggal ɗuum hade maɓɓe seertude o itti buudi ɗiɗi kanje o wi' yoo Aladiin tottu ɗi neene makko hebla hiraande, sabu hannde jamma ko o garoowo hiirande ɓe mbele ebe kirtodoo. Ndeen o gasnii haalde, o wi' Aladiin yoo sifano mo galle mum'en. Aladiin sifanii mo, ɓe mbaynondiri. Aladiin nawani neene mum buudi kanje ɗii.

Nde yumma oo heɓi buudi kanje ɗii, yahi ndaartoyi kaɓirde defirde to hoɗɗiɓe maɓɓe, nde tawnoo hay ɗuum o alaano; o yahi, o ndaari cakkudi moyyiri.

Oon ñalawma kuurɗo ko ɗuum tan wonnoo haaju makko. Ndeen o feewnitii ma hawri e jamminii, tee o yi'aani kodo oo. O wi': "Aladiin! Jeewtidiigel am! Maa taw baaba maa annda galle oo? Yahkino mbele aɗa hawra e makko ngaddaa mo."

Aladiin e laaɓeede sifa mo rokki oo e laaɓde, ummaade ɗum fof haa woodi konkudɗo baafal. Aladiin fa'i e damal, udditi; tawi ko ñenngotoodo mo tijjinoo oo. Ndeen baafal udditaama, o naati, omo roondii butelaaji koñnjam, wonndude e kala leñol e ɓiɗɓe lekɗe, haa teddi. Caggal nde ñenngotoodo oo totti Aladiin ko o addunoo koo, o salmondiri e yummiraado oo haa sadi joofi. O wi' yoo oon hollu mo ɗo mawniiko Mustafaa woownoo joodaade ɗoo. Nde oon hollunoo mo nokku oo, tan, o fukkii, o sujji, o ɓuuccii nokku oo laabi keewɗi; heddi

gite ina ngaal-ngaalna gondi. Noon, o heddii omo wulla: “Feere am bonii, deedooy am! Ko miin dey booraa nde mi araani law haa mi hebbito maa ko adii nde maayataa!”

Yumma mum Aladiin wadi feere fof mbele o joodoo e jonnde joom galle mum ndee, ronki tan yoo o joodo e jonnde hee . Ñenngotoodo oo wi’ tan ko wadataa duum. Yoo o yaafo dum, sabu buranta dum tan ko huccitde e do mawni mum joodotonoo doo. Tawde Alla hadii dum dakame yi’de mawni mum, so ina yi’a jonnde ndee, maa wa’ no ko e yeeso mum o joodii .

Yumma mum Aladiin accidi mo e sago makko. Ndeen ñenngotoodo oo joodiima do yidnoo joodaade doo; o udditi yeewtere hakkunde makko e yumma mum Aladiin.

O wi’: “Banndi am debbo, hoto dum haawe, so tawii a yi’aani mi, gila ndesadaa e mawni am Mustafaa fa’de jooni. So mido siftora ko ummii mi doo fa’de hannde, wonii duubi capande nayi. Kono miin e mawni am kala ko e mayri min njeyaa. Gila caggal nde njillii mi, njah mi Enndo, njah mi Perse, njah mi leydeele Aarabeebe, kam e Siiri e Misira, caggal nde njillii mi gure burde yoodde e deen leydeele, njantiroy mi Afrik. Toon kadi mi booyii toon no feewi. Ko booyi booyi koo fof ina jeyaa e neesu innama aadee e siftorde to jeyanoo, siftora banndiraabe e yimbe be nehodii. Ko duum sabobini gartaangal am mbele mido jabboo mawni am e cagataagal am. Mi haalantaa ma noon hol dumunna mo ngonmi toon e cadeele de kawru mi e tampere nde tampu mi haa mbaaw mi artude haa doo. ‘Dum fof e wa’de noon mi hebaani muusalla haa hebi sangkaare mawni am, oon mo korsinmi ñande kala e mo njid mi gilli hakkunde miñiraado e mawniraado teentudi. Mi hebtinii yiyam makko e yeeso biddo am cawndiido oo, ko duum wadi cubmoomi e nder sukaa be kala. O hebii habrude ma sunaare am nde tinmi mawni am ruttiima, kono jettoode ngoodanii Joomiraado e huunde fof. Maa mi yi’ru mo biddo makko mo nganndu daa ina arti mo no feewi.”

Ñenngotoodo oo fuddiima faamde ko haalata koo fof woni ko e hesditinde sunaare e bernde yumma mum Aladiin. Ndeen o faamii duum, o yeccitii e Aladiin, o wi': "Hol no mbi'ete daa?"

O wi': "Mbi'etee mi ko Aladiin."

Doon tan yummiraado oo hebbitii, wi': "Aladiin ko mbaaddi. Baaba makko alaa fof ko wadaani e nguurndam mum kono ronki. Gila o maayi noon fa'de jooni, gede dee beydii bonde, sabu kala ko mbi'moomi rewata ko dow hoore makko. Alaa ko o nafata so wonaa ñallude fijjude e sukaaße, hono no tawru daa mo nii. O sikkata ko o suka, kono, haa o wona huunde e aduna, miin ko mi damtindiido mo. Omo anndi baaba makko daccaani hay huunde, etee ko mottat mi jamma e ñalawma koo debataa hay yonde hiraande amen. Mi fellitat tan meedde wiicaade (accude) mo, to o yidi fof yoo huccu."

Ndeen yummiraado oo gaynii jantaade, hiiwtii yani e woyde, gite keddii ina ngila gondi.

Ñenngotoodo baleejo oo wi': Aladiin! Bidngel am! Miijo wallude hoore maa, mbele ada wuurna hoore maa. Mecce kay ina keewi; yeew heen burngal welde ma, maa taw meccal baaba maa ngal welaani ma, tawa miijo maa woni ko e godngal. Ko waawi heen wonde fof hoto suud min miijo maa, sabu miin njid mi tan ko hebbitaade ma."

Ndeen o yi' Aladiin jaabaaki hay huunde, o wi': "So tawii a yidaa meccal, ada yidi reende ndimaagu maa, mido waawi udditande ma yeeyirde; tawa ada waawa yeeyde heen bagiiji gaabdi e koydi. Saa yeeyii haa gasi comoyodaa kadi njeeyaa e ndiin mbaadi; maa a waaw wuurde nguurndam moyyam. Yi'du e hoore maa, miijo daa heen no feewi; maa taw mido heblii huuɓnude aadi."

Ndeen fodoore welii Aladiin no feewi, nde tawnoo o yidaa wuurde e golle doole. Omo faami kadi arata e dii leyfi bitikaaji tan ko yimbe faayodinbe e ko fawtii heen, diin nokkuuji ko nokkuuji laabdi ngonata. Doon tan o holliti baaba makko, hono ñenngotoodo oo wonde o waawaa dañde ko burani mo ndeen feere. Kadi so o dañii duum, o wontaa yejjitde ndeen moyfere kaaddi nguurndam makko.



Ñenngotoodo oo wi': "Tawde ko noon, janngo maa en njahdu, mi holtin maa, koltu njaadungu e yeeyoobe burbe maantinaade e ndee doo sahare. So duum bennii baawo janngo mi udditan maa yeeyirde nde nganniyii mi ndee."

Yumma mum Aladiin mo goonjdinaano wonde oo ñenngotoodo ko miñi mum joom galle makko, felliti goonjinde ko miñi mum joom galle makko, ndeke ko baaba mum Aladiin cawndiido. Duum fof ko tuugnaade e gede moyƴe de ñenngotoodo oo fodani bidde makko oo, hono Aladiin.

O yetti ñenngotoodo oo, sabu anniyaaji moyƴi di jogii e Aladiin. Caggal duum o battini hiraande. Ndeen be kirtiima haa be ngayni, be kiiri jumpude e ndeen yeewtere. Ndeen jamma oo jenngii ñenngotoodo oo ñaagii laawol, Aladiin e neene mum nduusi mo.

Janngo mum ñenngotoodo ruttii galle joom suudu Mustafaa, ñootoowo hono no wi'ru nih. O yahdi e Aladiin to jeeyoowo kala leñol koltu, tawi fof ko ko ñoota haa feewi. Comcol heen fof ina ñoota e tolno moni fof. O suɓii heen, o wi': "Aladiin yeew heen buran di ma fof." Aladiin nde tawnoo moyƴere baaba mum tokooso nde ardi e mum ko kaawis, suɓii tan ko wutte gooto.

Ndeen Aladiin suɓiima ko yidnoo, ñenngotoodo oo yobi kala ko yahdannoo e comcol ngol tawi ustikinaaki. Ndeen Aladiin ñaantiima gila hoore haa teppere, weltaare mum mawni; yetti baaba mum tokooso kala sifaa njettoor mo ina hollira weltaare.

Ñenngotoodo oo wi': "Wonaa doo tan haadata, mi woppirtaa ma nih tan sabu ñande kala ko enen ngondata. Ñenngotoodo oo jokki e yirlinde Aladiin e nokkuuji burdi heewde koyde e nder sahare ndee kala; o holli mo jeeyirde burde heeroraade alduɓe. Ndeen be njirliima haa be njottii laawol ngol jeeyirde bagiiji gaabdi e dimi ngoni ngol, o wi' Aladiin: "Tawde booyataa ngontaa jeeyoowo no bee doo nii, ina moyƴi garaa e maɓbe mbele ebe ngoowmaa. Caggal mum ñenngotoodo oo holli mo

jeeyirde arani'en; ɓe ɓenni fa'de e nokkuuji hodorde laamɗo ɗi belaado kala ina waawi naatde.

Ndeen ɓe njirliima e nokkuuji ɗii, haa ɓe ngari e nokku ɗo ñenngotoodo oo nanngunoo hodorde yobeteende ɗoo. Nde ɓe njottii, ɓe tawii ɗoon huunde e yeeyooɓe ɓe nganndondirnoo adan. O yetti feere yoo o ñammin ɓe no haanirta nii, mbele omo waawa hollondirde ɓe e ɓiyiiko fuunti funeere oo.

Ɓe ngoni e ñaamde haa hiiri, Aladiin yaafnii yoo baaba mum tokooso woppit ɗum hoota kañum tan. Ñenngotoodo oo salii. Ñenngotoodo oo kañum e hoore mum ɗofti mo, nawti mo haa to neene makko.

Ndeen yumma mum Aladiin sooyinii ma Aladiin ina ara, ina ñaantii haa yoodi, o heddii omo duwoo haa o watti hudde alla e weltaare e oo baabiraado tokosso gilli ɗi jogii e oo ɓiɗɗo haa leemi e mum ndii jawdi keewndi.

Yumma mum Aladiin heddii ina wi'a: "Banndi am! Dokko mo ɗaminaaki njɔɓɗi, mi anndaa fof ko njɔɓat maa mi e ndee moyƴere; mido anndi ɓiɗɗo am haandaani e ɗum ɗoo fof; etee maa o jaas, so tawii o yobaani diminna walla so o yeebii ma anniya mo coomɗaa e udditande mo yeeyirde maantiniinde nde. Mido yettu maa, kadi mido ñaagono maa juutde balde haa ceedodaa moyƴere nde ɓiɗɗo am haani yɔɓde ma ndee. Ɗum ne ndeen moyƴere o waawaa yɔɓde ma ɗum so wonaa o ɗooftoo wasiyaaji maa.

Ñenngotoodo oo wi': "Aladiin ko ɓiɗɗo moyƴo, mido sikki maa o firtu huunde. Wondi tan ko mido sunii e gedel gootel: mi waawataa huuɓnude aadi am oo janngo, sabu ko Aljumaa hawrata, jeeyirde ko ko nguddata; sabu so ɗum wadii hay gooto waawataa heroraade yeeyirde yobeteende, saka noon wadde heen njeeygu, tawa wodɓe ina mbelina pittaali mum'en. Ɗum noon golle ɗee mbaawata wadɔyde ko Aset (hoore biir). Kono noon haɗataa maa mi ar janngo, mbele amin njahndoo e nokkuuji ɗi yimɓe mawɓe ngoowi yahde. Sabu mido anndi o woowaani yi'de pijirlooji baɗeteedi toon ɗii goren am; o woowi tan ko

pijirlooji sukaaḃe; jooni o fotii humpitaade ko mawḃe koo ne. Ñenngotoodo hooti.

Aladiin heddii ina summba weltaare e nder koltu ḃoornii nguu, miijooji keewti hakkille mum e yidde humpitaade ndee fodoore nde baaba mum ñenngotoodo fodani ḃum: humpitaade ḃee boowe puḃi nehaadi e saraaji sahare, yi'de ḃii nokkuuji kaadtudi njoodndam, belḃi haa alaa ko foti.

Nde tawnoo Aladiin waaldi ko gite kecce, heppi ko weetata, ḃoornii comci mum fadi e baaba mum ñenngotoodo, mbele oon so arii tawa ko ḃe yahat ḃe.

Alla e heppere, Aladiin ronki jonnde e darnde, heppi ko yi'ata baaba mum ñenngotoodo, udditi damal joodi ḃoon, mbele Alla omo yi'a mo. Ndeen o sooyniima baaba ñenngotoodo, o dogi, o waynoyii neene makko. Ndeen o wayniima, o yalti, o uddi baafal, o dogi, o heḃtoyii baaba makko ñenngotoodo.

Ndeen o yottiima, baaba makko ñenngotoodo oo, oon mooyti hoore makko no feewi. O wi': "Njahren ḃidngel am! Hannde mido yidi hollude ma gede godde."

O nawi mo e damal udditiingal e galleeji goddi walla mbi'aa e kodorde kaawniide, sabu Alla e njoodndam majje. Hodorde heen fof ina ñaantiraa puḃi jooddi haa ko ḃoon haadi, etee kala belaaḃo naata ndaara haa ḃernde mum sukkitoo. Hodorde nde ḃe ngari fof, o naamndoo Aladiin mbele ina yoodi.

Aladiin wi'a: "Baaba ndee hodorde ḃuri yoodde e kodorde nji'den ḃee naane."

Ko noon ḃe njokki e yahde haa ḃe naati e ladde. Ñenngotoodo oo nde tawnoo ko wojere etee fawti heen kadi ina yidi ḃeydaade wodḃude mbele heḃa waḃde faandaare mum e Aladiin, o waḃi feere no ḃe ḃeydorii naatde e boowe puḃi hee. Noon o joodi e sara mbalka mawka, no hunuko rawaandu ladde tafiraaka jaka ina waanja ndiyam keelelam.

O wa'ino tampudo nii, omo yeewa mbele Aladiin ina yidi fooftaade. O wi': "Bidngel am, en poti ndaarde no pooftori den, sabu en tampii, enen fof, mbele maa en paggito doole kese mbaawen yawtude."

Ndeen be njoodiima ñenngotoodo oo itti dadol mum, tawi ina soomnoo heen kodde belde kam e sifaa biɓɓe ledde kala ko be mbaɗnoo njooɓaari. O fawi e dow mbalka he, o fecci kodde dee kam e biɓɓe ledde dee, o wi', "Aladiin! Suɓo heen ko njid daa fof."

Doon o fuddii waajaade Aladiin yoo woppu yahdude e cukaloñ ɓadoo haralleeɓe reentiibe, o hedtoo dum'en, mbele omo naftoro jeewte mum'en.

O wi' kadi, so wadii duum, jooni- jooni ngonaa kellifaado; kono noon wonaa noon tan ngoowirtaa jeewte belooje be. Ndeen be ngaynii ñaamde njooɓaari maɓɓe, be jokki e yahdu. Ebe ngummoo e ngoo maayo tan be njaabana wodngo. Hakkunde maayo e maayo fof ko caankoon e pufe puɗi lommbii doon. Ko noon ñenngotoodo oo dowiri Aladiin, tawi wadtaani heen hakkille, haa be ngoddi no feewi. Noon be njaltiri boowe puɗi jooddi dii haa o taccini mo laddeji be naatoyi e nokkuuji tule e kaaye.

Aladiin mo meedaani yahde, yahdu wodɗundu e nguurndam makko, tampii, lorii.

O wi', "Baaboy am! Hol to pa'den hee ? En njawti boowe puɗi jooddi di, jooni alaa fof ko nji'at mi so wonaa tule e kaaye! So en njawtii doo, mi sikkaani, so maa mi dañ semmbe mo ina nawta mi haa wuro."

Ñenngotoodo oo wi', "Bidngel am! Njid mi ko hollude ma, boowe puɗi burdi yoodde e di nji'den dii. En natti wodɗude; ko taabe seeda tan heddii; mi yidaa mbaraa ɓanndu maa, sabu dii puɗi aan e hoore so a yi' di, maa a wi', so a hootii a fawaani gite maa e oo nokku, maa sinno ware!"

Noon Aladiin jaɓi ko baaba mum haali koo, ɓe jokki e yahdu. Eɓe njaha baaba ñenngotoodo ina tinnda tinndi beldi jurminiidi, dum fof ko mbele Aladiin ina yejjita tampere laawol ngol.

Ndeen ɓe njahii, ɓe njahii haa ɓe ngari e nokku gooto. ʼBe tawi doon tule diidi potondirde de caatngol heedi hakkunde mum'en, de toowaani. Ko doo noon ñenngotoodo oo yidnoo addude Aladiin mbele yubina haaju umminnoodo mo gila ceɓɓet Afrik haa to leydi Siin. O wi', "Aladiin! Jooni dey en bennataa doo. Jooni noon mido yidi wadande ma kaawisaaji di hay gooto anndaa. So mi holliima dii kaawisaaji di hay gooto e winndere hee meedaani yi'de, maa yettu am haa mbattaa hudde. So mi wonii e yonkude fetel am oo, aan a wonat e renndinde hudo yoorko mbele eden mbaawa hubbude jayngol."

Ko taarii ɓe koo fof, ko hudo yoorko e majannde tawi Aladiin renndinii joowal mawngal haa ɓurti ko baaba ñenngotoodo soklunoo koo.

Ndeen hudo renndii, baaba ñenngotoodo weddii e hudo koo jaynge, hudo ruppitii, o wadi e maggol nebam dam o addornoo dam. O woni e normaade, tawi ko cefi o woni e janngude. Ko doon cuurki tekkuki ruppitii e yaara kala bannge mo o dowri ki. Aladiin heddodii e najoore sabu alaa fof ko faami e dii normaali saka cefi. E darnde leydi dilli, gewol mawngol udditii e yeeso maɓɓe.

Doon haayre nde felo e feccere nayi kiɓɓal feeɗi. Haayre ina wadi feggere jaka ina takka heen mbele so neddo yidii jaggude e mayre ummina tawa wadantaa dum cadeele. Ndeen Aladiin yi' duum, kulol jaggi dum, wi' ina dogo. Kono nde tawnoo omo hatojini e diin kaawisaaji o motti kulol ngol, o heddodii e siññere.

Ñenngotoodo oo wi' mo hello tal; o yani, o marboyii e leydi haa o soppii e tonndu les, yiifam heddii ina wala. Aladiinyel, mo feere mum boni woni e gergertude ina woya, gondi ina mbaanjoo, ina yera ina haamtoo. O wi': "Baabooy am ko woni, haa ko ada fiiyra mi nii ngal piggall muusngal?"

Baaba ñenngotoodo wi': "Mido jogii sababuuji di mbadir dum. Ko mi baaba maa; alaa mo nji'daa, hannde ko miin woni baaba maa! A footaani waddude am cood maami coodtu maami." O heddii omo mooma Aladiin e konngudi newiidi mbele hakkille mum ina arta. "Bidngel; hoto hul! Ñaagimaami tan ko yoo a doofto mi, mbele ada waawa naftoraade bure njid mi rokkude ma dee."

Ko dee podooje de baaba ñenngotoodo fodanta bidfo, hadata bernde Aladiin jirgitaade. Ndeen yahi haa o anndi hakkille Aladiin deeyii, o wi', "A yi' sirlu nebam am dam? Kadi a nani konngudi njantii mi dii? Tuggande ma hannde noon, faam wonde ndee doo haayre fawii ko dow booñ ngalu. Booñ oo noon ko arsuka maa, ko kanke wadat maa neddo burdo aldude e laambe aduna bee kala. Ko dum sabaabu hay gooto e winndere ndee yamiraaka yoo mem haayre ndee, walla suuta nde naata nder so wonaa aan tan gooto. Hay miin e hoore am mi yamiraaka yoo mi mem ngalu nguu walla memnude heen koyngal am, so ngalu nguu yaltii. Ko duum saabi ada foti wadtude hakille e jamirooje am gila e fuddoode haa e wortoode tawa hay huunde heen jakkaani. Wadtu heen hakkille no feewi, sabu so tawii won ko feewaani heen, miin e maa fof en mboomoto boomaare mawnde."

Kaawis oo booñ, ngalu jogordo wadtude Aladiin galo e neemiido no feewi maa o yejjitin mo tampere nde o tampunoo e gede godde badanoo dee. O girñitii, o darii, o wi': "Baaba! Hol no kabaaru dum doo wa'i? Yamir am! Ko mi kebliido wadde kala ko njamir daa mi yoo mi wad fof."

Ñenngotoodo oo weltii heen, himyi mo sabu weltaare wi': "Mi weltii ma bidngel am e ko njabdaa golle koo. Bado gaay! Yettu feggere nde. Cuutaa haayre ndee."

Aladiin hebbitii wi': "Baaba, mi alaa semmbe suutude haayre ndee, ko maa mballaa mi."

Ñenngotoodo oo wi': "A alaa haaju e ballal am. Min e maa fof alaa ko pirteten heen hay huunde. Ko aan tan gooto foti suutde nde. Noddu

innde maa, innde baaba maa e innde maama maa, tawa ada jaggi feggere ndee, umminaa haayre ndee. Maa a yi' haayre ndee ara e maa ko aldaa e tampere.”

Aladiin wadiri no ñenngotoodo oo wi'ri dum nii. O ummini haayre ndee tawi o tampaani, o joñi nde bannge. Ndeen haayre nde iwii doon, wiiduru ndu pele tati haa nayi feeñi, ina wadi baafel tokosel e ñabbirde telloyiide les. Ñenngotoodo oo wi': "Bidngel am! Wad kala ko njamir maami. Jol e nder wiiduru hee, so a jippii ma haa les, maa yi' damal ina udditii, ko ngaal nawat maa e nokku gooto baydo no boleeru nii. Boleeru nduu ina wadi cuudi tati deggondirdi. Suudu kala maa taw heen to bannge ñaamo eto bannge nano pehe nayi jaka mbayde no mbannduuji nii, ina keewi kanje e kaalis. Woto mem dey. Hade maa naatde e suudu adanndu nduu a suutat wutte maa; ndado daa haa tiida. So a naatii, tiindo daa e ñimmuru hee tawa a dartaaki, doon kuccanaa tataburu nduu tawa a dartaaki. Kala ko ada wada reento gila a memaani bale dee walla wutte maa woogoo e bale dee; sabu so a welsindii ma haa a memi walla comcol maa memi bale dee tan, ko doon maayataa. Ko duum saabi mbi'mi yoo a dado haa tiida. Suudu tataburu nduu udditoo ko e boloyel gaawagel ledde joodde. Leggal heen fof ina wammbi biibe haa teddi. Yaawno taccaa ngool bolol; tacciraa to laawol nawowol ma to ñabbirgal ngal, yeenjirde capande joyi. Ko e maggal yeenjataa ngaraa e caali, so a yottiima e caali hee maa yi' sabbundu wooturu. E nder sabbundu hee lampa ina heen yaynoo. Yettaa lampa kaa ñifaaka; mbeddo daa cebbet kuɓɓatnoodo oo, ndufaa njaynordam dam. Yettaa lampa kaa takkaa dum e maa, ngaddanaa mi. Hoto hul dum tunwintaa comcol maa; sabu wonaa nebbam huɓɓata lampa kaa; tee maa lampa kaa yoor doon e doon so hay huunde alaa e makka. So tawii bidde ledde dee ina mbelmaa ada waawi boggude heen haa njone daa dum hadaaka.”

Ndeen ñenngotoodo yottinii haala mum, o itti feggere wootere e fedeendu makko, o wadi feggere ndee e fedeendu Aladiin; o wi': "Ndee feggere ko reentorde ende faloo kala cadeele baawde heɓtaade ma

toon. Wad ko njamir maami ko!” O wi’: “Eywaa bidngel am, tello e cuusal! Miin e maa fof, maa en ngaldu kaaddi nguurndam men.”

Aladiin daari naati e wiiduru nduu, o jippii haa les nabbirde dee, o yi’ cuudi tati di ñenngotoodo oo sifaninoo mo di. O tacciri feere e teylaare sabu omo anndi so o footii ma ko o maayoowo. O tacci boloyel ngel o daraaki; o yeenji e caali hee. O yetti lampa kuɓɓatka ka e nder sabbundu hee. O werlii ceɓɓet kuɓɓoowo kaa e kuɓɓirdam dam. Ndeen o wadii noon, o tawi ka yoorii no ñenngotoodo oo wi’runoo nii; o bitti lampa ka o jippii. O dartii e boloyel ledde ngel, omo ndaara bidbe bee, nde wonnoo o leyɣino de tan nde o yahatnoo ndee.

Leggel heen fof ko ko besni besnooje kaawniide. Ledde dee ina ndoondii bidbe be nji’daa goobu. Ina wadi e bidbe ñilkooje; dee ko jalbooje no gabbe ceenal, dee ko daneeye, dee heen ko bodeeye..... won heen buri kadi hay teddude e godde dee. Ina tawee e bidbe ledde dee sifaa goobu haako ñebbe, sifaa baka, e sifaa boru pooddo e makkaari kam e goobuuji keewdi goddi.

Bidbe raneebe bee ko kaaye dime, bidbe jalbooje keelele dee ko kaaye fina mo jillaaka (jamaa), bodeeye burde neellitinde bodewol dee ko haayre rimre nde bodewol laaftungol joodngol e conndi jaabe (rubis). Ina heen e bidbe kadi denndinde duule e baka nanndudo e goobu asamaan.....ekn.

Dee bidbe ledde limtaade doo fof ina ngondi e buttidgol e ñeeñal ngal hay gooto meedaani yi’de e aduna. Yi’de dee ledde e sifaa mum fof e haawnaade denyinaani Aladiin, nde tawnoo o anndaano ko de ngoni saka anndude nafoore majje. Sinno ko eede, walla potde leddeele buubde dee, burani mo, walla noon leyɣi bidbe ledde godde belde goowaade e denndaangal e leydi Siin ndii.

E oon sahaa o hebaani duubi di ina ndokka mo anndude nafoore dee besnooje. E sikke makko dee bidbe ledde fof ko toyɣe keelele goobaade tan, diwaa doo dakkaa daa. Sifaa ledde besnooje dee gila e njoodndam e buttidngol majje bulnii e bernde makko ko yoo fettu e majje. Ndeen o fetti e leñol heen fof; o loowi e jiifaaji makko, haa e



bataaji dīdī kesi pul dī ñenngotoodo oo soodannoo mo dī, haa e wutte mo o yeennoo mo, nde tawnoo oon sahaa ñenngotoodo oo yidnoo ko kala ko woni e makko, yoo taw ko ko hesdī. O sinndii bataaji dīi nde tawnoo jiifaaji dīi ko ko keewdī; o loowi e dadol makko bagi juutngol; o haɓɓi haa tiidī haa o yananaa o yanataa. O yejjitaani kadi loowde e hakkunde forok makko e cakkal, o taarni hoore makko.

Noon woni Aladiin roondi ngalu haa heewi tawi goram bajo anndaa heen hay huunde. Ndeen o gayni, o heñii o yaltiri laawol cuudī tati ngol hade o jaggitde ñenngotoodo oo ko juuti. O reftiri doon e tewaare no o rewrurnoo doon nde o yahatnoo ndee, o tiindii to damal ngaska too, do ñenngotoodo oo fadi mo e heppere.

Ndeen Aladiin yottiima, wi’: “Baaba! Tiidno weed am junngo, mballaa mi no njaltir mi.”

Ñenngotoodo oo wi’, “Bidngel am! Rokku am fitirla kaa tawo.”

Aladiin wi’, “So mi yaltii tan mi tottete fitirla ka.”

Ñenngotoodo oo kañum foodanii tan ko yoo Aladiin tottu dum fitirla ka haade mum yeenjtude. Aladiin ne nde tawnoo ko kamyudo fitirla ka e bidɓe besnooje dee, salii weedde mo fitirla kaa haa yoori, wi’ so wonaa yeenj. Doon tan ñenngotoodo naati fitina, sabu oo suka yoordii dum hoore, noon tan o nokki e nehal hee o werlii e jeyngol makko ngol o mooftunoo ngol, o woni e normaade cefi makko; hay o gasnaani sefaade haa haayre uddunoonde damal ngaska kaa, arti do wonnoo doo, wa’ti no waynoo e sahaa nde ɓe ngarnoo e nokku hee ndee.

Sikke alaa, ñenngotoodo oo wonaa miñi mum Mustafaa ñootoowo, baaba mum Aladiin, hono no wi’ri nii. O wonaa miñi mum Mustafaa saka o wona baaba mum Aladiin cawndiido. Ko Afriknaajo laaɓdo, ko heen o jibinaa, ko heen o mawni, ko heen kadi o janngi mbileewu gila omo famdī. Nde tawnoo Afrik ko nokku keewdo yimɓe ɓurɓe sanndolinɓe e ñenngi e nokkuji goddī dīi fof. O wonii e golle mbileewu hee ko ina abboo e duubi capande nayi (40) walla faando doon, omo

tiima, omo suurkina, omo jannga defte ko fa'ti e mbileewu (ñenngi) haa o yi' wonde e aduna hee ina woodi fitirla kaawniika, etee so o dañii kaan fitirla maa o won joom semmbe burdo semmbolinde e dow laambe duunde baaba Aadama ndee fof.

E ko nder tiimngal makko battindii ngal, o yi' wonde fitirla kaa woni ko e nder leydi to hakkunde Siin e nokku e gede de kaalden dee kala. O hebii goonga ko o yi' e tiimngal ngal koo, ko duum saabi o ummii cebbet Afrik, o wadi danngal muusngal haa o yottii e wuro takkiingo ngalu nguu.

Fitirla kaa fof e wonde e nokku mo o laabaa, o yamiraaka yoo o ittuka kanke e hoore makko, walla naatde e nokku do fitirla ka woni doo. Ko maa o ndaarta neddo goddo naatoowo haa e nder leydi too, yaltina fitirla kaa totta mo.

Ko duum wadi mo subaade Aladiin, nde tawnoo omo daminii ko Aladiin tan waawi wadande mo deen golle. So tawii o hebii fitirla kaa haa naati junngo makko, o ruttoo o wada no o wadi Aladiin jooni nii, mbele ina waasa wadde seede. Duum fof o wadirta dum ko hakke yidneede e bonde bernde. Ngoo hello ngo o fiyi Aladiin e sifaa kalifaandi adan ndi o holliri ndii fof wonnoo tan ko mbele Aladiin ina hula mo, so addii fitirla kaa, so o wi' yoo oon tottu mo tan, oon itta fitirla kaa totta mo. Kono fof wa'de noon o dañaani ko o sikkanno koo; ko heñotonoo koo ko mbele o heeda Aladiin e hakkille mum fof haa o booma dum tawa hay gooto tinaani, haaltoya.

Ndeen ñenngotoodo oo faamii peeje mum mbonii, pittol mum sooyii, felliti ruttitaade Afrik e oon ñalawma e hoore. O yahi omo wada fiilto moolto, hade o naattirde wuro do o yaltirnoo kanke e Aladiin. Dum fof ko hulde hade yi'noobe waktu nde be njaltata ndee nji' mo o artii; o artidaani e Aladiin.

E miiijooji ñenngotoodo oo, so Aladiin majjii wontaa yi'te ko heddii heen koo.

Ndeke noon o yejjitii o rokkiino mo feggere waawnde danndude mo e kala kataa. Ko ndeen feggere kadi woni sabaabu Aladiin dadde e pittol

kataa ngol ñenngotoodo oo tuuforinoo Aladiin; hay sinno wonii o anndaano nafoore feggere ndee. Buri fof haawnaade ko ndee boomaare yantude e baasal hebde fitirla ka fof adanaani ñenngotoodo oo yamdude. Ñenngotoodo e aduna mum ko ko joowi boneeji e gede kaamtoridde haa saabi o haabataa kaadde nguurndam makko e durde cuurki kam e mette e nder laddeji.

Aladiin piɓnoodo heɓii baabiraado moyɗo mo ina lomtoo jahdo o, ittoowo dum e sunaare baaba mum duhol, heɓi ko doomburu nata wutta. Oo baaba mooytii Aladiin mbele feewnitoo haa waawa hebde sago mum, so hebde ngalu, laamoo laambe; wadani Aladiin kaawis mawdo mo Aladiin nimsanaani. Oon kaawis mo miiɗo e janɗaade tan gaynaani nafaa mum. Ndeen Aladiin faami ko gubbaado ina wuuri, o eerii baaba oo, hono ñenngotoodo o laabi ujunere, yoo ar o totta dum fitirla ka. Kono gulaali makko tayii, o jippii haa les ɗabbirde ngaska kaa ngam ɗabbitooyde ndaneeri to ñaargo ngo o reddinoo ngoo, kono o tawi ngaal balal ñennganoongal udditii, ñenngaama uddii.

O woni e memmbaade banɗe makko nano , omo wo'a, nde yahnoo haa o ɗamtindii moyɗere Alla, o joodii e ɗabbirde gaska hee. O fiɓtii hanɗadi o wontaa yi' ndaneeri, ko niɓɓere tan e sunaare kedde balde makko.

Ko noon Aladiin woori balde ɗiɗi ñaamaani, yaraani. E ñalawma tataɓo oo tawi o yananaama alaa ko waawi dandude mo e maayde, o haɓɓondiri juude, o ummini e fellitde (qirlitaade) laamdo alaa so wonaa geno, tee ko kam tan jogii sabaabu, ko e mum kadi o fawi jikke, ngam ko geno tan jogii baawde, kam woni toowdo. Heddii Aladiin ina wulla e ɗii konngudi.

No o umminiri juude makko korsondirde dee nih, o tinaani feggere nde ñenngotoodo wadnoo e fedeendu makko ndee o anndaa nafoore mum ndee o miijaaki, woodi do woogii e bale dee. Ko doon jinne mo yeeso yaajngo, ndaarki kulɓinii ki, ummii e nder leydi, yeeftii haa hoore mum

woogoyii e mbildi wi' Aladiin e konngudi: "Hol ko njid daa? Mido e yamiroore maa, kadi ko mi maccudo maa hono no ngonir mi maccudo kala boorniido ndee feggere; miin e jinneeji feggere ndee fof."

Ko wonnoo heen e ko waawnoo wonde, Aladiin nde tawnoo woowaani gede bayde nii, alaa ko woni haaju mum so wonaa yoo yaltu mbele ina dada e musiiba. Ko doon tan o hebbitii, o wi': "Mo mbaaw daa wonde fof yaltin am e oo doo nokku so ada waawi."

Joofi joofaani tan haa leydi seekii, o yalti, o darii to be ndarinoo kanke e ñenngotonoodo gaddunoodo mo oo.

En kaawetaake noon so wi'aama Aladiin ronkii ndaarde naange, sabu niɓɓere nde o wonnoo ndee alaa e sago woppa cuddi e gite makko. Seeda seeda cuddi ngonndi e gite dee ina iwa haa waɗti yi'de, nde o ndaari o yi' leydi ceekinoondi ndii waatii no wa'noo etee jooni o yaltii e tekteki mayri. Ko nokku do kudal kal duppannoo doo waɗi maande, ko ndeen maande addani mo heɓtinde do ngaska kaa wonnoo doo. O yeeyii, o sooyinii wuro hakkunde ledde. O heɓtini laawol ngol ñenngotoodo rewnunoo mo ngol. O heddii omo yetta geno nde danndi mo e boomaare, sabu ko piɓtinoodo nguurndam haa laabi cer.

O fa'ti wuro, o daasii haa o yottii galle maɓɓe. Ndeen o naatii galle, mbellamma mawɗo jaggi mo e ko o yi' yumma makko. Yummiraado oo ne ko damtindinoodo biɗɗo mum, sabu o wi'iino oon majji ina wona nii tawa won to maayi. Aladiin fof e weltaade ina ardi e heege, domka e tampere balde tati de o yi'aani naange. Yummiraado tawi woyii haa tampi, heddii ina ndaara no feewnitiri haa o wa'ta no o wa'noo nii.

Nde Aladiin yahnoo haa difti, konngudi mum gadani fof gadiidi yaltude e hunuko mum, ko dii: "Neene ko adii fof njidmi ko ndokkaami, ko ñaammi, sabu dee balde tati haa yahdi e naange mi ñaamaani, mi yaraani."

Neene makko addani mo ko mooftunoo koo badini mo, wi': "Bidngel am hoto heño, sabu heñaare moy'yaani, ñaamir hakkille maa eno mbeliri daa. Mi yidaa njeewtanaa mi laawol ngol tawo, so a gayni ñaamde hakkille maa deey'i maa waaw yeewtande mi. Weltaare am ina mawni e ko nji'maami koo, sabu gila subaka Aljumaa mo ndawdon oo haa ñalli hiiri a artaani e galle hee. Dum wadi e am ngo'ya, sunaare jaggi mi woppaani."

Aladiin dooftii haala neene mum kaa. O ñaami haa o haari, o yari haa o domditi, o wi', "Neene, mido jogii ko heewi ko kaalantu maami e oo gorko mo gonnoomi e juude mum. Oo gorko mo alaa ko wonnoo anniya mum, so wonaa no wardoyi mi, hay doo do ngonden o sikkitaaki ko mi maaydo.

Mido anndi a goondinii koo baaba am tokooso e batte no o wi'ri e no o holliri en moy'fere nii, hay minne mi sikitaaki mo e bonande ummoraade e makko fa'de e men. Eey! Oo gorko gardo e men ina mooyta mi, ina fodani mi podooje moy'fe; badde faayiida; mbele eden mbaawi siktaade mo? Kono nganndaa, Neene! Oo gorko ko jamfante, ko o joordo bernde mo nuundal alaa e mum. Ndeke alaa fof ko o wadirtunoo ndee moy'fere e dee podooje, so wonaa haa waawa humtude haaju makko, o tilfa mi. Ndee feere nde oo gorko joginoo en coynonooki dum. Ga banjal am hay huunde ko mbaad moomi ko boni, maa a faam so mi siimtaniima, gila e fuddoode haa wortorde gila ceertu den haa doo yidi siinude anniya makko oo."

Aladiin jantanii neene mum ko joli hakkunde mum e ñenngotoodo, gila ñande Aljumaa nde o arani mo, be njahdi e kodorde joodde, haa e laddeji pufi dii, haa be njalti wuro. O haalani mo ko o wadi nde be njottii e tule didi kaay'e dee, oon nokku do ñenngotoodo oo fotnoo wadde kaawisaaji mum. O haali kala ko o wadnoo gila e nebbam dam, ngaska kaa, ngalu nguu, hello ngo o fi'noomo ngoo, no o naatirnoo fitina haa o deey'ti nii; podooje mawde de o fodannoo mo dee e feggere nde o wadannoomo e fedeendu ndee, hade makko naatde e ngaska kaa hay tobbel o diwaani, gila ko o yi'noo ummaade tan e cuudi tati dii fa'de

e laddeji dii e caali do lampa kaa wonnoo doo, nde o yahata e nde o artata kala. Do o halanta neeniraado oo o gaynaani, o duufti ka e wondude e bidbe ledde keleele e sifaaji godfi di o boggunoo e ngesa baa, kam e bataaji didi keewdi. O itti duum fof o weedi yummiraado oo.

Duum noon jeertinaani yumma oo. Ndeke bidbe ledde dee ko kaaye dime. So a yi' no de delkirta ede njalba no naange nii e ndaneeri lampa kuɓɓatnooka e suudu hee tan maa anndu dimɗugol majje. Kono Aladiin e yumma mum fof alaa heen ganndudo nafoore majje, nde tawnoo be nehii ko e baasal, joom galle makko alaano saka soodana mo hono dee cudaaje. O meedaani nih yi'de jinnaabe makko walla hoddiibe makko ina njogii ko wa'i noon. Ko duum wadi haawnaaki so o sikki kaaye dee ngalaa hiisa. No wa'i fof omo anndi kaaye dee ina njoodi, sabu mbaadi e goobu majje. Ko dum wadi Aladiin e hoore mum werlii de e les jappere jappunoo e joodorde mum. Caggal mum o uddiri ciimtol ngol no leydi ndi hipporinoo e dow makko. Ndeen o saliima tottude ñenngotoodo oo fitirla kaa; o haali nebbam dam ñenngotoodo oo naftorinoo dam, kam e cefi e jaykal kal o memnoo kal, doon o ronki jaggude gondi makko, sabu miiptaade do o wonnoo doo, omo ubbaa o maayaani, haa no o artiri e aduna, caggal nde o woogi feggere makko nde o anndaa ko nafata.

Ndeen o gaynii siimtude laawol makko kanke e baaba makko fuunti funeere, o wi', "Neene motaani ko mido jokka, tonngoode faayiida laawol amen, nani."

Yummiraado dañii haɓɓude wonki mum haa waawi hedtaade ko bidngel mum daarantunoo dum koo. Ngol daarol kaaɓnigol, muusngol e nande e nofru yummiraado korsindo bidɗo mum. Yummiraado oo, kam fof e heewde ayibbaaji, so Aladiin haalii won e konngudi, ko maa o njata tonndu ngam hamyude muusalla bernde kolliroowo jamfantaagal ñenngotoodo oo, haa heen sahaaji o ronka suudde ngañgu makko e oo baaba fuunti funeere.

Ndeen Aladiin gaynii haalde, yummiraado heddii ina aaynoo lillungal Yattooje, kuddi fa'de e oo baabiraado kudaado. Wonti alaa ko nanataa, so wonaa: jamfante bondo; yiyiwo; war hooreejo; keefeero, battam boniijo, ñenngotoodo, gaño bondo jooloowo winndere. O wi': "Bidngel am, oo haa gaay! Ko o ñenngotoodo? Ñenngotoobe bee ko ñawu baraas kuuɓtidinngu.

Be ngollottoo ko e seydaneeji kambe e ñenngi maɓbe e mbileewu maɓbe.

Geno jaaraama nde jaɓaani anniya makko bondo mo o joginoo oo benna e maa! Ada foti yettude mo no feewi e ngalu ngu o rokku maa ngu, sabu aan maayde maa ko ko yettinoo so tawiino a siftoraano ñaagaade mo ballal yoo o dannde e bone."

Ndeen yumma oo haalii kala muusalla e ngañgu joganii oo ñenngotoodo jamfiido bidngel mum doon doo gayni haalde Aladiin woni e dooyaade ngonɗi nde tawnoo fotde balde tati daanaaki. O Ielni Aladiin, caggal duum o lelii kanke ne.

Aladiin mo meedaani hay fooftere wootere e nder kaa ngaska ka o ubbanoo, mbele ina sanjoo, daanii doyingol luggol oon jamma fof. O fini e janngo e mum ko tawi naange jiimii e hoore. Nde o ummii, o idii ñaagaade neene makko ko ñaamde. O wi': "Neene! A waawaa wadande mi huunde haa mi weltoo so wonaa pewjanaa mi kacitaari."

Yumma oo heɓtii, wi': "Bidngel am! Hay keletinel mburu mi mooftaani. Jamma hanke a ñaami ko heddinoo e ko mooftuno den koo fof. Kono wallitoo muɗal seeda booyataa mi fewjan maa ñaamde. Midoo jogii ɓorte de ngollinoo mi, mi yeeyoya de, mbele mi soodane en heen mburu e gede godde ko kiirti den.

Aladiin wi': "Neene, mooftu ɓorte dee haa ñande wodnde; heɓnam fitirla ngaddu mi kaa, mbele mi yeeya ka, so mi yeeyii ka maa en mbaaw hacitaade heen, ina gasa kirto den heen."

Yumma mum Aladiin bɔadtini fitirla ka, wi': "Fitirla kaa nani, kono eka tunwi; mi sikku so ka soccaama haa ka laabii ko ndeen ka burata wadde coggu e no ka wa'i nih."

O ñedi ndiyam o nokki ceenal daatngal, ngam soccude ka. Fuddaade mo woogde fitirla kaa e tawtoreede bidngel makko, haa jinneyal kulbiniingal, yalti, feeñani mo, ngal wi' e daangal diirngal: "Hol ko njid daa? Midɔ mi e yamiroore maa. Ko mi maccudo maa, hono no ngonir mi maccudo kala jogiido kaa fitirla, miin maccube fitirla kaa e heddiibe bee fof."

Doon tan yumma mum Aladiin naji, ji'de makko ndonkiti ndaarde ngoo yeeso ñagarɔ, hulbiniigo. Ko gila e konngudi jinne gadani kulol jaggi mo o faddii.

Aladiin nde tawnoo yi'no ko wa'i nii gila to ngaska too, hulaani, noon tan o sajjitorii fitirla ka; o ñeny'aaki nii, o wi': "Ko mi keyduɔ, adan am ko ñaam mi."

Jinne oo wirnii, hono hojom o arti, omo roondii lahal kaalis ina wondi e mbedoñ sappo e didoñ. Diin kala ina muura, ina rottaa ñameele belde. Looci jeegom mburu daneeji e butelaaji didi koñnjam mbeldam haa neesti e njardukoñ didoñ kaalis. O joy'ini dum kala haa gasi tawi yumma mum Aladiin suwaa tawo diftude, sabu Alla e yaawde. Aladiin woni e wisde e yeeso makko ndiyam, kono o ronki diftude. Aladiin jokki wisde e makko ndiyam.

Caggal mum hakkille yumma mum Aladiin artii, ronkaa noon anndeede mbele ko uurngol ñameele de jinne oo addi dee diftini mo walla ko goddum; no waynoo fof o diftii. Aladiin wi': "Neene, dum ko hay huunde! Ummo ngaraa, ñaamaa. Maa dum artir hakkille maa, minne dum safrana mi heege am ngee. Hoto ngoppen dii dottaadi beldi haa buuɓta. Ñaamen!"

Kaawis jaggi yumma mum Aladiin, nde o yi' ngal lahal mawngal, dii bedi 12, dii looci 6 mburu, dii butelaaji, koñ njardu koñ didoñ, yantude e banaade ngol uurngol belngol biimtotoongol e dee ñameele.



Yumma makko wi': "Bidngel am; hol to ndee yaajeende ummorii en? Holi ñamludo en ndee moyƴere mawnde? Mbele laamdo leydi ndii ko ko tini baasal men ngal yurmii en?"

Aladiin wi' mo: "Neenoy am. Ñaamen tawo, miin e maa fof eden katojini heen; so en kaljitii maa mi haalane kala heen ko njiddaa humpitaade."

Be ñaami dum e udditaare berde no feewi, tawnoo yumma oo e biddo mum fof meedaa huufde dottaadi baydi nii heewde. Ko be ñaamata koo fof yumma mum Aladiin woni tan ko e yeebde lahal ngal e bedi dii nde tawnoo o yananaaka so tawii ko di kaalis wallo ko di jamndi ngonndi, sabu o woowaani yi'de ko wa'i nih. Gaa hiisa nofore walla njoodndam ko kaawis ndee huunde hesere e maɓbe nde be ngalanaa ganndal kanjo e biyiiko dum jaggi be kaawis.

Aladiin e yumma mum sikkunooɓe ko kacitaari tan kebata, kebii heen hay bottaari; be njoodii kadi ebe ngottoo e weltaare dee ñameeje belde udditanbe be berde maɓbe ko aldaa e kaaddi. Be miijii tawde ede nguli hay so tawii kacitaari e bottaari renndii alaa ko bonnata. Ndeen be ngaynii ñaamde be tawi ko heddii ina waawi wonde ñaamande maɓbe balde didi godde.

Nde be ngayni ñaamde, yummiraado oo itti tebbuuli di be memaani dii joñi bannge; o heñii, o joodii sara biddo o, o wi': "Midɗo heppi haa wonaa seeda nde njeewtanta mi yeewtere podanno daa mi ndee."

Aladiin yeewtani mo kala ko jolnoo hakkunde mum e jinne oo haa gasi hay batte o furgaani. O tuggi tan ko gila nde yumma oo faddii haa nde difti.

Dum jaggi yumma oo kaawis no feewi; no haala biddo mum kaa lelorii nii haa yottii do jinne oo feeñi doo.

Yumma oo wi': "Bidngel am, holi ko paandori daa e jinneeji maa dii noon?"

Sabu miin ko njibinaami fa'de hannde mi meedaani yi'de jinne; mi nanat tan ina haalee. Ina wemmibi mi no oo jinne kaawniido feeñiri e yeeso am! Holi sabaabu omo ara e am, o araani e maa? Sabu aan o feeñaniino ma ko adii hannde e nder ngaska ngalu kaa!"

Aladiin wi': "Neenoy am! Jinne peeñando ma oo wonaa oon feeñannoo mi. Edi nanndi e mawnugol majji, no maleykaaji tan kono di ngonaa gooti to bannge mbaydi e to bornanteeri, kadi di njiidaa halifaabe. So ada siftora, mo nji' mi oo wi' ko maccudo feggere nde boornii mi e fedeendu am ndee. Aan noon mo nji'daa oo wi' ko ji'aado fitirla ka njogidaa e junngo maa kaa. Mi sikkaani so a hebii nande haala jinne oo sabu nde o feeñi tan aan a yan pekkordaa."

Doon tan yummiraado oo wulli, wi': "Eeh bone! Ndeke ko fitirla maa kaa woni sabaabu oo jinne cobdo peeñando mi, woppu maa?" Haa baaboy am, woddinka gite am dee! Wadoy ka kala to njiddaa! Miin kay mi wantaa memtu ka ko heddii heen koo! Hay ko fitirla kaa weddetee walla ka yeeyee buri ko kaa fitirla weftata yimbe, tawde so a memii ka ko bone. So tawii nii ada goondini haala am a seertat hay e ndee feggere. Hoto fof jikkondir e jinneeji, sabu Annabi mon wi' ko be moyyina bonna en."

Aladiin wi': "Neene, so a jabii, mi yeeyataa kaa fitirla, hono no debmi wadde jooni nii. Sabu fitirla kaa maa naftu en no feewi, miin e maa fof. Mbele a yi'aani ko ka addani en jooni koo? Alaa e sago ka wuurna en, ka joogoo en. Ada foti anndude no nganndir mi nii wonaa mehre wadnoo ginnitoriido ko baaba am tokooso tawi wonaa oo, oo bondo mo Alla bonni, fellitani dannaade ngal danngal goddungal. Kalkowal. Oo mo sabaabu mum wonnoo ko hebde kaa fitirla kaawisaaji. Ko kaa fitirla burani mo hay kanjeeji e kaalisaaji gondi toon dii, miin e hoore am di nji'ru mi gite am, tee ko noon ne o wi'runoo mi. Omo anndunoo kaa fitirla nafaore waawaa yawtude dum. Tawde hannde enen ne en nganndii ko kaa fitirla nafata, eden poti huutoraade ka e hakkilantaagal e sutura, tawa hay hoddiiɓe ejataa kaasidoo en. Hadataa maa mi ittu ka mi woddina ka gite maa no mbi'rudaa nii, tawde jinneeji dii ina kulbin maa; mi nawa ka; mi wada ka e mooftal am haa nde haaju am ari heen fof. Mi waawaa kadi weddaade feggere ndee ne, sabu so wonaa kayre a wantaano yi'tude kam. So mi wuuriino ne tawannoo ko seeda heddanii mi e maayde. Dum noon daccu feggere nde heddoo e fedeendu am; mi

wadta heen hakkille am sabu mi anndaa to musibbaaji ummortoo kam, walla nii to ngummorto maa.”

Hakke dallillaaji di Aladiin hokki di e sañaade, yumma oo hebaani hay konngol ko fawti heen. Kono o wi’: “Bidngel am, ada waawi wadde no weldu maa, kono miin hoore am, mi yidaa gollondirde e jinneeji. Mi lawy’ii e deen golle juude am haa laabi cer, mi wontaa beydu heen konngol.”

Ndeen yahii haa kikiide janngo e mum, kedde ñamalleeje jinne oo addunoo hanke dee tawi gasi, no baawo janngo e mum, nde tawnoo Aladiin wonaa cuusdo heege, yetti ñorgo kaalis bitti e forok mum, yahi yeeyoyde. Doon do o yahata, o hawri e Yahuuda gooto, o joñi dum bannge. O holli dum ñorgo ngo, mbele ina sooda. Nde tawnoo oon Yahuuda ne ko gorko ceebdo no feewi, oon yetti ñorgo ngo, o laari ñorgo ngo, o fadaani nii haa o yenanee mbele ñorgo ngo ko kaalis laabdo walla wonaa, o naamndii coggu ñorgo ngoo.

Aladiin, nde tawnoo kañum alaa fof ko anndi e ko jogii koo saka fonnda nafoore do tolnotoo, wi’: “Kala ko njobdaa ina moyyi.”

Hakkille Yahuuda heddii ina awa: so tawii Aladiin ina anndi nafoore ñorgo ngoo. Kono dum fof e wa’de noon o itti haayre kanje nde jaraani hay capande jeedidi e didabal ñorgo kanje ngoo, o weedi Aladiin.

Nde Aladiin yi’ haayre nde tan, heppi ko japtata nde e junngo Yahuuda o mbele yaha laawol mum. Caggal duum Yahuuda oo kañum fof e famdude ko yobi e ñorgo ngoo, nimsiti hay ko totti koo. Bernde mum addani dum ina fotnoo ustikinaade coggu nguu haa bura tellaade. Noon no o dañiri ngartam e ngoo ñorgo fof nii, o yonaaka, o miji hay so les o firinoo coggu, Aladiin jafat. Doon tan hakkille makko addi yoo dog, o abboo Aladiin mbele omo neesta e coggu hee hay so seeda; nde o gaynata mijaade, tawi Aladiin woddoyii e yolnde mum. Hade Aladiin yottoyaade, Aladiin saani e fiyirde mburu, soodi doon mburu e haayre kanje nde, o nawani yumma makko.

Ndeen o yottiima, o itti ko heddinoo e keldi haayre ndee, o totti dum neene makko; oon yahi soodoyi ko ina jogoo be balde. Ko noon be

ngoori, kala nde ɓe cattiraa, Aladiin y'ettat ñorgo yeeyoya haa ɗe timmi ñorde sappo e ɗiɗi. Ko noon kadi ɗe potnoo. Kañje fof Yahuudu oo soodti ɗe e junngo Aladiin.

Ndeen Aladiin firilitii ñorde mum, o yetti mbanndu mo nganndudaa ina fota sowaade ñorgo fof laabi sappo, o anniyii nawande cooddiido makko, kono nde o yeewi, o tawi o waawaa roondaade, o felliti yahde o addoyi oon. Nde o ardi e Yahuuda oo ndee oon, oon yeewi teddeendi mbanndu o, limi doon e doon kaaye sappo o totti mo. Aladiin jabi kaaye ɗee, dogi soodoyi nguura galle. E oon sahaa nde tawnoo Aladiin woowi fooftere no feewi, nattii yahdude e sehilaabe mum ɓe o woownoo fijjude waktu mo hawratno e ñenngotoodo Afriknaajo o. Hanj kadi Aladiin waɗti ko sahaa fof yahde e nokkuuji sehilaabe kam e jeeyirde mbele wellito seeda to bannge jeewte. Nde yahnoo haa kaaye sappo ɗee kuuɓi, o ndaarti fitirla ka, o yetti ka, o woni e ndaarde mbele omo yi'a batte ɗo neene makko memnoo ɗoo haa jinne o feñani ɗum. 'Doon ɗo o ndaarata haa o yi' heen fattere ceenal ngal neene makko soccirtuno fitirla ka, o woogi doon no neene makko waɗnoo nii, tan jinne o feeñirani mo seese, nde tawno o woogiri fitirla ka ko seese. Ko oon jinne feeñannoo neene makko kadi.

O wi'i: "Hol ko njiddaa? No o woowi naamnoraade kala googɗo fitirla ka.

Mido heblii waɗande ma kala ko njiddaa, mi wona maccudo maa no ngonirat mi maccudo kala jogiido fitirla ka e junngo mum; miin noon e maccudo fitirla kaa fof."

Aladiin wi': "Ko mi keyɗudo! Addan am ko ñaam mi."

Yumma mum Aladiin nde tawnoo anndaa ko Aladiin woni e dow mum, o heñii, o yalti, sabu kanke o yiɗaa yi'de jinne o; o suusaa. Nde o arti o tawi jinne oo waɗii ko Aladiin yamirnoo ɗum koo, addii taabal keewngal ñameele jodɗinii.

Caggal nde ɓe ñaami haa ɓe kaari, ko heddii ko ina wona ñaamannde maɓɓe fodde balde ɗiɗi. Nde o anndi ñaamde ndee gasii, o yetti kadi heen ñorgo, o yahi ndaartoyde Yahuuda oo, mbele omo waawa yeeyde ɗum ñorgo ngo, o sooda nguura.

Nde o yahata ndee , o rewi sara yeeyirde mawdo gorko baylo nanaa, kormortenoодо duubi mum, nuundal mum e peewal. Ndeen baylo ndaneeri o yi'ii mo, noddii mo, o bismii mo nder bayla ka. O wi': "Aan bidngel am. Midoo yi' maa laabi keewdi ada rewa doo, tee nde ndewdaa doo fof tawata ko ada jogii hono ko njogidaa koo, ada tiindii to Yahuuda too. So ada arta mi yi'tirtaa ma ko njoginodaa koo. Kono mi haalan maa oo Yahuuda ko puuntoowo, ko kanjo buri kadi Yahuuda'en bee waawde fuuntude. Kala ganndudo mo yidaa hay jikkondirde e makko. Oo goonga mo kaalan maami ko haa wel maa, dum noon so tawii ada jogii ko yeeyetee ada waawi hollude mi. So midoo yidi mi sooda hakke mum timmudo; so tawii mi yidaa mi waddu maa e yeeyoobe be daaynataa ma."

Doon tan, Aladiin sorti ñorgo ngo e wutte mum holli Baylo o. 'Dum fof noon ko e yaakoraade coggu burngu heewde nafaore. Baylo o ndaari ñorgo ngo anndi tigi ñorgo ngo ko kaalis laado cer. Ndeen tan o naamnii Aladiin mbele ko hono dee o woowno yeeyde Yahuuda oo, e hono foti o heewno yeeyde mo.

Aladiin wi' mo: "Mi yeeyii heen sappo e didi; tee gooto heen fof midoo dañatnoo heen mbuudu kanje."

Baylo ronki jaggude hoore mum, wulli: "Oo ko gujjo! 'Bidngel am, ko wadatno kay wadi kono ko heddii heen koo, hoto rutto e oo Yahuuda. So mi haalanii ma ko ngo ñorgo hebata e kaalis e no ngo wa'i moyfude, kadi no nafaore maggo foti e nder jeeyirde amen dee, maa anndu oo Yahuuda fuuntii ma."

Caggal mum Baylo o yetti betirgal, beti ñorgo ngo. O wi', "Aladiin, ñorgo ngo ina jara capande jeedidi e didi mbuudu kanje." O fettii capande jeedidi e didi o yobi doon e doon. O wi', "Ko dum doo woni coggu ñorgo maa ngoo tigi-rigi. So tawi a hoolaaki ada waawi hollude waylube wodbe, so been mbi' ñorgo ngoo burii duum, ngarta mi sowan maa dum laabi didi. Minen ko tafngo ngoo tan min ndaantata heen ko duum noon woni ko Yahuuda burdo nuundude waawaa wafde."

Aladiin hebi heen weltaare no feewi eno Baylo o bismorii dūm nii, haa e no holliri nuundal e ñorgo ngoo nii. Wonti hanjkadi kala nde o addi ñorde makko haa e mbanndu oo fof ko e Baylo o o addanta. Aladiin e neene mum fof nganndii hanjkadi fitirla kaa ko sewnde ngalu nde beebataa, ko noon be nguurdi heen nguurndam gaay-gaay. So wonaa noon sahaa fof Aladiin ina itta heen ko wadiri haajuuji dagiidi e galle o. Ko daam nguurndam ne holliri ngalu be ndaani e ñorde dee kam e mbanndu wondude e gollirde fitirla ka fotii booyde no feewi. Ko noon kadi be nguurdi kitaale e banndi mum ebe kuutoro fitirla ka.

E nder diin dummunnaaji Aladiin seeraano e yahde gila e nder jeeyirde haa e batirde, nokkuuji do yimbe dowrowbe kawrata. E nder deen jeeyirde dowrowe, ina tawee heen mbertateeje, kanjeeji e kaalisaaaji, bagiiji suwaa, fermeyaabe dime e ñaantorde kaalis. Aladiin ina yeewtida e yimbe, ina hedtoo ko haalettee, noon haa o faamani aduna. Ko duum o hebi anndude wonde besnooje jaynotonoo de o fettatno e ngesa ba o rewno nde o addoyta fitirla kaa ndee ngonnoo ko kaaye dime. Caggal mum o yi' yimbe bee ina ngadda kaaye ina njeeya, o tawi hay gooto heen kaaye mum njottaaki kaaye makko e ndimaagu. Ko ndeen tan o anndi o jogii ko ngalu ngu hay gooto anndaa no foti. O salii haalande hay gooto, hay neene makko ne anndaa. Tawi ko ndeen deyƴere wonoyta sabaabu ngalu keewngu ngu o jogori dañoyde.

Meedii wadde ñalawma gooto, Aladiin ina foodtoytunoo koyde mum e nder leegal gootal, tan haa o nani jeeyngal daande dow. Tawi daande gulloowo o wonnoo ko yoo jeeyirde e damude galleeji fof yoo ngudde, sabaabu mum ko bidɗo Laamɗo debbo, hono Badurul- Buduur ina foti yahde lootoyaade. Ngaal jeeyngal findini Aladiin ndeereeru yidde yi'de bidɗo Laamɗo, haa o laaftindoo dūm. Duum kadi wonaa huunde newiinde. Aladiin nde waawata laaftindaade bidɗo Laamɗo oo, ko maa moggitoo e galle hoddiiɓe, hay duum ne ko e cereeli tan o waawata yi'de mo, so tawi omo jogori. Bidɗo Laamɗo oo weeɓaani yi'de, sabu so omo lootoyoo o muurnoto, ndeke noon nji'ki e cereeli ittataa kumpa Aladiin.

Aladiin yetti feere yahde baggo e baafal tarodde do suka debbo oo loototoo doo; ndeen kay no Badurul-Buduur wadi fof o yi'at yeeso mum. Aladiin somaani fadde nii haa bid'do Laamdo oo feeña, o woni e yuurnaade dum e perol jaajngol tawi hay gooto yi'aani mo. Badurul-Buduur yalti ina yaha did'dal sukaaße rewße e worße moraaße ina catii dum. Ndeen yahi haa o faandii ma lootirka ka fotde taaße tati haa nayi, o ñoorti burtungal makko. Aladiin laabtindii mo no yidiri nii. Aladiin meedaani yi'de debbo mo muurnaaki so wonaa neene mum. Oon ne wonaa jooddo mbaadi no feewi tee naywii. E oon sahaa, Aladiin waawaa betde njoodndam, sabu o nanatno tan nde tawno dum alaano e haajuuji makko.

Ndeen o yi' Badurul-Buduur, o anndi ndeke rewße fof wonaa no neene makko nii mba'i. Ko gila doon gilli oo suka debbo kodii bernde makko. Badurul-Buduur fad'di kala debbo naawo mo Alla meedi tagde. Badurul-Buduur ko suka debbo, mo gite butte, jirliyirlinooje, keeldude ina njalba, ndaardi buubdi, curiidi, hinere feewnde haadnde e hakke Alla, hunuko ko wawtaaki, toni di bodewol takam-pooel keewdi jarabi, sabu potgol mum'en. Ko raßbidi e haala njoondam Badurul ina ardi, ñakkaani. Ndeen Aladiin najii, sabu dam njoodndam, haawnaaki.

Badurul -Buduur fof e wa'de noon, ko noon kadi o jogorii darnde timmunde e jimme; so a yi' mo tan, a rokkat mo horma mo o foti hebde o haa timma. Caggal nde Aladiin yi' bid'do Laamdo e lootorde ndee, o wa'i no pad'diido nii; ndeen tan o wi' jaraani ko omo heddo doon e nokku hee, sabu omo anndi, so suka debbo o gayni tan rungtoto mo. Tawde ko noon jonnde makko doon alaa nafaore.

Ndeen Aladiin hootii, ronki suudde ko yi' koo; suka debbo e mbaadi mum uddii hakille makko. Yumma mum Aladiin, yi' bid'do o artii, kono ina yoomi; sabu wonaa nii o woownoo yi'rude Aladiin; kañum ne dum wadi dum ngaanumma. Mijooji kodii dum, sabu wonaa nii bid'do oo

siforinoo. Aladiin kam nana joodii e dow joodorde mum ina deeyi, heddii ina miijo mbaadi biɗɗo Laamɗo ndii, hono Badurul Buduur.

Ndeen Neene makko defii, deftii, ɓatinii, Aladiin huccaani heen e ñaamde hee. Ko doon yumma o siftini mo wonde ko ñaamde ɓadini mo. Doon Aladiin ɗati ɓernde mum, mbele ina yoola sunaare nde. Fof e wa'de noon Aladiin ronki ñaamde no ñaamirtuno nii, sabu miijooji. Aladiin nana ñippi gite e leydi tan ina deyyi alaa ko haalata. Yummiraado oo ne ina jogii faayre e no Aladiin siforii nii, sabu o ronki fof yoo dañ konngol e Aladiin. Ndeen ɓe kiirtiima haa ɓe ngaynii, yummiraado o etii loskude mo, mbele annda ko o wondi, Aladiin haftii yahi leloyii. Oo jamma doyingol alaa. Aladiin waali tan ko yi'de oo suka debbo e mbaadi mum, Badurul Buduur nana yaha ne arta e nder miijooji Aladiin.

Jamma juutɗo weeti, Aladiin fini, foodi joodorde mum ɓadtii neene mum ɗo mottata ɗo. Nde tawnoo uure so wordi fusat, Aladiin ne fellitii yaltude e deyyere mum. Aladiin wi': "Neene, mido haadna doo deyyere am ndee; gila hanke nde ngartu mi nder wuro ndee cikkatno daa ko mi sellaano; mido sellunoo, ko gondunoo mi koo, mi waawaano haalande ma ko tinmi e ɓanndu am. Duum dogojum e am haa doo ɗo ngonden ɓuri hay ñawu bonde. Mi sikkaani so ada anndi nguun ñawu, kono so mi haalanii ma maa anndu.

Leegal men tinaani jamma hanke biɗɗo Laamɗo oo hono Badurul-Buduur yahii ɓuuɓtoyaade caggal kiraade.

O fellitii o haalani yumma oo kala no o wadno haa joofi, o wi' neene: "Ko ɗum wadi mi wa'de no mba'mi nii; mido yidi ɓiy Laamɗo oo gilli tiisɗi, sabu Alla e gilli ɗii heewde doole, mi waawaa haalande ma; tawde majaango fof gilli ɗii ina ɓeydoo e am, faam hannde jayngol gilli woni tan ko e ñaamde mi; tee hannde hay huunde waawaa ñifde ngol so wonaa mi heɓa Badurul-Buduur, oo debbo mo mbaadi mum honi pittaali. Ko duum wadi ko mi pellitto haa tiisi e am ñaagoyaade Laamɗo oo junngo biɗɗo mum, hono Badurul Buduur."



Yummiraado hedtii haala Aladiin no feewi haa yottii do o wi' omo yidi resde Badarul Buduur doo tan, tappondiri juude, hekkiti jaleede. Aladiin yidi jokkitde haala mum, yummiraado tayi konngol e hunuko makko. O wi': "Hee! Bidngel am, hol ko miihoto daa kadi ? So wonaa kaadi njaggu maa, mbele ada suusi haalande mi kaa haala?"

Aladiin wi': "Wallaay neene, mido wondi e hakkille am. Mido wi' ken. Kono mido joottorinoo nande dee ñinooje, wonde ko mi kaangaado, walla nii ko mi bondo nehdi. Anndu kam ko mi piɓdo finnde tiidnde ñaagoyaade laamdo oo biɓdo mum."

Ndeen tan yumma oo wi': "Bidngel am, so tawii tan ko goonga mido foti siftinde ma wonde kaa puɗɗiido faaytude hoore maa; hay so a yidii siinude ko mbi'daa koo, mi anndaa hol fof mo cuusdaa ñaagaade yoo yah yottinanmaa ngal doo nulal." Doon Aladiin hay denngi-dennginaani wi': "Godɗo fof alaa so wonaa aan e hoore maa!" Jaabawol ngol e bettude, yummiraado deny'ii wi': "Miin! Laamdo ! Miin kam, mi suusaa naatnude hoore am e dee gede." O heɓbitii o wi' kadi: "Holi aan, haa ada wonda e peeelaagal miijaade resondirde e biɓdo Laamdo maa ? Mbele aan kam, a yejjitii ko a biɓdo ñootowo burdo wonde miskiino e ñootooɓe fof wonɓe e laamorgo makko, miin neene maa oo ne mi ummaaki e jibinannde burnde nde baaba maa ndee toowde? Maa taw aan a anndaa laamɓe ɓee ina caloo rokkude biɓɓe mum'en yoo ndese hay e biɓɓe laamɓe, hono mum'en, so tawii ɓe nganndii ɓeen biɓɓe laamoytaako no maɓɓe nii ?"

Jeertinaali e hujjaaji di yumma oo rokki dii fof e sellude, Aladiin wi': "Neene! Mido joodtorinoo nande ko kaaldaa koo fof, mido anndinmaa, doo do tolnii mi, alaa fof dey ko mbaawdaa wadde walla haalde ko ina yolbina fiɓnde am piɓmi e Badarul-Buduur ndee. Mbi'maami ko aan tigi nulatmi to Laamdo too; so tawii kay a yidaa mi maaya, ko dum kadi woni ko tiisi."

Yummiraado ndaari Aladiin; o tawi tigi ko Aladiin haalata ko ina woddi e mum, wontani mo tuuba-horde. O faamii hannde Aladiin ko ko fuddii

aayoraade mo. O wi': "Bidngel am, ko mi neene maa, neene maa moyfo, keblaniido wadde kala sago maa ngam korsa. Kono so wontiino tan ko ndaartande ma e nder boomi hoddiiɓe men, kala feere maa en cippir heen haa keɓen. Kono adii won nde ngoɗa hade dewgal kay, yoo taw won ko njogidaa, walla boom won ko ngollataa; yimɓe roofolɓe wa'ɓe no mba'daa nii, hade mum naatde e dewle, poti tawo ko ndaartude golle mbele ndaɗa ko nguurdi e ko nguurniri ko njogori addude koo. Aan a yeewaani jibinannde maa ko lesɗundi. A yeewaani kadi baasal maa ngal haa aɗa foodono biɗɗo laamɗo. Oon mo nganndu ɗaa so yamirii yoo a rugge, hono majannde yitere tawata ko a ɗaatii. Aladiin! Artir jabbere maa! Miin kay mi anndaa fof no ndee feere ardi e maa; hol fof mo kollitat mi ngoo miiɗo? Haa waawa fawde mi kaadi? Mbele miin mo kaalan mi ɗum fof riddataa kam no riddirta rawaandu nii? Ngaanumma e hoore am! Miɗo anndi kay Laamɗo o ina yi'oo; so nedɗo ardi e mum haaju ko wa'ino yooltaneede goonga, so a yaafnii ma ko o jaafotoodo; kono mbele aan aɗa haandi e moyɗere mbi'daa yoo mi ɗaɓɓitoy ndee? Holi fof ko mbaɗataa biɗɗo Laamɗo maa gorko? Holi fof ko mbaɗɗaa e nder leydi maa ko aɗa heɓtiniree? Holi fof no cuusirat mi ɗaabtude gaable am mi huccita e Laamɗo mi ɗaago ɗum yidde maa ndee? Laamɗo e satiiɓe ɗum, nde ɗum waɗi fof, hono hojom ɓe peeca hunuko am koo. Won ko a anndaa, miin ciɗɗatnoodo hay so haaju am darinooma e huunde so miɗo hollita Baaba maa (yoo yi'e mum buuɓ), hannde so wonti ko hakkude am e Laamɗo, maa feere am bon! Won kadi ko a anndaa godɗum: enen en njottotaako laamɗo men tawa en naworaani njeenaari mum, so tawii eden njidɗi ɗaagaade huunde. No njeenaari ndii foti fof ina waɗi nafoore, sabu maa addan joomi mum hedteede. Kono aan hay heɓde ma ko aɗa weltinira mo ina sattirmaa, haalaaka noon huunde fotnde e oo haaju mo ɗaɓɓirten mo. Bidngel am! Wonaa aɗande ma, wonaa salaade, kono njidmi ko yoo a artir hakkille maa, miiɗo ɗaa nganndaa, ngal donngal ina teddir maa, mbi'aa tawde ko noon waawaa laataade wolla wonde, celaa heen cele-weñ-cen!"

Aladiin, caggal nde hedtori haala neene mum kaa e hakkille, miiɗi, miiɗi, wi': "Ko goonga neene. Ko peelelaagal ga banɗe am! Nulde ma

to Laamdo too ko sannju mawdo wonande ma, sabu hulde mi alaa hay feere wootere wadoore haa Laamdo oo bismo maa no haaniri nii. Mi ñaagi maama yaafuya e kala ko jiiɓi hakkille maa. Kono mido wi' maa, woto dum haawe, so a yi' lew lewndu gilli wonndu e huɓɓude e nder bernde am ngol yejjitinii kam wadde peeje de kebru mi ko ina deefna fittandu am nduu, kono mido jarribaa e Badurul-Buduur haa diwti, ko o Alla am nii. Haa jooni Aladiin ko ñiiɓdo e yidde resde mo. Ko dum huunde tiidde e am, nde moomtotaako e hakkille am hee. Jooni kay caggal ko kedtiimi haala maa kaa, mi faamii ko mi anndaano. Ko mbi' daa en njahataa e laamdo juude bole koo ko goonga. Hannde eden njogii ko nawden ko ina fota weltinde Laamdo. Sabu njeenaari lobbiri ndi njogi den ndii. Ko ngaddunoo mi e ñalawma ndadmi e maayde ndee mido sikki maa weltin Laamdo. Mbi'atmi ko ngalu ngonngu e nder bataaji didi dii e ko woni e dadol am koo, duum ko cikkatno den ko weeruui goobaadi, ko mi keɓdo pinal mum to nokkuui yeeyooɓe cudaari too. Mi hebii anndude ko kaaye dime de hay gooto anndaa ko jarata njogi den. Tee dee kaaye alaa fof kaandudo e majje so wonaa Laamɓe. Kaaye de nji'mi to yeeyooɓe too bee fof, alaa fof fotnde e kaaye men dee rimɗude, wonaa hay e mawnugol: kaaye maɓɓe dee fof e maayde eɓe njeeya de cogguui tiidɗi; de men dee kam haala mum haaletaake. Ndeke ko enen ngonno ɓe nanngiraani kaaye men dee no fotiri, nde tawnoo, en ngalanaano de ganndal. Miin kay ko mi anndaa fof, so Laamdo hebii dee kaaye waawata tan ko weltaade. Eden njogii feere ɓakkere laaɓnde do mbaawden wadde de. Yeewen no wa'ata, so en leemii de heen, wootere kala e goobu mum."

Yumma mum Aladiin addi feere ndee, Aladiin itti kaaye dee e bataaji ndee, leemide e feere ndee. Ndeen weetii hakke no de mba'i yoodde nii e mbaadi-mbaalolinde nii, jalbude nii, Aladiin e neene mum fof mba'i no najɓe nii, sabu ɓe nji'atnoo de tan ko e ndaneeri fitirla. Goonga nii Aladiin yi'no kaaye dee, wootere heen ina woni e lekki mum no ɓesnooje ni, kono nde wonnoo oon sahaa ko o suka, o jaggirnoo kaaye dee tan kono cudaari fuunti -funeere nii.

Caggal duum, Aladiin wi': "Neene, jooni dey kam wonaa rafi ko njottori daa Laamdo woni ngoŋa maa; sabu mido yananaa ndii njeenaari maa won sabaabu Laamdo bismo maa e teddungal."

Yummiraado oo fof e waasde goonjinde ko bidɗo o haalata koo, anndii kay kaay'e dee ina mbaawi yottinde dum Laamdo oo. Kono fof e wa'de noon, bernde roŋkii yoo deey'. Yumma o wi': "Bidngel am; sikke alaa maa njeenaari ndii kam won sabaabu, haa Laamdo oo laara mi, laarannde moyƴere, kono ko yottinde nulal maa ngal wonata pette, sabu mi anndaa, so maa mi heɓan dum cuusal. Ndeen noon nduun yahdu alaa nafaore, sabu mido huli hay njeenaari ndi mbi'daa hono mum alaa ndii hade men waasde dum noon kadi mi arta mido sooyi; nji'aa mi, kadi goddol maa taƴa. Miin kay mido joodtorii gootal e dee gede. Mido hula kadi hade Laamdo hoynude mi, riddira mi no kaangaado nii, walla naata fitina mawdo tawa fitina oo doyƴotoo ko e dow men."

Yumma mum Aladiin jantii gede godde keewde, mbele duum fof Aladiin ina yahra caggal e feere mum ndee, kono gidli Aladiin jogii e Badurul-Buduur, hakke Alla e mum'en yottaade kaagtudi, o roŋki waklude hakkille Aladiin. Aladiin ko ɗatdo. O wi' yumma oo, "Neene, yah darano haaju am oo. Walla noon kala musiiba keɓtiido mi ko aan roondii sabaabu."

Ndeen kaan haala sadtii, yumma oo felliti yottinoyde nulal Aladiin ngal. Oon waktu tawi ko yahde galle Laamdo oo gantinii; yummiraado o felliti yahde no janngo mum. Yummiraado o wi': "Ada anndi so mi yottiima, Laamdo jaɓɓimaa mi, ko adii fof maa o naamndo ko njogi den e ngalu ko duum fof o idirto; ndeen noon holi ko njaabotoo mi?"

Aladiin nde tawnoo ko haaju mum oo tan yi'ata. O wi': "Neenooy, woto hulat! E kala ko ina wona. Aan kay yoo hakkillaaɗi men ngon e hol no Laamdo bismorto maa. Ko heddii koo tiidaani; jaabawol mum heɓoto, sabu mido felliti kaa fitirla ngonka e addande en nguura dee kitaale kala roŋkata humtande mi oo haaju."

Ndeen Yummiraado o nani kaa haala , ronki ko jaabii. O miiiji e hoore makko e ko biidfo o haali koo, o faami kaa fitirla ina waawi addude kawisaaji burdi gaddugol nguura. Caggal nde miijo makko benndi e baawde fitirla ka, o jogii coftal, o seerti e kulol ngol o joginoo e ñaagonoyaade biyiiko, Badarul-Buduur biy Laamdo oo.

Caggal duum, Aladiin wi': "Neene, ada siftora kam huunde nde pot daa reende tan ko sirilu men oo. Ko e sirilu men hee tan, kumtugol haajuuji men fawii." Lelnde yontii. Aladiin e neene mum baynondirii. Gidli tiisdi e ebbooji kam e njoorto ngaluuji jaajdi di Aladiin jogii e Badarul-Buduur, kadii Aladiin renndinde yitere. Nde tawnoo mo daanaaki finataa hafto tan; Aladiin ummii gila e joggaali ngori gadani, o raanani yummiraado oo. Ndeen o yottiima, o wi': "Neene! Ummo boorno comci maa njaha, mbele ada yottoo law damal galle Laamdo waktu nde mawdo jaagorde kam e jaagorde e jaambareebe leydi mawbe bee ngarata ndee. Nde tawnoo ko oon waktu e hoore mum, Laamdo e hoore mum tawetee doon."

Yummiraado oo ne wadiri no Aladiin yidirnoo nii kala. Yumma yettii feere wadnde kaaye dime dee, wadii dum e bagiiji didi laabdi. Heen gooto ko koydo, goddo oo ko tekkudo seeda. O renndini cebe dee, o habbi, o weelnii, o yahi omo weltii e biyiiko haa ko doon waawi haadde. Yottaade mo e hawrude mo gila e mawdo jaagorde oo haa e jaagorde keddiide dee, yimbe moyyube sato Laamdo oo, kambe fof be kawriti do damal galle Laamdo doo.

Jamaanu jogiibe soklaaji e ngal pottital noon ina keewi no feewi. Nokku oo ko boleeru yoodndu, yaajndu, lugguru. Ndu damal jaajngal ngardungal.

Ndeen yumma mum Aladiin naatii, o wadi feere haa o huccundiri e Laamdo oo wondude e mawdo jaagorde oo kam e yimbe mawbe satiibe Laamdo bee kala, to banje ñaamo e to nano.

Nde waktu oo yonti, yimbe bee ngoni e noddireede gooto gooto. Neddo kala e haaju mum. Haajuuji kuccana, ñaawooje naatanaa haa waktu

joodnde nde Laamdo oo e hoore mum tawetee ndee yonti, o yaafii yimbe, o fa'ti to nokku makko keeriido oo. Mawdo jaagorde o rewi e makko, jaagorde godde e yimbe toowbe heddiibe bee kooti. Kala arnoobe kooti, bee heen njahii ina mbeltii, sabu libde be ñaawdunoo, wodbe ina cunii e ñaawoore yannde e mum'en, heddiibe ina miijo ko mum'en e balde garooje. Ndeen yumma mum Aladiin yi' yimbe bee ina njaha, kadi Laamdo e hoore mum naattii, o sikki gasii Laamdo oo artataa, o fa'ti galle mabbe. Aladiin nde tawnoo ko daminiido, jonnde alanaa dum saka noon ngondi. Nde o sooyi Yumma makko ina ara ina weelnii njeenaari ndi nawornoo, o ronki anndunde holi ko neene makko foti artirde to Laamdo too.

Ndeen yumma oo yottiima, Aladiin ronki gaaftude hunuko mum naamndoo ko neene mum artiri, sabu makko hulde, mbele wonaa kabaaru burdo bonde oon artiri. Yummiraado oo nde tawnoo meedaani naatde galle Laamdo, saka anndude ko wadetee toon wi'i bidde mum e dii konngudi mbele ina itta dum e muumre.

“Bidngel am, mi yi' Laamdo; mido yananaa ne Laamdo yi'ii kam. Njoodinoo mi ko yeeso makko tee hay gooto bilaaki hakkunde amen; kono no yimbe bee cokliri mo nii, bee banje ñaamo, bee banje nano ina burti no feewi haa miin e hoore am mido yi'a maale tampere e yeeso makko. Mido sikki nii nde yahnoo haa juuti ko haabre itti mo doon, o naatoyi, o woppi doon yimbe yidnoobe yottinde haajuuji mum'en. Miin hoore am tawi ko mi fudfdii ma haabde, sabu tawi ko mi tampii no feewi, darnde ndee juutii; kono yoo hakkille maa deey' hay dara bonaani e haaju men oo. Mi waasataa ruttaade toon janngo haawnaaki haajuuji Laamdo oo heewrataa noon fof.”

Gidli Aladiin fof doolnude e Badarul-Buduur, hadaani Aladiin yondinaade e yeewtere neene mum artiri ndee. O wallitorii muñal. O hebii weltaare mawnde e nande neene makko huccondirii e Laamdo, dum woni neene makko wadii taabal gadanal. Dum hokkii mo njoorto maa neene makko waaw wadde feere no darorii yeeso laamdo o yottina haaju makko oo. Ndeen yahii haa weetii neene makko roy'i no wadnoo

hanƙi nii. Kono ngol laawol feewaani sabu nde o yottii, o tawi ko damal batirde ndee ko ko uddii. O anndinaa batuuji ɗii cownat, kono yo o artu jango. Ndeen o yahi, o habri Aladiin. Aladiin jokki e muɗal wonnoo ngal. Noon woori haa yummiraado ruttii toon hakke laabi jeegom. Laawol heen fof ne omo yaha haa o joodo yeeso laamdo kono hebataa teeldude e mum haa o waawa yottinde haaju makko. Ko noon ne jogornoo woorude; yah ngarta laabi teemedere tawa o yottinaani haaju makko. Kono ko Alla feewni feewat. Ko o arata koo fof laamdo ina wadti e makko yitere.

Laamdo oo noon heewi joodaade tan ko e wullittoobe, kono kanƙo o jeyaaka e been. Ko ɗande heen nde Laamdo ummii e batu fa'ti to nokku too yamiri mawdo jaagorde oo, wi': "Debbo gooto ina ara doo kala nde njogi den batu, omo jogii ko wa'no huunde soomaande e bagi nii, o darotonoo ko yeeso am haa batu fusa, mbele ada anndi ko o ndaartata?"

Mawdo jaagoorde oo e humpeede kabaaru debbo o, deyɗiri noon haa booyi, o wi': "Aan laamdo mawdo, ada anndi rewbe kay kabaaru mum en fof ko goytaali ɗi ngalaa faayiida tan heewi addude dum'en. Ko nganndu mi tan oo debbo foti addude dum ko gede ɗiɗi: maa wonii ko o gardo wullitaade do maa doo, ko ina yeeya conndi ndi moyɗaani walla gede bolle puuyde godde."

Ngool jaabawol ronƙi yonde laamdo oo. Doon Laamdo wi': "Ngol so debbo oo arti, hoto yejjit noddude mo mbele eden nana koo haali." Caggal nde laamdo gayni haalde mawdo jaagorde o buuccii junngo mum fawi e hoore, hollirde ko dooftiido yamiroore Laamdo oo. Yumma mum Aladiin e woowde daraade e yeeso laamdo, yejjitii tampere yah ngartaa oo sabu ko pellitdo daraade e kala haaju Aladiin holliti. O finii, o dawani galle laamdo no woowi wadde nii. Yottaade mo, tawi batu joodiima. Hade mawdo jaagorde habrude, tawi Laamdo sooyniima yumma mum Aladiin. Doon njurum makko jippii e yumma mum Aladiin. O wi' mawdo jaagorde oo: "Hade maa yejjitde debbo mo

mbi'no maa mi oo nana. Noddu mo ko adii nde noddata goddo, adoo haalde kedof den ko o wi'ata."

Doon e doon hooreejo jaagorde oo holli mawdo ñaawooɓe oo debbo oo; tawi nii oon ko kebinoodo yamirde debbo oo yo naat, sabu o yi'i e mum dooftaare sabu muñal mum. Mawdo ñaawooɓe oo dofti mo haa to jappeere laamdo too, woppi mo toon, fa'ti to sara mawɓe jaagorde to. Yumma mum Aladiin, nde wonnoo ko goowdo yi'de no yimɓe ɓe goowiri wadde so ina kaalda e Laamdo oo, o horfinii e leydi, o sujji e mbertateeri jappeere ndee; o woori noon haa Laamdo oo yamiri yoo o ummo, o ummii.

Caggal duum, Laamdo wi': "Aan debbo moyɓo, mido yi'maa ada tawtooree batuuji, gila fuddorde haa wortorde; hol ko woni haaju maa?" Yumma mum Aladiin sujji laawol dimmol kadi caggal nde o nani ko Laamdo haali koo. Ndeen o ummiima, o wi': "Yaa aan Laamdo! Laamdo winndere, hade am saaktude haaju am kaawniido mo sikkotaako, miiɗotaako gaddudo mi e yeeso jappeere maa toownde ndee, mido ñaagoo nde njaafoto daa mi e peeɓelaagal am walla cuusngaccaagu am e hollitde ma kabaaru mo ngaddu mi e yeeso maa oo. Hakke ko ñaagotoo mi koo e haawnaade e hulɓinaade mido gergerta jaangol gacce." Nde o gayni haalde, Laamdo ñaagii yimɓe ɓee fof yoo njaltu haa heddo mawdo jaagorde oo, mbele yumma mum Aladiin ina ɓura wellitaade. Nde yahnoo haa jamaanu oo yalti, Laamdo o wi': "Debbo moyɓo! Jooni ada waawi haalde haaju maa no weldu maa, ko aldaa e kulol."

Yumma mum Aladiin nanii ko Laamdo oo haali koo fof; dum fof dey e wa'de noon yumma mum Aladiin ronkii hoolaade wellitaare nde Laamdo rokki dum ndee; sabu hulde haaju mo jogii hade addande dum kataa, omo miiɗo haa jooni hol fof no mobortoo gacce de o sooyinii so o yottinii oo haaju mo Laamdo joodtoraaki nande. Yumma mum Aladiin jokki e ñaagaade, wi': "Yaa aan Laamdo joom semmbe, mbele mido waawi ñaagaade yoo a rokku am hoolaare wonde a wadataa kam hay huunde



so tawii ko njogor mi haalde ko wa’ii e maa no yawaare walla bonneedaagal? ”

Laamdo wi’: “Aan debbo moy’yo! Mi yaafimaama gila jooni kala ko njogor daa haaloyde, etee haal ko njid daa, kaaldaa no weldu maa.”

Nde o hedii jaabawol Laamdo, o felliti fillanaade Laamdo haaju makko. O tuggi tan ko gila do bidngel makko Aladiin yi’ Badarul-Buduur, haa gidli cadtudi kodii dum, haa no diin gidli kaandiniri Aladiin haa ronkiti jonnde e darnde, haa yottii e no Aladiin haabborii tan ko maa kanke neeniraado oo, ko maa o daroo yeeso Laamdo oo, o ñaago Badarul-Buduur mbele o resa dum, kanke o laato esiraado; o holliti hay no habiri e Aladiin mbele riiwta ngoon miijo e hakkille mum, sabu anndude doole maabe e martaba hebaani do ebe ndesondira e Laambe maabe.

Nde o gayni, o wi’: “Laamdo mawdo! Ko nii dey wa’i; njaafodaa mi, njaafodaa bidngel am ngel, haala fof noon mi haalii ngam o woppa ngoo miijo kono o salii; so tawii a yi’ mi arii haa doo ko kanke e peeelaagal makko; kono miin hoore am mido anndi mi alaa martaba ngaal esiraagal, kono tawde tan o yahdanaama haa o wi’ ina jarani mo wartaade so o hebaani Badarul-Buduur.”

Laamdo oo hedtii ko debbo oo jantii koo fof hedtorii hakkille, ñirbinaani heen yeeso haa holliri mette walla koyeere walla nii yidde seyfitde dabbaande ndee. Kono hade makko jaabaade, o naamndii hol ko debbo oo addori nde tawnoo o yi’ debbo oo ina jogii ko sooma e bagi. Doon tan debbo oo addoyi feere nde o addornoo omo wadi to les jappeere Laamdo too, nde o sujjanatnoo Laamdo oo ndee. O muurti feere ndee, o holli Laamdo oo kaaye dee.

Ndeen Laamdo oo yi’i dee kaaye dime, joodde, ñilkooje, butte de o meedaani yi’de hono mum’en, hay gooto waawaa jantaade mbellamma mbo Laamdo oo jogii e hoore mum. Laamdo deeyii ko juuti. Mijooji nana pilpiltondira e hakkille Laamdo. Ndeen yahii haa hakkille oo deeytii, Laamdo jabi njeenaari ndii e juude debbo oo, o weltii haa o

ronki jaggude mbellamma, o wulli: “Ah dum yoodii! Kooni ko dum aabi!”

Ndeen o gaynii yeeɓde kaaye dee, o teɓɓii de mbele o annda wootere fof ko jarata, o hucciti e mawɗo jaagorde makko dee, o holli dum feere ndee, o wi’: “Yeew, njaɓaa no njaɓir mi nii, ko hay gooto waawaa yi’de e aduna hee, ko ɓuri doo yoodde e timmude.”

Mawɗo jaagorde oo ne jarribaa no feewi e ndii njeenaari. Laamɗo wi’: “Anne! Holi ko mbi’ɗaa e ndii njeenaari? Mbele ndii njeenaari, haandaani e ɓiɗɗo am oo, haa mi waawa rokkude junngo gadduɗo ndi oo?”

Diin haalulaaji laawii mawɗo jaagorde oo; nde tawno won fodoore Laamɗo fodnoo. Woodii nde Laamɗo fodnoo maa rokku ɓiɗɗo mum debbo oo suka gorko mo mawɗo jaagorde oo nehnoo. ‘Dum wontani mawɗo jaagorde oo sunaare, sabu omo anndi weltaare Laamɗo jogii e njeenaari ndii, ina waawi waylude miiɗo Laamɗo, fodoore adannde ndee firtoo.

Doon mawɗo jaagorde oo tukkii e nofru Laamɗo oo, ñummbii wi’: “Hay gooto kay waawaa yeddude wonde njeenaari ndii ina haandi e Badarul-Buduur, kono njidnoo mi ko mbele aɗa rokka mi hay so lebbi tati, mbele mi annda ɗo keedtir mi. Jooni fa’de ndeen ina gasa ɓiɗɗo am oo ɗañii njeenaari ɓurndi njeenaari Aladiin ndii, tawa hay aan tawo, a meedaa yi’de hono mayri.”

Laamɗo fof yenaneede, ɓiy jaagorde mum, sammat dow e les hebaani hono njeenaari ndii, jaɓani mawɗo jaagorde oo ñaagunde mum.

Caggal duum, o hucciti e yumma mum Aladiin, o wi’: “Debbo tedduɗo aɗa waawi hootde kabraa ɓiɗɗo maa oo mi jaɓii ko o haali koo; kono mi waawaa teenjinde dokkal ngal, doon ɗo mi heblaani ɓiɗɗo am Badarul-Buduur. Heblaade mo ina naamndii lebbi tati; so ndeen yontii, ngartaa.” Yumma mum Aladiin ɗañi weltaare mawnde, sabu ɗaɗde ko sikkaano. O sikkaano omo waawa yi’dude e Laamɗo, jooni o ɗañii hay ko o ndaartannoo koo . Omo waawno hay sooyde, wontana mo gacce, kono ko jam tan. O jaggi laawol o hooti.

Nde o yottii, gede dīdī ngaddani Aladiin faamde wonde yumma mum addi ko kabaaru belḁo: heen gedal ko artude mo law, gedal dīmmal ngal ko yeeso makko ina laabi, ina jalba weltaare.

Aladiin wi': "Ooy neene! Mi ḁaminto ne! Walla mi maaydat e sontaare kadi?"

Ndeen o muurttiima, o joodiima, o wi': «'Bīḁngel hade mi sukkude foofaago maa, mido wi' maa yoo a welto.» Yummiraado jokki e habrude gila no yottorii Laamḁo, nehdi e peeje mum haa e tolno (qiima) njeenaari ndii e heewde semmbe; kulol ngol o jogino hade oon waylude hakkille Laamḁo, bonna haaju makko oo, haa teenti nde mawḁo jaagorde o tukkii e nofru Laamḁo oo ndee woodi ko o ñummbanii ḁum hade am heḁde jaabawol Laamḁo.

Aladiin weltii haa no feewi e oo kabaaru lobbo mo o heppannoo nande. O heddii omo ñaagonoo yummiraado oo e tampere yah ngartaa mo o fawi ḁum fof, mbele omo heḁa sago makko. Aladiin heddoraama miiḁo no heḁrata feccere fittaandu mum nduu. Lebbi tati ne keewri Aladiin kono omo muñi, ngam ḁaminaade konngol Laamḁo ngol firtotaako, ḁum noon yaawii, leelii fof ko ko arata.

Fof e wa'de noon, Aladiin alaa e mum heppude dewgal mum e Badarul-Buduur heddii ko waktu fof bennuḁo e ñalawmaaji bennooji. Nde yahi haa timmi lebbi dīdī yumma ndarti no huḁḁiri fitirla ka ronki heḁde nebam kuḁḁir ḁam tawi gasii e galle hee. O yalti ndaartoyde nder wuro. Nde o yahi haa to nder wuro too, o tawi ko wuro ngoo fof ina diira mbellamma. Jeeyirḁe potnoode uddude law fof o tawi ko ina udditii, ina ñaantaa gila e piindi haa e berfetti haa e ñilkonilkooji godḁi. Gooto fof ina hollira gila e baawka mum, ñeeñal haa e coftal. Gooto fof ina hollira weltaare mum ḁo tolnii. Laabi ḁii fof uddii yimḁe alla e keewal gila noon e konuyaḁkooḁe joom keḁtinirḁe, ina mbadḁii dimaadi ina ciḁkaa haa ḁardi, haa e yimḁe taamakuruyaḁkooḁe, ḁee ina catii ḁi, ḁee ina mbada yah ngartaa. Yumma mum Aladiin naamndii jeeyoowo gooto, ko woni sabaabu dillere ndee.

Oon wi': "Ih jam! Debbo moyŷo; hoto ngonno daa? Mbele a anndaa ko hannde biy mawdo jaagorde oo resata biy Laamdo oo hono Badarul-Buduur?"

Dum ne jooni jooni o haljita buuftaade; bee konuyanŷkoobe toowbe nawa mo galle Laamdo too sabu ko toon lenngi dii mbaadata."

Yumma mum Aladiin naniraani oo kabaaru jam, o dogi o hooti, o yottii omo fekkori; o tawi doon biyiiko jogordo nande kabaaru mo joodtoraaki. O wi': "Bidngel am, gede maa fof mbonii! Njowitino daa ko e fodoore Laamdo ndee ndeke laataaki."

Aladiin wi' mo: "Neene, hol e gede de Laamdo si'nataa fodoore mum? Holi no nganndir daa duum?"

Yumma oo fillanii mo no dum yahrinii fof. Ndeen Aladiin nanii oon kabaaru, tan o dooyi, o yoorti no mo jamngel yiwoonde yani e mum nii. Mo dum hebtii fof ko noon wa'ata; sabu kiram cuudidam hadi mo booyde e kaan ngonka. O siftori doon e doon fitirla ka, kaa fitirla ka nganndu daa ko nafoore makko mawnde. O dukaani, o yattaaki wonaa Laamdo oo, wonaa mawdo jaagorde oo wonaa biddo mum.

O wi' yumma makko: "Neene! Hannde biddo jaagorde oo weltortaako no sikkirta nii. Njid mi ko keblanaa en ko hiraande, miin mido ga nder suudu am too."

Yummiraado oo faamii wonde Aladiin woni ko e yeewde so tawii fitirla kaa ina waawa hadde dewgal ngal yottaade haa lelnde. Ndeen Aladiin naatii suudu mum, o yetti fitirla ka, o woogi ka do o woogannooka doo. Doon e doon jinne oo laaftii yeeso makko wi': Holi ko njiddaa? Mido heblii wonde maccudo maa, no keblorii mi wonde maccudo kala jogiido kaa fitirla, miin e maccube fitirla kaa fof."

Aladiin wi': "Ee hey maa! Hedto. Haa doo, nde cokolunoo mi kala a addanii kam naamde, jooni noon ko haaju goddo. Mi neliino yoo mi rokke biddo Laamdo hono Badarul-Buduur mi resa dum. Laamdo yahiino haa fodani mi; o naagii yoo mi muño fotde lebbi tati. Jooni noon, o huurnaani fodoore makko ndee; jamma hannde suka debbo oo, ko ko hurtoyto, ina hokkee biddo mawdo jaagorde oo; sikke alaa heen.

Jooni njid mi ko so kambe yombaybe dido bee be leliima ndoondodaa be kam be e leeso mabbe fof ngaddaa be do am doo.”

Jinne o wi’: “Kaliifa am! Maa mi wad ko mbi’daa koo. Ada jogii haaju goddo mo ada yamira mi?”

Aladiin wi’i: “Jooni ko dum tan woni haaju am burdo daraade.”

Jinne o wirnii.

Aladiin yalti woni e hirtodaade e yumma mum e wellitaare. Ndeen be ngaynii hirtaade, be ngoni e yeewtude ko fa’ti e dewgal ngal. O anndini yumma makko dewgal ngal ko huunde nattude wadde mo sokla. O ummii, o fa’i suudu makko mbele yummiraado oo ina waawa daanaade. Kanke o daanaaki sabu omo fadi haa jinne oo golla yamiroore o rokkunoo yoo wad. E oon dummunna noon gede kurtungu nguu fof tawi peewnaama to galle Laamdo too; yimbe mbelnii. Nde yahi haa huunde fof timmi mawdo moraafe wonndude e biddo Laamdo o; ndeen baay’ii biddo mawdo jaagorde oo, oon sortii. Konuyanke kebtinaano oo naatni mo to hordorde Badarul–buduur joom suudu makko. Ebe naata suudu, haa o yottoyii to leeso njommbaawu too. O adii lelaade. Caggal duum, debbo Laamdo oo ne ari ina ardi e sete rewbe wodbe e wonndude rewbe, wonndube e biddo Laamdo oo. O nawi jombaajo oo suudu mum. Omo salsalna no yombaybe mabba ngoowi wadirde nii. Debbo Laamdo oo, walli mo booraade, lelni e leeso, alaa e sago, caggal duum o jabbii mo, o naaganii mo jamma moy’o. O yalti kanke e rewbe bee; ko kanke wattindii yaltude, o uddi damal suudu.

Jinne oo ina heppannoo ko yottotoo mbele ina si’na yamiroore Aladiin ndee.

Ko adii nde gorko ina wi’a ina mooyta joom suudu mum, tawi jinne roondiima leeso e yombaybe fof fukkoyii to suudu Aladiin. Kaawis mawdo jaggi be.

Aladiin kam nde tawnoo ina joodtorino dum hay sunaare wootere alanaa dum e yi’de biddo mawdo jaagorde ina lelii sara Badarul –Buduur.

Aladiin wi’ jinne oo: “Yettu oo jommbaajo gorko cokoyaa dum suudu nanngam, ngartaa subaka janngo, caggal pudal naange. Ko doon tan

jinne oo diftii gorko biɗɗo jaagorde o, alaa fof ko oon boornino so wonaa simis, o nawi mo to nokku to Aladiin yamirnoo mo too. Ndeen o yottinii mo, o wutti e makko henndu, haa weeti o dillaani.

No Aladiin wa'i jarribeede e Badarul-Buduur nii fof, o juutnaani haala hakkunde maɓɓe. Ndeen yahii hedditii kambe diɗo, Aladiin wi': "Woto hul ɗoo hay dara, aan biɗɗo Laamɗo, jokkollo. ɗoo ko e nokku kisal ngondaa. Miin fof e yidde ma, sabu njoodndam maa e jarabi mo njogii mi e maa. Mi yawtataa keeri ndimaagu etee mi yaɓɓataa hurum mawɗo mo potmi joganaade ma oo. So a yi'i miɗo ittee e sago am haa mi wada nii wonaa e yawaade ma, ko ngam haɗde mo poodondirat mi oo, feewnitaade e maa, ngam baaba maa luutndiima fodoore rokkunoo mi ndee."

Badarul-Buduur nde tawnoo alaa fof ko anndi e ko Aladiin haalata koo, wadtaani heen hakkille; nde tawnoo ndeen fodoore baaba mum yottinaani ɗum. Ko ɗuum wadi alaa ko o waawi jaabaade e ko Aladiin yeewtata koo. Ko wonaa ɗuum kadi kulol e kaawis mo o wondi oo, ina jeyaa e ko haɗi Aladiin hebde e makko konngol. Aladiin heddaaki e kaan ngonka: o boorii, o lelii e leinde biɗɗo jaagorde fotnoo lelaade ndee oon jamma. O runtii Badarul-Buduur omo fali hakkunde maɓɓe silaama, hollude so o huuñtii ndimaagu suka debbo oo o foti ko wareede. Weltaare Aladiin yonii e haɗde mi mawɗo jaagorde oo mbellamma e oo jamma. Ko ɗuum wadi o ɗaanii ɗoyngol belngol oo ɗoo jamma. Kono suka debbo oo, hono Badarul-Buduur hebaani ɗaanaade haa weeti, sabu gila o jibinaa o meedaani ɗaɗde jamma burɗo oo jamma medtude.

Ko jamma Badarul medti koo fof, so en njidii mbi'en jamma mo biɗɗo mawɗo jaagorde oo waali oo buri medtude e haabnaade.

Ndeen yahii haa weeti, Aladiin somaani woogde fitirla kaa nii, jinne oo ar tan e no o wi'runo ɗum nii, o tawi ko Aladiin ina boorno comci mum; o wi': "Aladiin! Mi ari. Hol ko woni yamiroore maa nde potmi wadde?"

Aladiin wi' jinne oo: "Yah addoy biɗɗo jaagorde oo e nokku ɗo mbaɗno ɗaa mo oo, pawaa mo e leeso, nawtaa mo to galle Laamɗo too, lelɗaa mo to suudu ittuno ɗaa mo nduu."

Jinne oo yahi yettoyi mo. O yettii leeso ngo biɗɗo mawɗo jaagorde e Badarul-Buduur fof o wadti ɗum'en to o ittunoo ɗum'en too. Duum fof wadii alaa e maɓɓe fof ji'ɗo jinne oo, saka eja maale mum. So wonaa duum hay no jinne oo wa'i bonde ɗari nii tan, ina waawi warde ɓe kulol.

Hay haala hakkunde Aladiin e jinne oo ɓe ejaani, alaa ko ɓe tinata so wonaa no leeso ngoo yerbirta nii, yahde ɓe e artude ɓe; ɗum kay yonii kulol. Jinne, jodɗinde ɗum leeso ngoo, Laamɗo oo ina yottoo; tawi ina ari yeewde no biɗɗo mum waaldi e jamma mum njommbawu gadano. Ko salminde e duwanaade biɗɗo makko ñalawma moyɓo. Biɗɗo mawɗo jaagorde oo, nde tawno waali ko e buubol, tawi ko ɗoggaado jaangol, nde nani damal ina dilla, dogi naatti e comci mum ɗi boornino hanke mum ɗii. Ndeen Laamɗo oo naati fa'i e biɗɗo mum; o buuccii hakkunde gite biɗɗo oo ɗiɗi, no ɓe ngoowi wadinde nii. O salmini mo, o naamndii mo no o waaldi. Kono ndeen o yeewii mo no moyɓi o yi'aani e makko maale fof kollooje mo mbelamma e yeeso biɗɗo oo, wonaa puungol yiyyam e yeeso wonaa maande wotnde fof.

Biɗɗo dillaani daalaani, sabu kulol e kaawis jaggungol ɗum ngol. Suka debbo werlii mo ndaarki suno e mette. Laamɗo werlii mo kadi konngol duum fof suka debbo oo jaabaaki. Laamɗo yahi ina sikkitii yoo taw wonaa gacce tan biɗɗo mum wondi. Doon o yahi to yumma mum suka debbo too, o sifanii ɗum no o tawri e no o wadde e biɗɗo maɓɓe debbo. Ndeen yummiraado nanii ko Laamɗo oo sifii koo, o wi' ɗum fotaani wadde nganumma e hoore maa; ngam alaa jommbajo mo gacce njaggataa, caggal jamma mo wirnodaa oo haa weetii. Ndaar maa taw wonaa nii o jokkirta e nder balde ɗiɗi haa tati. Miin e hoore am maa mi yah toon jooni. Maa haawu am so tawi o wadii kam no o wad maa nii. Caggal mum debbo Laamɗo boornii comci mum fa'i to biyum debbo.

Nde o yotti, ko kan̄ko nii ɓuri dañde ko o joottoraaki. O tawi nii ko suka oo ummaaki tawo. O ɓuuccii mo, kono o haawaa no feewi; ɓidɗo oo jaabaaki mo; bone gasaani, sabu nde o ndaari mo tan, deey're ndee, sunaare ndee e mba'di ndii fof holliri won ko njoltani Badarul-Buduur. Yumma makko wi': "Bidngel am, hol ko wadi a hollirtaa weltaare maa e ko min ɓuuccoto maa koo? Mbele ina yoodi mbaɗɗaa nii hay e neene maa? Cikkataa maa taw ko mi waawaa faamde gede baawde heɓtaade nedɗo e ko wa'i nii? Midɗo sikki a wonndataa e ngoon miiɗo, so won ko joltan maa, haalan am gila law, mbele ɗum ittami e oo ngaanumma mawɗo."

Doon tan Badarul-Baduuri yekkitii yekkitaare mawnde, o felliti yaltude e deyyere makko ndee. "Eeh neenoy am! Tedduɗo am, yaafo mi, so mi ɗakkinii teddungal pot mi wadande on ngal. Hakille am ko ko diwi; ina jiiɓii haa diwti, sabu kaawisaaji ɗi'mi e oo jamma ɗii. Haa ɗoo ɗo ngon mi kaawis ina jaggi mi, mi anndaa ko ngon mi tawo."

O sifanii yummiraado oo gede ɗee fof no njahri, gila ɗo o ittaa e galle baaba he kan̄ko e joom galle makko, haa ɗo ɓe nawaa e suudu Aladiin fakkundu nduu, ɗo gorko ittaa sara makko haa ɗo ɓe ngartiraa galle baaba, fof e nder majaango yitere.

"Dum gasaani wadde haa baaba am ari. Hakkee alaa e sunaare e mette e ɓitteede fittaandu mi ronku hay ruttude mo salminaandu hay gootol. Midɗo sikki noon o mettintaa heen, haa o yi'ra ɗum no waasde mi weltaade e teddungal ngal o wadani mi ngal. Maa o yaafoo mi so o faamii mette am e musiiba garando mi oo, eno mba'mi yurminaade nii haa jooni."

Debbo Laamɗo o hedtii ko ɓidɗo oo haali koo no moyyi, kono ronki goonɗinde. O wi': "A wadii ko moyyi nde a haalanaani baaba maa kaa haala. Woto haalan hay gooto so wonaa ɗuum wi'ete ko a haangaama." Bidɗo oo heɓɓitii, wi': "Neene, midɗo anndin maa hay huunde hebaani mi. Ko goonga ɓolo kaalan maa mi. So tawii kadi a yeditii ma ada waawi naamndaade joom galle am, maa yi' ko hono ɗum o haalantu maa. Maa mi naamndoyo mo, kono hay so haalii ko kaalɗaa koo ne;



miin mi goondintaa. Njif mi ko ittaa ngoo miijo e hakkille maa. Pot daa hannde ko werlaade ndaardi maa, nji'aa dii ñaldi mbellamma juɓɓinaadi ngam welnude njommbawu mon. Galle oo e leydi ndii fof woni ko e welnere, etee maa nde duumo balde keewde. Mbele a nanaani kolli, liite, bawdi e buubaaji oolotoodi dii? 'Dee gede fof so ada yi'a de walla ada nanade foti ko weltinde ma njejjitinmaa kecce de kaalandaa mi dee."

Debbo Laamdo oo noddi rewbe hebloobe bee. O ummini mo. Ndeen o yi' Badarul-Buduur ummii ma ina feewnitoo, o yahi to suudu makko too, o wi' baaba oo: "Badarul Buduur wondunoo tan ko yee'e, kono jooni fof rewii laawol." Caggal mum o noddi bidɗo mawdo jaagorde oo, mbele o loska dum. Oon noon nde tawnoo ina jarribaa e esiraagal mum e Laamdo oo, welaa suudde kabaaru oo. Welnere ina jokki ñalawma oo fof tayondiraani.

Yumma mum Badarul ina jokki e dahde Badarul mbele riiwta miijoji di wondi dii; kono duum e wa'de noon fof, so a yeewii suka debbo oo tan a faamat miijooji di waaldi di daccaani dum haa jooni.

Aladiin heɓii kabaaru ko ñalli galle Laamdo; omo anndi kambe fof e heewde ngoy'aaji, so woppiiriibe noon kadi oo jamma paado bidɗo mawdo jaagorde oo e Badarul-Buduur ko jogorbe leldaade, hay so mbaaliino jamma cofel e kalumbam. Aladiin wi' woppirtaabe noon. Ndeen o naatii, o huccani fitirla ka. Jinne o ari, haalani mo, hono ko haalantunoo mo koo; o yamiri jinne oo yoo wadan mo hono ko gollannoo mo jamma hanke koo. Jinne yahi, wadi no wadnoo hanke nii. Bidɗo mawdo jaagorde, jinne wallinii dum to waalnoo hanke too; Aladiin e Badarul-Buduur leldi, silaama ne hakkunde maɓbe. Nde yahnoo haa weeti, jinne nawti yombaybe bee galle Laamdo.

Laamdo nde tawnoo waaldi ko ngoy'a, fini, royani bidɗo mum debbo mbele jamma didaɓo oo samorii gadano oo. Ndeen bidɗo mawdo jaagorde oo nani dille Laamdo oo, o heñii ,o boornii comci makko. Laamdo naatii, fa'i e bidɗo mum, salmini mo. Laamdo heddiina mooyta bidɗo mum; laamdo wi': "Bidngel am oo jamma kay mido sikki

wa'aani no jamma jawtudo oo nii? Hannde kam maa taw, maa habram no mbaaldu daa?"

Badarul-Buduur dey'yi, haalaani hay huunde. Laamdo tawi no tawri bidfo mum debbo oo hannde nii, ina furi bonde eno tawrunoo mo hanke nii. Jooni kay Laamdo nattii feccude sikke. Laamdo anndii pellet won tigi ko hebi bidfo mum ko wonaa jam. Laamdo naatii fitina, wi': "Kaalanaa mi jooni jooni ko hebmaa walla mi soddita leggal daande maa. Laamdo tami silaama, heddii ina siñña. Laamdo finni.

Badarul -Buduur, doo do o lelii omo leerta gite, ko kulol e gacce hakkunde makko e baaba makko furi wo'ye mo, kono wonaa silaama kaa o huli. Ndeen o yi' haafre Baaba oo yottiima nokku, o felliti ha'be e wonki makko, o yalti e muumndam; o wi': "Eeh baaboy am! Yaa, aan Laamdo toowdo, tiidno yaafo mi so tawii mi bonirii ma nehdi. Midoo joortii tan moy'ere maa e yuurmeende maa e bernde maa heccere, maa lomto cekedele maa, so mi fillani maa ma bone jando e am hecci hanke e hanke."

Ndeen Laamdo nanii ko bidfo mum debbo fuddii haalde koo, o deeyti, njurum makko jippii e bidfo oo. Ndeen suka debbo yi' mba'di baaba mum, o felliti fillanaade baaba makko, kala ko hebnoo mo kanke e gorko makko, gila fuddoode haa wortorde. Nde o gayni haalde o wi': "Baaba, so tawii sikkitaare maa ina e ko kaalan maa mi koo, noddoo joom galle am naamndo daa dum, mbele o rokku maa seedamfaagal laafngal."

Caggal nde Laamdo hebi nande oo kabaaru mo meeda joodtaraade, Laamdo sunii haa no feewi, sabu o sikkaano dee mette ina njana e bidfo makko. Laamdo hebbittii wi': "Bidngel am! Kono a tooñii kam toñange mawnge, nde a haalanaani mi dum gila hanke nde dum wadi ndee. Miin, mi rokkiraani ma dewgal yoo a suno, ndokkir maa mi ko yoo a welto, nguuraa e mbellamma e malu. Midoo joortinoo gorko mo cubani maa mi oo, ina haandi e maa. Jooni moomtu dii doo miiijooji di ciimtan daa mi dii fof e hakkille maa; maa yi' ko mba'f mi! Maa mi

yamir hoto dii jammaaji bondi ngartu e maa ko heddii heen koo.”  
Laamdo ummii fa’ti to nokku mum too.

Ndeen Laamdo yottiima, o wadi nelaado e mawdo jaagorde oo. Mawdo jaagorde oo ari. Laamdo wi’: “A yi’ biidoo maa? Ko o wi’ maa?”

Mawdo jaagorde oo wi’: “Alaa, mi yi’aani biidoo am.”

E oon sahaa, Laamdo siimtani mo ko jolnoo hakkude biidoo mum e biidoo makko e nder jammaaji didi njommbawu dii. Ndeen o haljitii, o wi’: “Ko dum huunde laabnde; kono maa mi naamndito biidoo maa oo haa beydoo laabde. Suudo yah naamndo daa biidoo maa oo, hono dum wa’i.”

Mawdo jaagorde oo yahi yi’di e biidoo mum. O yeewtani biidoo makko yeewtere makko e Laamdo, ko fa’ti e njommbawu makko e Badarul-Buduur. O ñaagii biidoo oo yoo tiidno fillanoo mo fof, tawa suudaani hay tobbel, haalana mo goonga; habra mo huunde ndee so ina woodi walla woodaani.

Biidoo oo wi’: “Baaba, mi suudataa ma goonga. Ko o wi’ koo fof ko goonga kanke Badarul-Buduur, kono o haalanaani on, miin golle bonde de ngolletee mi dee. Gila kumanaa mi fa’de hannde mi waawaa haalande on leepete de leepetaa mi e cadeele de ndañ mi. Mi haalataa wefteende heftii nde mi e itteede mi laabi nayi e leeso lelinoo mi, etee mi anndaa ko ittata mi doon. Aan e hoore maa, maa a ñaaw leepete de ndañ mi, so mi wi’ ma dii jammaaji didi fof mbaaldat mi ko darnde. Mido woni coogeeri, alaa ko boornii mi so wonaa forokel e nder ngel cuurel paadngel; mi waawataa hay dillude do ngonmi doo; hay yi’de yeeso am mi yi’ataa. Soklaani nii ko mido yaajnoo e dee leepete bonde. Baaba! Mi suudataa ma, dum fof hadaani mi yidde Badarul-Buduur, e horsinde dum e teddinde dum. Mi suudataa ma noon miin fof e toowneede, sabu resde mi biidoo Laamdo, miin fof e teddinireede duum, hannde ko maayde am burani mi wuurdude nii. Sikke alaa, biidoo Laamdo oo ne kono mba’mi nii wa’i, kanke maa o anndu ceergal am no foofthinirta mo nii ko noon foofthinirta mi. Mido ñaago maa baaba, korsa ka mbaadfaa haa nji’tandaa mi ngal teddungal mawngal nii, wad feere kadi haa Laamdo oo jaba ittude dewgal hakkunde amen.”

Mawɗo jaagorde oo fof e yidde esondirde e biɗɗo Laamɗo ronkiti jogaade pellital, mbele biɗɗo mum ina heddoraa muɗal haa waawa muɗde cuurki ngal dewgal. Mawɗo jaagorde oo ummi yahi to Laamɗo. O wi': "Kala ko biɗɗo maa oo wi'maa, anndu ko noon woori, sabu biɗɗo am e hoore mum seedtiima, wonde won nii ko biya oo haalaani. Caggal duum, o ñaagii yoo Laamɗo daccit biɗɗo makko ummoo toon arta, so wonaa duum, ko leepete e banndi mum tan be nji'ata heen.

Leelaani, mawɗo jaagorde hebi ko ñaaginoo. Laamɗo yamiri yoo pijirlooji dii fof ndartine; gila e nder galle mum haa e nder wuro ngoo e kala nokku ɗo dillere ndee yottinoo."

Ndeen yahi haa yamiroore ndee sarii maa, yimbe ngoni e siimtude, nde tawnoo huunde ndee ina yaawi no feewi; waylo waylo oo heblanaaka. Yeddini e nder berde, bee heen mbi'a nii, bee mbi'a naa. Be laaɓaa kam mawɗo jaagorde oo yaltidii e biɗɗo mum e nder galle Laamɗo oo; tee ina janngoo e jeese maɓɓe sunaare mawnde.

Ko Aladiin gooto tan anndi ko dum woni. Aladiin ina jogii weltaare mawnde e golle ɗe fitirla kaa gollani dum ɗee. Aladiin anndii ko aldaa e sikke wonde mo o foodondiratnoo Badarul-Buduur hono biɗɗo Laamɗo oo, oon yalti galle; dewgal hakkunde biɗɗo mawɗo jaagorde e Badarul-Buduur biɗɗo Laamɗo, ittaama; saabu o somaani nii hanjkadi noddude jinne oo, sabu omo anndi lelnde wontaa hebo doon.

Alaa noon ko furi dum haawnaade! Sabu ko wadi koo fof, alaa ciftordo Aladiin; wonaa Laamɗo, wonaa mawɗo jaagorde oo hay ɗaɓɓannde Aladiin ndee be ciftoraani, saka be miijo musiiba dewgal ngal ko toon ummori haa dewgal yiɗyi heen.

Aladiin fadi haa lebbi tati ɗi Laamɗo fodannoo dum dii timmi, tawi o hiisiima ñalawma yoo e ñalngel. Ndeen lajal aadi gonnodo hakkunde Aladiin e Laamɗo timmii, subaka janngo mum, Aladiin wi' neene mum yoo yah siftinoyde Laamɗo aadi oo. Yumma oo fini dawani galle Laamɗo hawriti e batu subaka oo. O yotti, o wadi no o woowi wadirde

nii. Ndeen Laamdo yi' mo, tan siftori daɓɓaande nde o ñaagino ndee e lajal ngal dottunoo ngal.

Oon sahaa tawi ko mawdo jaagorde oo ina woni e ciimtol; Laamdo oo wi': "Jaagorga, mi sooyniima debbo gaddannoodo en mbelnaari njoodndi ndii, daccu mo o ara mi hedtoo mo, so o haljiti njokkanaa mi ciimtol ngol."

Mawdo jaagorde oo werlii gite mum sooyinii yumma Aladiin; o joofanii mawdo ñaawooɓe oo yoo yamir yumma mum Aladiin yo naat.

Yumma mum Aladiin yaɓɓi haa to jappeere Laamdo too, sujji, wadi no woownoo wadde nii. Caggal mum, Laamdo wi' mo yoo haal sokla makko. O wi': "Yaa! Aan Laamdo cañdo, katando, ngarmi ko e dow innde biɗɗo am; siftinde ma lebbi tati di mbi'nodaa yoo min pad jaabawol daɓaande nde min ñaagino maa timmii. Midɗo toro maa nde ciftortaa." Laamdo oo noon nde rokkatnoo mo lajal ngal ndee sikkatnoo ko o wontaa ruttaade saka siftinde dum ko wa'i nii, sabu dewgal Aladiin e biɗɗo makko Badarul-Buduur wonaa ko miijnii, sabu hinde baasal e mba'di ndi yumma mum Aladiin ardata toon ndii, holliri ko e yimɓe famarɓe doole ɓe njeyaa. 'Dum fof wa'de noon o arti siftinde Laamdo yoo huur konngol mum, addii e Laamdo ngaanumma. Laamdo diisnii mawdo jaagorde oo, mbele ina heɓa feere ko adii omo rutta jaabawol e yumma mum Aladiin. O anndini mawdo jaagorde oo kutuya mo o jogii e ittude biɗɗo makko o resnda dum tumaraŋke tawa omo anndi kadi ngalu oon tumaraŋke, ngalu mum fotaani hay feccere feccitande ko foti jogaade nde haanda e biɗɗo Laamdo.

Ndeen mawdo jaagorde hedtiima Laamdo haa gasi; o denyaaki, o wi': "Laamdo! Miin miijo am ko nii: feere riiwtude e ittude hakkille Aladiin e ngal dewgal kaantoriɗngal tan ko fawde dum ngalu ngu nganndu daa kala do ngalu makko tolnii waawataa yottaade doon. Ko duum ɓuri wonde feere hollitoore mo cuus-ngaccaagu makko e peelelaagal makko e waasde mo luggidinde miijo nde o naatata e yamal ngal ndee."

Ndee feere nde mawdo jaagorde oo rokki Laamdo, hawranii Laamdo.

Laamdo hucciti e yumma mum Aladiin, o wi': "Ee! Hey maa kordo Alla teddudo, Laambe ina poti hormaade konngudi mum'en. Ko duum wadi ko mi kebiido malnude biya oo e wadde dewgal biya oo e biyam; kono noon mi waawaa humande mo tawa mi yi'aani nafoore nde o jogii. Jooni yah! Wi'oy biya maa mi rokku mo o resa Badarul-Buduur, so o neldii kam pehe capande nayi kanje laabdo mo haynaaka, tawa kadi pehe dee ina loowaa haa mbatti rufde, hono ko o neldunoo doo koo. Deen pehe yoo taw roondii dum'en ko capande nayi ji'aado baleejo ina reggini dum'en, ji'aabe capande nayi raneebe, sukaabe narduube, dardarabe naantiibe haa njoodi. Ko dii ngoni sardiyeegi di mbaaw mi rokkirde mo biddo am. Suudo njahaa, mido fadi jaabawol makko." Yumma mum Aladiin sujji e yeeso joodorde Laamdo ndee, yalti.

Ndeen o yaltii, heddii omo jalda e hoore makko; miiijooji ina pal-paltondira e hakkille makko eno Aladiin yi'ri biddo Laamdo oo tan haa saay'ili heen wi'a tan wonki mum, wonki biddo Laamdo; o yooraa jaleede kadi o miiijoo holi fof to Aladiin dañata dee pehe no mba'i heewde nii e dee kaaye dime delkooje. Mbele o jogoraani ruttaade nder leydi o boggoya de e ledde hee? Holi fof kadi to o jogori dañde bee jiyaabe be Laamdo wi' bee?

Jooni kay kanjo yummiraado o o damtindii ma, so Aladiin ina jogori hebde dafaande mum ndee. O hootdii e miiijooji haa wi'i dak. O sikki kay so yottinii kabaaru oo Aladiin maa ittu jikke mum e biddo Laamdo sabu ko Laamdo fawi mo koo weebaani. O yottii, o wi'i: "Bidngel am! Mido ñaago maa nde ngoppataa miijaade resde Badarul-Buduur."

Yummiraado fillanii biyum ko waddunoo e Laamdo fof haa joofi. O wi'i: "Caggal ko nandaa koo, Laamdo ina fadi jaabawol maa. Mido sikki ne maa o booy fadde."

Aladiin wi'i: "Neene! Wonaa no cikkirtaa nii booyrata; o fuuntii hoore makko. Miin cikkatnoo mi o fawata mi ko sardiiji di mbaadotaako; kono jooni mi weltiima no feewi e kal seedayal kal o naamnii, sabu duum ko seeda e ko mbaawnoo mi rokkude be, sabu gilli am e Badarul-Buduur."

Yummiraado oo yahi ndaartoyde ko be ñaami. Doon e doon Aladiin addi fitirla kaa wadi no wadatnoo. Jinne oo yalti o haalani dum fof no lelirii. O yamiri jinne oo yoo o yah, o addana mo haaju oo ko buri yaawde e yaaccaade, mbele omo nawana Laamdo hade batu nguu saakaade. Jinne oo yahi doon e doon, o addi ko o yamiranoo koo fof.

Ngol laawol tawaa kaaye dee buri yoodde hay de adande dee; tee ne ko kaaye kanje laabde de kaynaaka, dee keelele, dee jalbooje... tawi kadi feere heen fof ina muuraa burtungal kaalis ngal piindi kanje. Galle maabe oo bitti nde tawnoo ko galeyel paad ngel, yeeso oo ko dingirel tokosel, caggal ngal ko gesel ledde tokosel. Ndeen yummiraado oo artii jeere tawi galle fof heewti yimbe. Dum jaggi mo kaawis. O wi'i omo itta kaala o dadoo, Aladiin wi'i mo: "Alaa neene, yimbe ko heñii be; njid mi ko njahon jooni jooni to Laamdo oo hade ummaade, kolliton mo njeenaari am e teje de mbadmi dee, mbele omo annda pellital am e yidde am esondirde e makko."

Ko adii nde yumma oo nabtata hunuko, tawi o udditii damal galle kuccit ngal e laawol ngal; doon tan be pudtii yaltude: jiyaado bodeejo ardoo, jiyaado baleejo rewa heen ina roondii fehre kanje. Noon o wadi, woni gorwocol gootol haa fof timmi. Ndeen be njaltidii, Aladiin uddi damal mum deeyi ina wondi hanjaka kam e njoorto maa Laamdo oo jaɓ wonde esum. Ndeen jiyaado bodeejo gadano oo yaltii e laawol hee, o dartini kala yahatnoobe, mbele ebe mbaawa reggondirde, ko duum wadi haade capande njeetato jiyaabe bee yaltude, hakkunde baleejo e bodeejo tawi laawol ngol heewii yeeboobe. Yimbe fof njalti ina njeeba ndee huunde yoodnde nde alaa kaadtudi.

Naantungal gaabdi, pafti kanje koobaadi kaalis e jalbugol maabe gila to balli haa to cudaari wadi yimbe fof kaawis mawdo. Wuro yalti ina ndaara hakke Alla e keewal yimbe gooto fof ronku bosde do wonnoo. Laabi dii tidfii.

Nde tawnoo ko gorwocol ngol rewata ko e laabi keewdi, nde yottoyoo to galle Laamdo too; feccere e wuro ngoo njaltu ina njeeba oo kaawis. Gorwocol ngol ina yaha ina daagoo haa yottii damal galle Laamdo.

Ndeen gooto e jiyaabe capande njeetato bee yottiima e damal ngal tan, reenooɓe baafe galle bee cikki ko o laamɗo goonga tan no o way yoodde e ñaantungal makko, haa ɓe mbi'i nii ko maa ɓe buuccoo wutte makko; kono nde tawnoo jinne fitirla kaa haalaniino jiyaado oo, jiyaado salii. O wi'i reenooɓe bee, minen ko min jiyaabe tan, so sahaa oo heedii maa kaliifa amen oo feeñan on. Jiyaado gardiido oo yottoyi e dingiral galle Laamɗo dimmal ngal, soofaaji makko dii fof e yoodde ngonti ko hay dara e yeeso sete Aladiin oo. Kala ko yoodnoo e nder galle Laamɗo oo, ñande heen wa'ti kono ko ko furi nii e yeeso ñaantule e mbaydiiji e cudaaje jiyaabe Aladiin bee.

Laamɗo tawi habraama garaangal maɓɓe ko duum wadi o rokkiri yamiroore, so ɓe ngarii yoo ɓe naat. Ndeen ɓe njottiima, ɓe peccii e doge diidi juɓɓude. Gorol heedi banɗe ñaamo, gorol heedi banɗe nano, ɓe naati kamɓe fof, ɓe kuufi jappere Laamɗo ndee, ɓe kucciti e makko. Ko ndeen jiyaabe baleeɓe bee, gooto heen fof joddini fehre roondinoo ndee dow mbertanteeri koyɗe ndii. Kamɓe kala ɓe cujji, ɓe piyi tiide e mbertateeri ndii. Jiyaabe wodeeɓe bee ne mbadi noon. Caggal duum jiyaabe baleeɓe bee muurti pehe dee. Kamɓe fof ɓe ndarii ɓe kaɓɓondiri juude e becce e wondude e yankinaare mawnde.

Yumma mum Aladiin tawi yahii haa to jappeere Laamɗo too. O sujji; o wi'i: "Yaa aan Laamɗo kattando, biɗɗo am Aladiin humpaaka wonde ndii njeenaari timmaani teddungal ngal Badarul-Buduur haandi ngal, omo joortii tan maa ndi wele; mbeltiniraa ndi kadi biye, koolo daa wonde o jaɓ haadde e sardi mo ndokkuno daa mo oo.

Ko yumma mum Aladiin haalata ina beloo koo fof, Laamɗo wadtaani heen hakkille mum. Gila tan nde gite makko dee pawii e dee pehe kaaye dime, haa e ɓe jiyaabe laatiibe e ñardugol ko o yi'i koo, gite makko ko dow tan Alla e najde e kaawis njoodndam dee gede. O woy'aaka yumma mum Aladiin gondo sara makko ina beloo mo oo; o hucciti ko e mawɗo jaagorde oo, tawi hay kañum ko najɗo e oo kaawis mo yi'i; haa ina wi'a e hoore: "Hol fof to dii ngaluuji di ngasataa ummotoo?" Laamɗo wi'i e dow yimɓe fof: "lih! Jaagorgal, hol ko paam



ɗaa e oo? No wa'i wa'de fof, oo neldudo ndii njeenaari toowndi kaawniindi ndi, miin e maa kala en nganndaa. Cikku ɗaa o haandaani e resde Badarul-Buduur?

Mawɗo jaagorde nde wonnoo yiɗaa godɗo bama Badarul-Buduur so wonaa biɗɗo mum, jogii sunaare mawnde e ngal esiraagal jogorngal wadde hakkunde Aladiin e Laamɗo. Kanke fof e waawde hirde e sunaare nde o wondi e ngal esiraagal, o suudaani miiɗo makko e njeenaari Aladiin ndii, miiɗo makko hollii njeenaari ndii ina yona sabaabu haa Aladiin haanda e resde Badarul-Buduur, esondira e Laamɗo. O jokki, o wi'i: "Midɗo wodɗi miiɗaade wonde baɗando on ndii njeenaari haandaani e biye Badarul-Buduur; sinno wonaa midɗo anndi alaa e duunde baaba Aadama hee ko yerondirtee e biye oo haa fota e makko; midɗo waawi wi'de Aladiin ina haandi e ko buri duum nih." Hoohooɓe jonnde ndee fof ceedtorii dum kelle mum'en. Kamɓe fof ɓe kolliti eɓe ngonndi e miiɗo mawɗo jaagorde ngoo.

Laamɗo felliti rokkirde biɗɗo mum. O somaani nii loskude haa o annda so tawi Aladiin ina jogii ndimaagu e nedɗaagal kaandinngal dum e Badarul-Buduur, walla ko biɗɗo cuurel. Laamɗo foolaa tan ko gila nde yi'i nguu ngalu no wa'i heewde e dummuna daɓɓo mo Aladiin renndini fawi e yeeso mum. Dum bettii Laamɗo no feewi, sabu Laamɗo miiɗinoo ko Aladiin waawataa huuɓnude sardiiɗi o fawnoo dum dii. Kono nde o yi'i nguu ngalu, o jebbilii. O heɓii cuusal nguu ngalu ina waawi huuɓnude malu e kisal di biɗɗo makko yiɗi fof.

Laamɗo wi'i yumma mum Aladiin: Eeh Debbo Teddudo! Yah wi'oy biya midɗo fadi dum. Midɗo feewnitii jaɓɓaade mo, mi wertanii mo yeeso e leeso, mi ɓuuccoo mo mi rokka mo e dow mberwetto junngo biyam Badarul-Buduur."

No o yaawnorii fof ko noon o mbeltinirta mi.

Yumma mum Aladiin ina heppatnoo ko heɓata oo kabaaru, o yahi e yamiroore Laamɗo ndee. O yahi, omo diwa e summbeende, sabu o ɗanii ko o sikkaano, o joodtoraaki wonaa hay e koyɗol so esondirde e

Laamdo sabu no wa'i lesdude. Laamdo yamiri yoo batu saako. O hokki yamiroore jiyaabe mooraabe bee yoo ndoondo njeenaari ndii nawa dum to Badarul-Buduur. Been nawi pehe dee njoyYinoyi toon. Laamdo e biddo mum koofi njeenaari ndii ina ndaara.

Mawdo mooraabe oo rewindii haa yamiroore ndee si'naa.

Laamdo oo yamiri kadi yoo jiyaabe capande njeetato bee ngar Badarul-Buduur yi'a dum'en, sabu tawi ko o haalanii Badarul, timmal maabe, njoodndam e gardugol maabe. Ko duum wadi omo heppa hollude Badarul-Buduur, mbele oon ina annda won nii ko o nakkini e ko o haalani dum koo.

Badarul -Buduur yuurnii e cereeli panlanteeje ina yeeba be.

Yumma mum Aladiin yottiima galle mum'en, o naatdii e yeeso raneewo tal holliroowo o addii kabaaru beldo. O wi'i, "Bidngel am hankadi dey ada waawi weltaade, sabu hannde Laamdo e hoohoobe mum fof ngoonadinii wonde ada haandi e biyum, hono Badarul-Buduur. O mona fadmaa, ngam o buucco maa, o human maa dewgal maa. Jooni noon ko aan foti wadde faa'iida e hoore maa, yeewa no peewnitorto daa haa jikke mo njogiimi e maa oo laatoo. Kaawisaaji nji'ru maa mi dii ina ndeeyni bernde am, sabu mido anndi hay huunde nakkataa. Laamdo oo ina fadmaa, duum noon heño njaha to makko.

Aladiin hebii kabaaru beldo, sabu dañii ko ittunoo hakkille mum. Ko duum wadi o waddaani heen haala. O nattu suudu makko tan o yetti fitirla kaa, kaa fitirla kumtan ka mo kala haaju haa yottii doo. O memi fitirla ka, jinne oo feeñani mo. O wi'i jinne oo: "Njidmi ko keblaa mi, mi lootoyoo, so mi gaynii yoo taw a heblanii kam comci di hay Laamdo gooto meeda boornaade."

Hade makko yottinde haala tawi jinne oo nibbidinii mo, nibbini hoore mum, nawi mo e nokku looteteedo jooddo. Nokku ina mahraa kaaye jalbooje daatde, mbaandolinde, delkooje. O boortaa e suudu yood ndu, yaajndu.

O ittaa doon o naatnaa e do lootetee doo, tawi wuli ko nguleeki kakindii ki. Doon o soccaa, o lootaa e diyye uurde de nji'da. O rewi e cuudi nguleeki dii kala ndeen o haljitii, o yalti e mbaydi kesiri: banndu nduu ina jalba, o ranwi o wi'i tal, goobu makko noddii makkaari. Banndu nduu fisti, softi, hoyfi. O ruttanii suudu ndu o umminoo ndu, kono o tawtaani doon wutte mo o arduno oo. Jinne oo tawi lomtinii doon wutte mo Aladiin yamirnoo dum yoo addu oo. Jinne oo walli mo o ñaantii haa yoodi; comci gaabdi, labaadi, ñardudi, cubaadi. Hay kanke Aladiin e hoore makko kaawis njoodndam dii comci ina jaggi mo. O sikkaano jinne o ina addana mo koltu mba' ngu nii yoodde.

Jinne oo wi'i mbele omo jogii yamiroore wofnde. O wi'i eey, sabu jooni o sokli ko o addana mo puccu caasaasu, ndimu, njoodngu ngu hay gooto alaa; tawa kadi hay to juggal pucci Laamdo ngu tawetaake toon; yoo kabirde puccu nguu gila e hirke haa e labale, taltali, jappeeje maggu fof yoo ngon dowrowe, tawa so yeewaama burat miliyon; mido yamira kadi yoo jiyaabe noogaas, waddiibe, sudaabe haa mba'ino nawnoobe njeenaari ndii ngar ndewa e am. Yoo jiyaabe noogaas kadi wofbe ngadde mbada dogi didi do yeeso am doo.

Mido yamirmaa aan jinne oo, kadi nde ngaddantaa neene am horbe njeegomo sudaabe, ko jaasi fof haa be nannda e horbe Badarul-Buduur yonteede, gooto e mabbe fof njooɓnaa dum comcol kaandungol e debbo laamdo tawa ko neene am jeyi. Ko fa'ti am miin njidmi ko menjelleeje ujunere kanke tawa ina peccaa e danngaaji sappo. Aladiin ndeen haljitii, wi'i jinne oo, ko dum njoginoo mi ko mido yamir maa, yah yoo ar jooni-jooni.

Ndeen Aladiin gaynii ko yamirtunoo jinne oo, jinne oo yahi, arti, addori ko yamiranoo koo. Aladiin yetti danngaaji nayi kanke totti neene mum, o yetti jeegom keddiidi dii o totti jiyaabe yoo njogo ina mbeddoo yimbe darotoobe e laabi walla ina njeeba be so be pa'ii galle Laamdo. O hokki yamiroore yoo bee keed ñaamo, bee keeda nano. Aladiin hollondiri yumma mum e horbe bee wi'i comci be njogii dii kadi ko neene mum jeyi, ina waawi wafde e majji ko welaa.

Ndeen Aladiin gaynii heblude gedefe mum fof haa ngasi, o wi'i jinne oo, jooni dey ada waawi yahde. So mi dañii e maa haaju maa mi noddite. Doon tan jinne oo majji.

Ngoy'a Aladiin wonti e no o yi'rata Laamdo. O neli gooto e jiyaabe bee yoo yah jikkondira e heedbe e Laamdo bee, mbele omo anda nde o foti arde.

En mbaawaa wi'de noon jiyaado nulaado oo, ko kam faddi jiyaabe heddiibe bee, sabu kambe fof ko be yoodbe no feewi. Ndeen jiyaado oo yottiima haali nelal ngal, Laamdo wi', "Ko jonnde Aladiin tan min njoodii."

Aladiin e yimbe mum yetti laawol fa'de galle Laamdo. Aladiin fof e waasde woowde mbaadu, so a yi'i mo e dow keeci puccu nguu a anndataa o wonaa garbuusiyanke. Kala laawol ngol be njaggi cente-cente yimbe dakkitoo ndewa e mabbe ina ndiwa, ina ngulla, ina njeeba, ina nduwoo haa teenji noon e so be nokki e danngaaji kanje hee, be mberliima e mabbe.

Deen dille wonaa tan e miskineebe yurotoobe ina kocca kanje tan teskaa, hay yimbe mawbe joom en ngaluuji dillere mum'en nanaama. Been yimbe mawbe joom en ngaluuji ndonku jaggude ko'e mum'en e dokke de Aladiin jogii dee. Won heen ciftorii cukaagu Aladiin, nde tawnoo ko suka pamaro haaju Aladiin wonnoo, pijoowo e laabi, do Aladiin yi'aa fof ko ina wonndi e cukaloñ ina fijda e mum'en; hay been yimbe wonti ko jeddi e nder berde mum'en: "Oo ko Aladiin! Alaa maa taw kay wonaa!" Yimbe bee ndonkiti annditde ko Aladiin mo be cikkaano oo woni doo hannde. Hay yi'noo be mo ko booyaani paayti mo, sabu no o wa'i waylaade. Hakkilaaji fof kodi ko e Aladiin, wonaa e ngalu, wonaa ñaantule, sabu deen gedefe fof yimbe bee nji'ino dum'en e sahaa nde jiyaabe bee nawata njeenaari ndii ndee.

Anndube pucci bee ndonki ittude gite mum'en e puccu Aladiin hee, Alla e puccu nguu labeede. Dii kanjeeji, dii kaalisaaji e dee kaaye dime ko

doon deyyitire ndaarata ñallina bernde e muuyooji. Nde wonnoo kabaaru dokkugol Laamdo oo biddo mum hono Badarul-Buduur Aladiin tawi saakiima, alaa to heddi e duunde baaba Aadama ndee, kala nannoodo kabaaru oo e dillere mum, haawanaaki Aladiin ndeen bambaare e oon martaba, wi'i ko Aladiin ina haandi e Badarul-Buduur.

Aladiin yottiima galle Laamdo tawi gedde fof ina njuubbinaa, ina padi dum. Aladiin yahi haa yottii damal dimmal ngal, o yidi memnude koyngal leydi no mawdo jaagorde oo, soofaaji dowrowi e yimbe mawbe leydi ndii no ngoowi wafde nii, kono keeddo e Laamdo oo wi'i mo dum soklaani, ko Laamdo oo yamiri, yoo mi wi'i mo ko o jaafaado duum. Ndeen Aladiin tawi wi'i ina tellina koyngal, nani kaan haala, haayti; o yahri noon haa o yottoyii keeddo e Laamdo o walli mo tellaade. O heedni mo banje makko ñaamo be njahri noon haa to Laamdo.

Ndeen Laamdo turtii hoore yi'i Aladiin, kaawis mawdo jaggi dum, sabu ñaantungal Aladiin ngal, darnde mum e hayba mo ardi oo, hay kanke o alaa dum. Etee no yumma mum Aladiin feññinirnoo baasal mum e waktu nde ndaartanta biddo mum ndee, ngaal baasal Laamdo yi'aani dum e Aladiin.

Laamdo ronki tan jogaade hoore mum Alla e kaawis e mbelamma; o haftii o darii, o tellii e tellorde didi walla tati e jappeere makko, ko buri yaawde ngam hadde Aladiin diccaade e koyde makko, o buuccoo mo ngam hollirde cehilaagal mabbe. Caggal ngaal teddungal, kadi Aladiin wi'i kadi maa jippoo, diccanoo mo, Laamdo jaggi mo kadi. Laamdo yamiri yoo yeenj o joodo hakkunde mum e mawdo jaagorde oo. Doon Aladiin yetti konngol wi'i: "Yaa aan Laamdo Laambe! Mi jabii hebbaade teddugal ngal mbañan daa mi ngal; sabu ko moyyere maa yottii doon. Kono yaafo mi anndin maa, mi yejjitaani njibinaa mi ko mi maccudo maa, mido anndi kadi kattande maa do tolnii. Mi humpaaka kadi no jibinannde am woori, mawnugol maa e ndimaagu maa toowngu. So tawii fartanje wafii haa mi haandi e martaba potdo nii, so jooddaade e maa, alaa ko addi dum so wonaa peeelaagu am, mbañgal haa cuusmi umminde gite am, miijooji am e yidde fa'de e biya, oo biddo laamu

Alliyanke. Mido ñaago maa yaafuya e ngal peeelaagal, kono mi suudataama, ko sunu jogornoo yoobaade mi, so yidde am ndee laatonooki.

Laamdo wi'i mo: "Bidngel am!" Laamdo woni e buuccaade Aladiin ina wi'a: "Maa tooñ am no feewi so a sikkitii ma konngol am, nguurndam maa ina woyi mi no feewi hannde oo, haa dum wadi mi waawaa waasde resande ma Badarul-Buduur e addude kala safaara badoowo haa dum laato."

Ndeen Laamdo joofnii haala mum, o rokki maandinoore. Doon tan weeyo ngoo heewti duyŷe, dum ko liite, dum heen ko bayli, buubaaji.... Laamdo jaggi junngo Aladiin dowi dum haa e suudu jabbordu yoodndu, yannge mawnge wadaa toon. Laamdo e Aladiin tan ndenndi lahal. Mawdo jaagorde oo e hoohooŋe toowŋe heddiŋe ŋee ngonndi e maŋŋe haa bottaari ndii yonti.

Laamdo hakkee Alla mum e weltaade e fawde ndaardi mum e Aladiin yeewti e tiitoode keewde. E nder yeewtere hakkunde ndee Aladiin holliri hakkille jaajdo e miijooji juumtudi e karallaagal mawngal. Doon Laamdo beydii yananeede jikke mo wadi e Aladiin oo ko tabitdo no feewi. Ndeen o haljitii wottaade, o noddii mawdo ñaawooŋe laamorgo ngoo yoo oon winndu doon e doon kaayit kumal hakkunde Aladiin e biyiiko Badarul-Buduur. Nde kaayit oo gasi winndeede, Laamdo naamndii Aladiin so tawii ina yidi dammbaade e nder galle mum hee.

Aladiin hebbitii wi'i: "Yaa! Aan Laamdo kormaado, miin fof e heppude e dakmitaade e neemaaji mbaɗandaa mi dii, njidnoo mi ko muñanodaa mi seeda haa mi maha galle jooddo kaandudo e Badarul-Buduur e senaare mum. Mido ñaago maa nokku e boowal maa ngal, mbele mi wada heen batirde am. Maa mi wad feere fof haa mahngo ngoo yaawa no feewi."

Laamdo wi'i: "Bidngel am! Yettu doo kala ko wel maa. Dingiral gonngal yeeso galle ngal ina yaaji no feewi. Mi yidiino mahde heen, kono sabu am yidde gonndigal maa e biyam haa mi weltooo, woppinii kam diin miijooji kala. Caggal nde kaa haala joofi, Laamdo buuccii Aladiin.

Aladiin ummii e wondude e nehdi, maa mbi'aa o nehii ko e galle hee, o waynii, o yahi.

Aladiin hootii no ardunoo nii. Yimbe ina njeeba mo kala do o rewi haa o yottoyii.

Ndeen o yottiima, o fa'i suudu makko; o teeli, o yetti fitirla ka no o woownoo wadde nii. O noddi, doon e doon jinne o feeñi. Aladiin wi'i jinne oo: "Mido yettu maa no feewi, sabu kala ko njamirno maa mi a wadii; hannde noon njidmi kadi ko beydaa. Njidmi ko mahanaa mi galle burdo yoodde e galleeji, galle oo huccita e galle Laamdo oo, tawa kadi kala ji'do galle oo ina haandina mo e Badarul-baduur. Njidmi noon ko yaawa no feewi. Ko fa'ti e kabirde mahirteede dee noon mi daldii ma yoo a subo, ko wa'ino ceenal burngal jalbude e buttidde gabbe, haa e kaaye dime ko wa'i no toy'ye walla belle, haa e kaaye bakaaje jogotoode mbaydi koymet haa e marmar burdo rimdude e mbaado-mbaandolinde. Hoto welsindo noon to cebbet hubeere too njidmi ko yoo wad suudu yeewtirdu yaajndu, jogiidu mbaydi suudu turdu ndu bale nayi potde rip, coree kaaye dime delkooje, jalbooje burde yoodde haa heddo palol gootol. Ngool woppiree noon. So hubeere ndee gasii yoo taw kadi hono mayre alaa e aduna hee. Yoo galle dee mbaade dingiral yeeso, dingiral nder e sardinje (gesa pudfi), kono kala nokku yoo wonda e boon ngalu, tawa ngalu nguu ko ko helaa haa sewi (weccitaa), kumpitaa mi to diin nokkuuji ngonni. Yoo galle oo wad nokkuuji defirdi, cuudi gollordi, cuudi mooftirdi denndaangal kabirde ndefu gollorde e kala e sahaa jontudo. Yoo kabirde dee ngon dowrowe jahdude e njoodndam galle oo. Yoo galle oo wad hudumaaji pucci dimi e dognoobe mum, wada jiyaabe rewbe wonoobe e yamiroore Badarul-Buduur." O wi'i jinne oo, "Ada anndi ko njidmi yah so dum feewii ngartaa."

Naange ina muta Aladiin ina gayna rokkude jinne oo jamirooje. Naange ina fuda subaka janngo mum tawi Aladiin mo gidli mum e Badarul-Buduur, biddo Laamdo kadii mo doyingol kam e deey're ina fina haa

jinne oo yottii. Jinne oo wi'i Aladiin: "Galle oo gasii, ar yeew so tawii omo wel maa."

Ko adii nde Aladiin ina feerta gite ndara jinne oo, tawi jinne sastiima Aladiin nawii dum to galle too. Ndeen Aladiin naatii e galle oo, Aladiin tawi no yidirnoo walla no miijorino galle oo ina yoodira walla feewira fof, galle oo burii doon. Caggal nde Aladiin wadi naat yaltu, yiiloo-banngoo haa tampi, Aladiin wi'i jinne oo: "Hannde alaa fof ko buri kam weltaade, tee alaa fof kadi woytoraandu jogii mi e gollal maa. Jooni heddii tan ko gedel gootel ngel modtu mi wi'de ma. Ko yoo a wertu leppi burdi daatde tuggude to galle Laamdo oo fa'de doo, mbele so Badarul-Buduur ina ara gaay ina daña do yaɓbi.

Jinne oo wirnii, wadi yamiroore Aladiin ndee. Jinne arti nawti Aladiin galle mum'en, tawi oon sahaa damal galle Laamdo ngal ina udditee. Reenooɓe galle Laamdo woownooɓe yi'de boowal hakkunde galle Laamdo e do huɓeere Aladiin darii doo, kaawis mawdo jaggi dum'en nde nji' huɓeere ina fanjinii leppi daatdi bodeeji ina mbertii gila huɓeere Laamdo haa to huɓeere Aladiin.

Oon kabaaru kaawniido sarii e galle Laamdo hee fof, mawdo jaagorde dee wonnoo udditgol galle oo ko doon tawi dum, najoore jaggi dum haa etii wi'de Laamdo oo ko dum mbileewu fotata wonde. Laamdo wi'i mawdo jaagorde oo: "Hol ko addan maa miijaade ko dum mbileewu? Ada anndi no nganndir mi nii ndee huɓeere ko Aladiin mahani dum Badarul e dow yamiroore am. Caggal nde nji'den dii ngaluuji di o holli hay huunde haawnaaki e mahde mo ndee huɓeere e dummunna daɓɓo. O yidi hollirde tan ko so neddo ina tami kaalis doreet –doreet ina waawi wadde kaawisaaji no hannde e janngo. So o laaɓanii kam reedu maa taw wad maa wi'de noon tan ko kiram."

Ndeen jinne oo nawti Aladiin galle mum'en, o tawi ko neene makko ina ñaantoroo wutteeji di o rokkunoo dum dii gooto gooto. Saha mo Laamdo oo gaynata batuuji mum dii, Aladiin hebli neene mum kam e horɓe ɓe jinne oo addannoo mo ɓee mbele ɓe njaha to Laamdo too,



ñaagaade teddungal hokkeede o hurtina e jamaagu ngu Badarul–Buduur to galle doo.

Aladiin hebii galle mum. Aladiin waddii puccu mum yalti galle baaba mum mo o wontaa naattu.

O tiindii to huɓeere makko too, omo jogii fitirla makko ka o yejjittaa, ko kaan fitirla rokki mo malu aduna mawngu. Ndeen halfinaaɓe damude galle Laamɗo ɓee cooyinii yumma mum Aladiin e goomu mum ina ngara, ɓe ndogi, ɓe kabroyi Laamɗo. Doon e doon jamirooje ndokka joom en liite, buubaaji, coorummbe, bawdi yoo pij ɓe kollira weltaare. Yeeyooɓe puɗɗii ñaantude jeeyirde mum'en, ina mbada heen leppi daatɗi, mbertateeje e beramlefi, ngam hebilaade delɓingol jamma. Fitiram golle en yeenji golle, yimɓe fof ina keppa ko kawritoyi to boowal mawngal gonngal hakkunde galle Laamɗo e galle Aladiin. Kaawis mawɗo seeraani e jaggude ɓe sabu no Aladiin wa'i nii.

Aladiin fonndetaake hay e Laamɗo oo. Ko ɓuri fof jaakde yimɓe ɓee ko yi'de ɗum'en oo galle, mo hono mum meedaa yi'eede, no mahraa e oo nokku mo hay huunde alaano doon, wonaa kabirde mahrude, wonaa ngooroondi, hay dara fewjanooka doon.

Caggal jabɓu ngal, mawɗo moraabe oo nawi yumma mum Aladiin to suudu Badarul too. Ndeen Badarul sooyniima omo ara, Badarul dogi fa'i e makko, jabɓii mo, jodɗini mo e ɗo joodɗino doo tawi e oon saha Badarul ina joodɗinoo e horɓe mum ina cuda ɗum, ina cejana ɗum cudaaje ɓurde yoodde de Aladiin soodannoo ɗum dee. Aladiin teddiniri ɓe ñamalleeje belde e njarameeje.

Laamɗo ne nde tawnoo ko jogorɗo seerde e biɗɗo mum hay so dummunna, ari mbele ina wonda e mum, takkoo ɗum, weltodoo e mum; Laamɗo ne teddini yumma mum Aladiin haa no feewi.

Yumma mum Aladiin haaldii e Laamɗo laabi keewɗi, kono o meedaa yi'de mo, tawa o muurnaaki no ngol doo nii. Kanke fof e naywude so a yi'i yeeso makko ada faama o jeyanoo ko e rewɓe ɓurɓe njardude e sahaa makko.

Laamdo woownoo yi'de mo tan, ko omo boornii comci baasdo walla mbi'aa tekke, kono hannde ko o ñaantiido maa mbi'aa ko Badarul-Buduur. Duum wadi mo miijaade Aladiin ko deentiido, nananaado e denndaangal kala huunde.

Ndeen yahii haa jamma, Badarul-Buduur waynii baaba mum; be mbaynondiri baynondiral keccidinoowal bernde; ndeen duum yawtii Badarul yalti ina wondi e yumma mum Aladiin to banje nano, ina wondi e horbe teemedere ñaantii be haa njoodi. Didde naalankeobe fijannoobe gila nde yumma mum Aladiin naati galle oo haa jooni, been ne babbitii ndewi heen. Watulaabe teemedere ndewi heen kam e teemedere gorko baleejo moraado. Be mbadi gori didi hooreebe mabbe ngardii. Sukaabe teemedde nayo rimbe wondunoo be e Laamdo ndewi heen, gooto kala ina weelnii jobnol. Ngaal naanagal yanti e naanagal delno-delno galle Laamdo e galle Aladiin oo, jalbi tan haa nanndi e ñalawma. Badarul heddii ina ñaaya e dow leppi daatdi haa yotti galle Aladiin. Yimatnoobe, ñaañoobe, hodoobe, joom mooluuji, liitoobe, fiyoobe buubaaji e bawdi diraango wonti wooto gila dow haa les. Mbellamma sarii, saakii e nder galleeji didi dii fof, haa e wuro e ko satii dum.

Hanjadi noon Badarul yottiima to galle Aladiin, Aladiin dogi no doole mum potnoo ina wondi e weltaare nde alaa do haadi ngam jabbade mo.

Yumma mum Aladiin tawi wadi e Aladiin kebtinirdi, ko duum wadi nde Badarul yi'i mo tan, jarabi mum mawni e makko haa doon waawi haafde. Nde wonnoo mbellamma mawdo jaggii Badarul-Buduur haa ronki jaggude hoore mum, nde o yi'i dii ngaluuji. O wi'i Aladiin: "Ee biy Laamdo, mi yahiino haa cikku mi huunde fof burataa galle baaba am yoodde e Aduna; nde nji'mi nduu suudu jabbordu mi faami ko e koomte ngonnoo mi."

Aladiin joddini mo do o foti joodaade doo; wi'i: "Badarul-Buduur mido jabboo ndee hoolaare mawnde hannde no haaniri nii, kono mido anndi

ko potmi goonjinde ne.” Badarul, Aladiin e neene mum puɗɗii huccande ñaamde.

Doon tan, diraango kaɓirde keccidinooje ɓoggi ɓernde wonti wooto, ina yahda e daade jaleede rewɓe. Ko noon doon woori haa ɗo ɓe kaljitoynoo ñaamde dum taƴondiraani. ʼBiy Laamɗo oo weltii haa yarlitii meedaa nande ko wa’ nii welde e nguurndam mum to galle baaba mum too. Badarul–Buduur anndaano ɓee yimooɓe ngonaa yimɓe, ko naalanɗooɓe jinneeji, rewɓe ɓe jinne fitirla kaa ngaddi yoo njirwin. Ndeen hiraande ndee gasii, amooɓe rewɓe e worɓe lomtii yimooɓe ɓee. ʼBe ngami eddaaji ngamri keewɗi maandinooji no aada leydi maɓɓe woowri nii. Wattindii ko gamoowo debbo e gorko njoldi, ngami, kolliri koyngol mum’en e leydi kaawningol, mbaɗi gaatuleeje mbaawnoo kala.

Yahii haa jamma fecondiri, Aladiin yetti junngo jombaajo oo, mbele eɓe ngamda wona lenngi dii ngasii. Ko noon woni aada leydi Siin e diin jamanuuji. ʼBe ngamdi ngamri ndii yoodi haa yimɓe fof ngoni e yeeɓde ɓe. Nde ɓe ngayni amde Aladiin ɗaccaani junngo jombaajo oo. Alaa, ɓe ɓennu to suudu maɓɓe tawi lelnde maɓɓe ina feewnaa haa feewi. Horɓe Badarul ɓoorti dum, lelni dum, jiyaabe Aladiin ne mbaɗi noon. Caggal mum gooto fof joftoyi.

Nde weetnoo, dammbooɓe Aladiin ngari ɓoornude dum comci mum. ʼBe ɓoorni mo comci ɗi nji’daa eɗi o ɓorninoo hanɗi dii, kono noon ko joodɗi haa maayi. O addanaa puccu makko, o waddi, jiyaabe yeeso, jiyaabe caggal, jiyaabe sawndooji, o tiindii to Laamɗo. Laamɗo jaɓɓii mo, bismii mo, teddini mo, no wadnoo laawol gadanol ngol nii; joyɗini mo e jappeere yamiri yoo bottaari sare e yimɓe. Aladiin wi’i: “Yaa aan Laamɗo toowɗo, njidmi hannde ko njaafɗo ɗaa mi, mbaasaa wadande mi ngal ɗoo teddungal, kono noon aan e mawɓe jaagorde e hoohoobe maa ngaron wottoyaade to galle Badarul–Buduur too.”

Laamɗo jaɓani mo ndeen ñaagunde e dow weltaare. O ummii doon e doon, ngam yahde to galle Badarul–Buduur. Nde wonnoo wofɗaani, o

woni e yahrude koyde. Aladiin heedi ñaamo makko, mawdo jaagorde heedi nano, hoohoobe wodbe bee ndewi e makko wondude e watulaabe makko burbe badaade. Laamdo oo ina beydoo badaade galle tan, ina beydoo haaweede no o wa'i yoodde nii. Nde o naati galle noon wonti ko goddum. Suudu ndu o naati fof o wona e mantude. Ndeen be njahii haa be naati suudu bismordu ndu, Aladiin heblannoo mo nduu, o yi'i no ndu sudiraa, o werlii ndaardi makko e dee kaaye dime mbaado-mbaadolinde, ñeñaade haa njoodi, googaade haa poti rip.

Aladiin beydi wi'i mo: "A yi'i no nder oo wa'i nii ko noon kadi boowal ngal wa'i."

Laamdo naji. O booyi e kaan ngonka haa juuti, o yeccitii e jaagorgal makko gootal gonnongal sara makko, o wi'i: "Aan kam ina waawi laataade tawa e njiimaandi am ndii, haa teenti noon e sara hodorde am ina wonnoo doon hodorde yoodnde waynde nii tawa mi anndaa?"

Mawdo jaagorde oo hebbitii wi'i: "Laamdo mawdo mate a yejjitii ko aan rokkunoo Aladiin yamiroore hecci hanjki saanga mutal naange yoo o mah doon, ndeen kay hay huunde daranooki doon. Ko miin e hoore am dañi teddungal habrude on hanjki wonde galle oo wortaama."

Laamdo oo wi'i: "Mi siftorii, kono mi meedaa sikkude galle makko oo maa wa' nii wonde gooto e kaawisaaji aduna, sabu njoodndam. Holii do nji'daa e duunde baaba Aadama ndee hodorde, nde joodorde mum mbaadiraa kaalis gal laabdo e kanje dimo, ina cudiraa kaaye dime, toyfe e belle jalbooje. Alaa fof do ndee hubeere meedi janteede."

Laamdo heddii ina yeeba palanteeje noogaas e nayi dee. Ndeen o limii de, o tawi ko de noogaas e tati. Kaawis mawdo jaggi mo nde o tawi heen falanteere gasaani. Mawdo jaagorde oo wi'i: "Aladiin debata wa'de kono keñinoodo nii, ko duum wadi o hebaani jokkitde falanteere ndee haa wa'a no godde dee nii, kono tan eden mbaawi goondinde, omo jogii kaaye dime ko ina jukkita falanteere ndee, tee maa dum won e haaju makko gadano."

Kaan haala ko caggal Aladiin ka haala, sabu tawi ko o yahi hokkoyde jamirooje. Nde Aladiin arti, Laamdo wi'i: "Bidngel am! Oo galle, ko

galle burɗo haandude e yeebeede e galleeji aduna dii fof, kono gedel gootel ina haawnii e galle oo, sabu heen falanteere gasaani golluede. Mbele wadi noon ko yejjitde walla ko welsindaare? Walla ko gollotoobe bee ngoni be ndaanaani timminde ndii mahdi mbaɗndi faa'iida?"

Aladiin jaabii, wi'i: "Wonaa sababuuji kaaldaa dii fof, kadi nde gasde. Huunde ndee wadira ko anniya. Ko miin wi'be yoo be ngoppir noon njidnoo mi ko tawa ko aan teddinirat mi. Mido yidi mbaɗanaa mi ngaal teddungal ngal yejjittaake."

Laamɗo wi'i: "So tawii ko duum mbaɗirdaa noon d, ko huunde moyɗere. Jooni jooni mi rokka yamiroore dum gollee." O yamiri yoo julaabe burbe heewde kaaye dime e kanjeeji ngar, kam e tafoobe ñeeñdube, haralleebe laamorgo ngoo. Aladiin jippini Laamɗo oo to suudu jaɓɓordu wonndu ko e nduun, o wadattoo Badarul-Buduur hiraande nde hiirtii ndee.

Booyaani Badarul-Buduur yottii. O bismii baaba makko, o holli baaba oo, omo weltii e dewgal makko ngal no feewi. Be ɓadini ñaɓbe belde, ñaamirde gila e le'e, kore e kolfe haa e bedi fof mum ko kanje. Laamɗo oo, ɓiyum, Aladiin e Mawɗo jaagorde oo ndenndi rottoodu. Hoohoobe wodbe bee ñaami e rottoodu dimmuru nduu. Laamɗo oo tawi ñaɓbe dee ina mbeli no feewi etee o meedaa ñaamde ko wa'i nii welde. Ko noon kadi o tawri njaram dam. O ɓuri yeeɓde fof ko kaake kuutoraade dee peewniraa ko kanje e kaaye dime. Dum fof ina yahdi e duɗɗe kolli, liite, coorummbe, buubaaji e taballeeje to boowal.

Ndeen Laamɗo haljitii, o tintinaa wonde yeeyoobe kanjeeji e kaaye dime kam e tafoobe bee jottiima. Laamɗo oo nabbidi e maɓbe, o holli be ko o yidi, o wi'i be: "Njidmi ko ndee falanteere wa'a no deya noogaas e tati nii."

Kambe haralleebe bee e yeeyoobe bee fof, be yeewi golle dee no feewi, be njuurnii, caggal duum be njahi be mbi'i Laamɗo oo: "Min nji'i golle de mbi'daa dee; kono emin nganndin maa, so min ndenndinii ko min njogii koo fof e kaaye kanje e kaalis timmataa." Laamɗo oo wi'i be

njahee, miin mido jogii kala ko njakki, ngaree mi totta on. Ndeen Laamdo oo faatii to galle mum too, renndini kaaye mum fof, feewnoobe yetti heen ko heewi haa teeniti e kanjeeji di Aladiin rokkunoo dum dii. Be mbadi heen kanji fof kono wa'i kono be puddaaki golle dee nii. Be nduttii be bamoyi goddum, be ngoori noon laabi keewdi. Be ngolli lewru be kebaani hay feccere. Be mbadi heen kanje e kaalis e kaaye de Laamdo oo namlinoo to mawdo jaagorde makko, duum kala ronki yottinde feccere golle de o halfini be dee.

Aladiin ne anndi alaa fof feere nde Laamdo wadata haa yottina golle dee. Ko duum wadi, o hadaani be tan jokkude golle dee o haadi doon. Alaa! O yamir yoo be pirtu ko be puddinoo koo, etee be nawtana Laamdo oo kaaye mum e kaaye de namlinoo e mawdo jaagorde dee. Golle de be ngollunoo e nder jonte jeegom pirtaa e nder waktuuji dabbi. Kambe fof be njalti, be ngoppi Aladiin e suudu nduu. Aladiin foodi fitirla kaa, jinne oo feeñi. O wi'i jinne oo: "Ko miin yamirno maa yoo a woppir noon falanteere ndee; jooni noon feewnit nde, madaata nde no deya nii."

Haralleebe, ndeen njahii to Laamdo too; nawtanii dum kaaye mum e kaaye mawdo jaagorde dee, be kaalani Laamdo no be maddi e Aladiin. Laamdo wi'be, mbele Aladiin hokkii be daliilu be mbi'i - alaa. Laamdo wi'i yoo habbane puccu. O habbanaa puccu, o waddii, o raanani to Aladiin, woodi e yimbe ndewi e makko ina njahra koyde. Laamdo yahii haa yottiima e les njabbirde fa'de to suudu jabbordu too; tawi nii o tintinaani Aladiin ngaraangal makko. O tawi Aladiin ina darii e damal ina jabboo mo. Laamdo daccaani mo haa o waawa yaafnaade ko o jabbaki dum no haaniri nii, sabu o tintaani garaa ngal makko.

Laamdo wi'i: "Aladiin, bidngel am, ko miin e hoore am ari naamndaade ma, holi sabaabu ko ada woppira nii nduu suudu wayndu nii yoodde tawa gede mum njoofaani?"

Aladiin jabaani haalde e goonga, sabaabu badde haa waasi timminde golle dee. Aladiin yidnoo ko hollude Laamdo alaa e ngalu ko ina waawa

joofnude falanteere ndee; etee galle mum no wa'noo nii tan waawi galle esi mum oo e denndaangal galleeji laambe aduna oo dii kala.

Aladiin wi'i Laamdo oo: "Goonga nii nji'daa ko suudu jabbordu nduu ina nakki timmude. Jooni mido toro maa nde yeewataa so tawii won ko nakki heen kadi." Laamdo oo tiindii to falanteere too, ndeen o yi'i falanteere ndee nannditii e godde dee, kaawis Alla jaggi mo, o sikki ko o puujiido.

Ndeen o hoolkisii ma o tawi fof ko gootum, etee haralleebe burbe ñeeñdude ndonkanii dee golle e dumunna daɓɓo, Aladiin feewnii dum haa wonti gootum. O darii, o fa'i e Aladiin, o jabɓii dum, o buuccii dum e tiinde hakkunde gite dee didi.

Kan̄ko fof omo haawaa kaawisa mawdo o wi'i: "Haalan am ko ngon daa, aan badoowo gede kaawniide e nder majaango yitere? A alaa nanndo e aduna. Mido beydoo anndude ma tan mido beydoo yeeɓde ma!"

Aladiin hebii mantoore Laamdo e dow yankinaare; o hebbitii wi', "Woni ko mbaaw mi tabitinde tan ko mi yejjittaa moyƴere maa e cemmbingol ngol cemmbindaa mi ngol."

Laamdo faati galle mum no ardunoo nii. Ndeen o yottiima o tawi mawdo jaagorde ina fadi mo. Laamdo habri mo no yahrano eno tawri; kan̄ko mawdo jaagorde oo; o beydii goonɗinde golle Aladiin dee ko mbileewu.

Ndeen Mawdo jaagorde oo yidii siftinde mo haaliino ko wa'i noon, Laamdo tayi konngol makko wi'mo: "Haa jooni a yejjitaani dewgal Badarul-Buduur e biya ngal".

Caggal duum mawdo jaagorde oo faami woppiiri haala kaa noon. Kala subaka mo Alla addi Laamdo oo meedaa waasde yahde e nokku juurnordo ina yuurnoo galle Aladiin oo, ina yeeɓa. Ko duum wonti aada makko ñande kala omo yeeɓa galle oo laabi keewdi. Aladiin ne uddaaki tan e galle mum hee. Yontere kala o yaltat, o naata e nder wuro ngoo. Maa o yahii juuloyde jumaa, hannde o juula e kaa, janngo o juula e ngodka, maa o salminoyii Mawdo jaagorde oo, walla o nodda hoohooɓe Laamdo o wottina dum'en, walla o hirtina dum'en. Nde o yalti fof ne, o

yahdata ko maccube makko dīdo, been cawndoo mo ina caawi kanje ina caaka e yimbe.

Ko duum wadi kala nde o yaltata, yimbe keewtat e laabi dīi, mbaɗa diɗɗe, mbele ina kocca kanje. Hay miskiino gooto yelotaako ɗo galle makko ɗoo, sabu o yamirtu yoo sarwoobe makko moy̋y̋u e joomi mum, oon ne yaha ina jaara karaysiraagal makko. Alaa fof yontere nde Aladiin yahataa raddo, sabu ko o peccudo ñaldi makko dīi fof. Heen sahaaji o radda sara wuro, wada sahaaji o yaha haa o woda wuro. Kala noon ɗo o rewi, o wadat doon moy̋y̋ere, nde ina haalee. Ngaal neddaagal wadi haa yimbe fof ina ndu'anoo mo. Waatoraade mo kay wonti ko huunde aadoraande, sabu Alla e Aladiin wonde kaaraysire, yimbe bee korsini mo haa o burtii Laamdo oo yideede.

Ndeen moy̋y̋ere e kaaraysiraagal, o fawti heen moy̋y̋ude e ngenndi makko. O holliri dum nde fitinaaji mbaɗnoo e diiwanuuji gondi cebbet leydi maɓɓe ndii. Ndeen o nanii Laamdo oo nana tafa konu, ngam ñifoyde fitinaaji dīi, o ñaagii yoo o ardinmo konu nguu. Heɓde mo taltali konu nguu e yaabande jartondinaabe, e foolde dum'en e sarde dum'en fof woni gootum. Ngaal cuusal jayni innde Aladiin e nder leydi ndii no diidorinoo, kono dum fof e wa'de noon bernde makko ndee waylaaki hay dara. O arti omo fooli, etee no o wa'i moy̋y̋ude, no o wa'noo nii. Jooni noon timmii duubi, kitaale e banndi mum'en ko Aladiin wuuri dam ɗoo nguurdam.

E oon sahaa ñenngotoodo Afriknaajo, gondo e dow majjere mum, sabaabu haa Aladiin hebi dīi martabaaji toowɗi, o siftori mo to e Afrik. Kanke fof e yenaneede Aladiin maayii e nder leydi, ɗo o woppunoo mo ɗoo, o woyaa anndude e dow goonga tiimoowo battam-boniijo, o duufti doon e almoor ko wa'i no makatumru soomaandu nii, nde tawnoo ko dum ko o tiimirta. O joodii e fongorde makko, o huufi makatumru nduu, o fonndi ceenal ngal, o toɓɓi tiimngal. O eyɓini heen kaatumeeye.



Ndeen o jiimii e tiimngal ngal tan o tawi Aladiin mo o sikkatnoo maayii e nder ngaska do o woppunoo dum doo, woni ko e nguurndam Aljanna Aduna. O tawi Aladiin wonii galo cemmبولindo, resii bidfo Laamfo, wonii nedfo kormaado, teddinaado. Ndeen ngal ñeeñal jinneeji ngal ñenngotoodo oo wadi ngal, hollii dum bamtaare Aladiin ndee, tan yeeso makko ngoo huɓɓi Alla e cekedele. O wi'i: "Ee bone! Oo baasfo, bidfo ñootoowo humpitiima fitirla kaa! Midfo sikka o suddii ma leppi leydi ndeke o woni ko e neemaade e besnooje golle am e jammaaji am di mbaal mi hinkinaade. Feere maa mi wad haa oo neema waasa duumaade walla nii o halkoo."

Daraaki o fewji feere nde o Ielnata. Subaka law o haɓɓi puccu caasaatu ngonnoo ngu e juggal makko. O fi'i e laawol. Omo wada wuro e wuro, diiwaan e diiwaan. Alaa do darotoo so wonaa so puccu nguu ina fooftoo haa o yottii leydi Siin, o jokki laawol haa o yottii laamorgo esi mum Aladiin ngoo. Ndeen o yottiima, o jippii e bismorde yobeteende (otel), o yetti heen suudu. O woni e suudu nduu kedde ñalawma oo e jamma dewfo heen oo, mbele omo fooftoo, kadi o itta tampere danngal. Ndeen yahii haa weetii, ñenngotoodo oo yidi anndude holi ko yimbe kaalata e Aladiin. O woni e yahndaade e wuro ngoo, haa o ari e nokku do yimbe joom martabaaji mawdi ndenndata ina njara ataaya.

Joodaade mo e siwaneede kaas ataaya woni gootum. O woni e jabde kaas oo, omo jappi noppi nano e ñaamo fof haa o nani yimbe ina kaala haala galle Aladiin oo. Ndeen o gayni yarde ataaya oo, o badii gooto e yeewtatnoobe galle Aladiin bee, mbele o naamnditoo haa o heba ko laabi e hoforde Aladiin ndee.

Oon wi'mo: "lih! Aan hoto ummi daa? Mbaawataa tan ko wonde kodo, tawde haa hannde a yi'aani, tee kadi a nanaani haa ada naamnoo kabaaru galle bidfo Laamfo, hono Aladiin."

Gila nde Aladiin resi bidfo Laamfo wi'etee tan ko Laamfo. O wi'i ñenngotoodo oo: "Mi wi'aani galle makko oo, ko kaawis e nder kaawisaaji aduna dii, alaa mbi'mi ko galle makko oo, ko kaawis burfo

haawnaade e aduna. Tee ne haala hodorde ndee ina haalee e jookli aduna dñi kala. So a yidfi yaa nji'anaa hoore maa oo galle ñuri, mi nani ko ndeen nganndataa so tawii ko mbi'maami koo ina woodi walla woodaani."

Ñenngotoodo oo wi'i: "Njaafu daa mi; miin ko hanke tan ngarmi etee ngummii mi ko to woddi. Ummii mi ko haa too to cebbet Afrik, nde ummotoo mi toon ndee, kabaaru oo yottaaki toon tawo. Nde ngarat mi ndee kadi alaa ko wonnoo haaju am so wonaa yottaade, ko ñum wadi mi humpitaaki hay huunde. Maa mi yah ñaminoyde gite am jooni so Alla newnanii kam laawol fa'de toon."

Mo o naamnii oo, jogii coftal e weltaare sifanaade mo nokku to o rewata haa o yottoo nokku Aladiin oo. Doon e ñoon ñenngotoodo Afriknaajo oo ummii yahi. Ndeen o yottiima, o yeewi galle oo ban yoo ban, o sikkitaaki nii, o yananaa Aladiin alaa fof ko golliri oo galle so wonaa fitirla kaa. O yuurnitaaki baasal Aladiin walla wonde ko ñiddo ñootoowo nii, o anndu tigi ñee golle ko ñe jinneeji tee ne ko maccube fitirla kaa o halfi. Ko ñoon kiram e haasidaagal neema Aladiin njaggi mo no feewi. O ruttii to jippunde makko too, haaju makko fof heddii e yoo o anndu to Aladiin moofti fitirla kaa. O foodi makatumru nduu, o fiyi tiimngal. Nde o gayni tiimngal holliri fitirla kaa woni ko e ñder galle hee. O weltii no feewi haa o ñebi faaytude hoore makko. O wi'i: "Kaa fitirla maa mi hebe ka. Mi huniima Aladiin waawaa hadde mi hebde ka. Maa mi hebtu ka, mi tellina martaba Aladiin haa ño o wonnoo ñoo. Maa mi lesditin mo haa o wa'ta no o tawrunoo nii."

Nde o gayni tiimngal ngal, o humpitii fitirla kaa, o ummii o yahi to deenoowo jippunde oo. O yeewtani, o wi'i: "Mi yahii to nokku Aladiin oo, mi yi'i kaawisaaji e sifaaji jooddi hodorde ndee, kono dey tuuyo hannde gasataa so wonaa mi yi'a joom ndee hodorde haawniinde."

Deenoowo oo wi': "Yi'de joom hodorde ndee hono Aladiin kay tiidaani sabu sahaa e sahaa kala o wadat no o foti yi'reede, kono noon jooni ko jahdo raddo gila ñeya balde tati ñennude, etee raddo ngoo ina duumoo balde jeetati."

Ñenngotoodo oo, ndeen hebii oo kabaaru tan waynii deenoowo oo. O woni e wi'de hoore makko, doo dey ko fartanɗe mawɗo mo mi fotaaɗi woppude faatoo. O tiindii to yeeyirde gollotoodo pitirlaaji ina yeeya. O wi'i mo: "Midɗo sokli pitirlaaji sappo e diidi kire. Ada waawi fewnande mi?"

Jeeyoowo heɓɓitii wi'i: "Won ko ɗakki heen, kono ada waawi muñaade haa janngo, midɗo waawi addande ma kala mo mbela daa."

Ñenngotoodo oo wi'i: "Yoo pitirlaaji dii laaɓ, yoo di daat, maa mi yobe so mi ruttiima jippunde am."

E janngo mum, o arti, o tottaa pitirlaaji dii, o yobi hay o ustikinaaki. O wadi pitirlaaji dii e jige, o wakki, o tiindii galle Aladiin. Ndeen o faandii ma o woni e wullude omo yeeyna: gido Alla jidɗo wostondireede kiidɗi, tottee kesi? Omo wulla omo ɓaditoo, sukaaɓe ina pijatnoo e dingiral, ndeen nanii mo, ndogi pa'i e makko, catii mo ina ngulla ina mbi'a ko o kaangaado, heddii kala dewɗo doon ina seyfitaa mo e dii kaadi. Sikke alaa ko o kaangaado nde omo wostondiree pitirlaaji kesi e kiidɗi. Gulaali, ceyfitaali yimɓe ɓee fof e heewde, ñeenngotoodo oo faalaaka, o jokki e feekaade. "Hol jidɗo wostondireede pitirlaaji kiidɗi e kesi."

O woori noon haa sawtowol makko yottoyii Badarul-Buduur to woni e nder lolli e lolli too. Badarul ronki faamde gulaali dii nde tawnoo ñenngotoodo nani jaggi laawol ne wulla sukaaɓe ina ngoocii mum kam en ne ina ngulla. Badarul neli gooto e horɓe mum yoo yah laabtindoyoo ko dee dille ngonni. Doon e doon kordɗo oo arti ina hekkita jaleede. Sabu Alla e kekkitaali makko dii Badarul e hoore mum ronki jaggude jaleede mum, woni kam ne e jalde.

Badarul heɓɓitii, wi'i: "Eeh puuyɗo haalan am ko njalataa." O jokki e jaleede o wi'i: "Badarul hol baawɗo haɗde hoore mum jalde so yi'i kaangaado liggudo jige baɗɗo pitirlaaji joodɗi, kesi e junngo ina wostondira di e kiidɗi, wonaa kam wi'de ina yeeya?" Didɗe sukaaɓe nana taarii mo ina ngulla, ko ndee dillere nanaten gaay.

E nder kaan haala, kordo goddo wi'i: "Ko faati e pitirlaaji nayeeji mi anndaa so Badarul-Buduur ina wadi heen hakkille, kono won fitirla kiidka woni e boolol hee, jeydo fitirla kaa mettintaa so wostanaama ka kesa. So a yidii aan biddo Laamdo ada waawi yeewndaade so tawii oo kaangaado kaadi mum kebii wostondireede pitirlaaji kiidfi e kesi mum tawa alaa ko faanditii e duum."

Kaan fitirla ka debbo kordo oo haalata, ko kaan fitirla Aladiin hebri martaba mum oo. Ko Aladiin e hoore mum moofti ka toon e oo nokku kidiido duum fof hoto fitirla kaa majjude. Kala nde omo yaha raddo ko noon o wadata. Kono wonaa horbe bee, wonaa moraafe bee, wonaa Badarul-Buduur, hay gooto meedaani wadtude e makka hakkille so o alaa doon. So Aladiin yahaani hay nokku seertataa e fitirla kaa. Eden mbaawi wi'de Aladiin ina reentii kono ngol o taatii ma, sabu omo waawnoo wadde fitirla kaa to nokku suka oo too. Ko goonga! Kono hono dee taatande kebeten tan, ede kebee haa jooni, tee de keboyte ñande kala.

Badarul-Buduur mo anndaa sirru fitirla kaa, yamiri gooto e worbe moraafe bee yoo yettu fitirla kaa wostoyoo dum kesa. Moraado oo dooftii yamiroore.

Ndeen o telliima tan, o sooyinii ñenngotoodo oo, o noddi dum, o holli dum fitirla kaa o wi'i: "Tottu am fitirla kesa mi tottu maa kaa doo."

Ñenngotoodo oo yananaaka kaa ko fitirla Aladiin ka o yiilotoo kaa, sabu genndukoñ galle koñ kala ko hakkunde kanje e kaalis. O heñii tan o biftii fitirla kaa e juude maccudo moraado oo. Ndeen o ñoofii ka haa ka heyi, o bittii ka e nder makko, o haccii haa tiidi, o weedi moraado oo jige makko; o wi'i yoo oon sufo fitirla mbelka dum. Maccudo oo subii fitirla mbelka dum, nawani Badarul-Buduur.

Ebe ngasna wostondirde be ngasnaani tan haa sukaafe be kadi ngoni e wullude ina tooña ñenngotoodo oo, ina mbi'a ko o kaangaado. Ñenngotoodo woppi be ebe luuka no be mbeliraa. Doon e doon o woppi jeeynugol gostondiral pitirlaaji dii, sabu o hebii fitirla ka o

ndaartannoo kaa. Daraaki o wodditii saraaji galle Aladiin oo. Ndeen o deyyii, sukaaፆ woocinoፆ e makko ፆe carondiri, ngoppi mo o yahi. Ndeen o yahii haa o wodditii dingiral gonngal hakkunde galle Aladiin e galle Laamፊo ngal, o seli, o jaggi laawol ngol heewaani koyፊe. Tawnoo o soklaani so wonaa fitirla ka o heፆi kaa, keddiidi ፊii fof wondude e jige oo, o joddini ፊum'en e hakkunde laawol tawi hay gooto yi'aani.

O yetti bolol godngol, o heñii, o yetti yaltirde wuro. O soodi njoobaari hade o yaltude wuro. Ndeen o naatii e ladde, o seli laawol. O joñii e nokku mo hay gooto waawaa yi'de mo, haa o waawa siinude faandaare makko ndee. O jogaaki nimsa e ko o woppi puccu makko ፊo o jippinoo ፊoo, sabu omo sikki tan ko o ፊañi koo e wonde ngalu ina waawi lomtanaade mo puccu nguu.

O woni e oon nokku haa jamma ari, niፆፆere kunuus suddi lew-lewal. Ko ፊoon o foodi fitirla kaa, o woogi ka. E ngoon noddaango jinne oo feeñani mo, wi'i: "Ko njiddaa? Midፊo mi! midፊo heblii ፊooftaade ma, mi wona maccuፊo maa e maccuፊo kala jogiፊo kaa ፊoo fitirla, miin e maccuፆe fitirla kaa ፆe fof."

Ñenngotoፊo oo wi'i: "Njamir maami jooni-jooni ko yoo a ፊuggit galle Aladiin mo aan e maccuፆe fitirla kaa mahi e nder wuro ngoo. 'ፊuggit galle oo no o woori nii, gila ko woni e makko haa e ko waፊi fittaandu, miin e hoore am nawaa min pukkoyaa min nokku nanngam e Afrik." Jinne oo somaani jaabaade nii. E dow ballondiral hakkunde makko e jinneeji godፊi ፊii, ፊoon e ፊoon ፆe yetti galle oo ፆe ndarnoyi ፊum to ñenngotoፊo oo yamirnoo ፆe too.

Ñenngotoፊo heddodiima e galle wondude e Badarul-Buduur. Caggal nde galle oo ፊuggitaa kaawis mawፊo jaggii Laamፊo nde tawnoo Laamፊo woownoo ko so finii ፆabba haa cuurel dow, daroo ina yeeፆa huፆeere Aladiin ndee. 'ፊoon ፊo Laamፊo darii ronki faamde hay huunde; sikkeeji kodii Laamፊo nde tawnoo kaawis diwaani oo waylo-waylo, 'hanፆi ፊo ndee huፆeere darinoo, hannde ko boowal mehal nji'atmi?' Laamፊo heddii ina tokñoo gite ina sikka ko cuddi woni e gite mum ko ፊum haፊi ፊum yi'de galle Aladiin oo. Ndeen ne dey Asamaan oo, weeyo ngoo fof

ina laafi cer, ndoogu ne fooyni, huunde kala ina laafti; duum fof wa'de noon Laamdo hoolaaki ko yi'ata koo. Mijooji keddii ina pal-paltondira: omo etoo faamde ko faamotaako, omo mijoo ko gasataa. O woni e wi'de: "Hol fof no huɓeere fotnde nii mawnude, ndee huɓeere nde o ndaari hay hanke waawirta duggitoraade nii tan? Huɓeere ɗakkitoo yaha hay maale woppaani?"

Hay so hakkille Laamdo sortaaki ne wodaani doon. Tawde Laamdo e hoore mum wadtii jaabaade naamne mum. Laamdo woni e wi'de: "Mi ɗaayaani dey! Ko doo tigi huɓeere Aladiin ndee darinoo; so nde fukkinoonde maa joowe leydi tawe doon; so tawii kadi ko nde mutnde e leydi maa ɗa maale mum."

Laamdo heddii ma e najoore. Laamdo hooti, yamiri yoo mawdo jaagorde oo ar. Doon e doon mawdo jaagorde oo ari. Mawdo jaagorde oo ne Alla e mum heɓaade alaa fof ko teskii e laawol hee saka so yottii ma Laamdo, ɗaɓa ko yottorii, hay reenooɓe damude galle Laamdo bee fof e ɓadaade nokku Aladiin oo alaa fof ko eji.

Ndeen Mawdo jaagorde oo yottiima, wi'i: "Laamdo mido anndii noddandu maa nduu ko haaju tiidɗo, sabu hannde eden njogii jodnde." Laamdo wi'i: "Ko mbi'daa koo, ko goonga! Hollu am to huɓeere Aladiin ndee woni tawo? Mawdo jaagorde gidɗi, wi'i: "Laamdo, mi rewii doon jooni kono ellee huɓeere ndee ina doon. Huɓeere fotnde nii weeɓaani dirtinde."

Laamdo wi'mo, "Yah to cuurel am too ndaaraa. Mawdo jaagorde oo yahi tawi ko no Laamdo tawirnoo nii woori. O arti, o wi'i: "Miin kay mi haalaniino ma gila e fudɗoode wonde ɗum ko golle jinneeji; nde kaal mi, calidaa mbi'daa ko kiram kaaldu mi ɗum."

Laamdo finnii; alaa fof dey ko o goonɗini e ko o yi'i koo. O wi'i: "Hoto oo penoowo! Jamfante! Haa mi soddita leggal daande makko!"

Mawdo jaagorde oo wi'i: "Booyaani ko mbayrondirdon, aɗa waawi nelde e makko naamno ɗaa mo to huɓeere makko woni. Omo foti anndude. Duum ko maslahaa, noddan am harbiyaŋkoobe capande tati ngabboo mo, ngartira mo omo tiraa e callalle."

Ndeen Mawdo jaagorde yahi yottinoyde yamiroore fa'de e harbiyaŋkooɓe bee, been ndartinaani. Ebe njalta wuro haa ɓe kawri e Aladiin ina arta raddo.

Be kawri ko do wodɗaani, mawdo harbiyaŋkooɓe oo wi'i Aladiin, ko Laamdo neli min e maa yoo a ar ina jogii e maa haaju, yoo min ngardu e maa.

Aladiin kam sikkitaaki gargol maɓɓe nde tawnoo ko jam tan dacci. Ndeen yahii haa ɓe paandiima, mawdo soofaaji o wi'mo: "Emin ngondi e sunu mawdo anndinde ma ko min heɓɓe yamiroore yoo min dummbe, min ngaddu maa kaa war hooreejo ngenndi, battam boniijo. Emin cikki tan a jaggirtaa min ko min bonɓe, etee maa daccu min, min mbada golle amen."

Duum juhi Aladiin no feewi, sabu o tinaani koo wadi ko metti walla ko boni. Aladiin wi'i: "Kaalanee kam ko wadi."

Mawdo soofaaji dii e konu mum fof mbi' nganndaa. Aladiin yeewi e konu nguu ko yimɓe mum ɓuri heewde heen, tee o teskii nde o jippii, o wi'ɓe: "Mido mi! Ciinee yamiroore nde njamira don ndee yimɓe makko ɓee ngonnoo ko e wodɗitaade mo." Heddii Aladiin ina wi'a: "Mido waawi yarlitaade mi wadaani hay dara ko boni, wonaa tiindaade e Laamdo, wonaa kadi e Laamu."

Doon e doon, ɓe mberlii e daande makko callalal njamndi, ɓe ndewni ngal e dadorde, juude dee tonngii. Mawdo soofaaji oo arditii soofaaji dii, gooto e konuyaŋkooɓe ɓee jaggi e callalal ngal, Aladiin dowaa ina yahra koyɗe ina rewi e maɓɓe haa yottoyii wuro. Ndeen harbiyaŋkooɓe ɓee naatii wuro ngoo, kala jiinoodo Aladiin ina haɓɓiraa nii jogaaki faayre, sabu ina anndi Aladiin heddortaako nii. Aladiin nde tawnoo ko korsinaado no feewi, ndeen ɓe nji'i no Aladiin dowraa nii, ɓe yetti silameeje e kaɓorde godde e kaaye ɓe ndewi e harbiyaŋkooɓe ɓee. Won e maɓɓe ina njeccitoo, mbaya no yidɓe hadde jamaanu oo rewde heen, kono sahaa fof jamaanu ina beydoo heewde. Harbiyaŋkooɓe ngaanii, kulii nih hade jamaanu oo heɓtude Aladiin e juude mum'en. Peeje e nder peeje haa ɓe njottii galle Laamdo. Aladiin naatii galle, damude uddaama. Aladiin dowaa ma haa e yeeso Laamdo; tawi

Laamdo, mawdo jaagorde, e tafoowo daade oo fof ina njoodii ina pada Aladiin. Tawi Laamdo yamirii no Aladiin yottorii fof yoo baroowo oo tay daande makko, sabu o yidaa hedaade konngol hay gootol ummaade e makko. Tayoowo daade oo nanngi Aladiin itti geyyelal, werti nguru mbodeewu coy yiyyam yimbe waranoobe heen bee, o diccini Aladiin, o wadi dum sira-muumel.

Doon e doon o duufti silaama makko o woni e betde do o fiyata. Silaama kaa ina delka, sabu Alla e makka welde, o woni e fadde haa Laamdo rokka yamiroore tan o soddita daande Aladiin. Doon do be padi yamiroore Laamdo, haa Mawdo jaagorde oo werlii gite mum, yi'i yimbe bee fof ina babitii ina ngari, ebe nabbi e bale, ina puddii naatde e galle hee haa ina keli heen. Hade Laamdo rokkude yamiroore, o wi'i: "Yaa aan Laamdo mido toro maa nde yeewtoto daa ko mbadataa koo no feewi. Galle maa ina waawi heleede e fitina hee. Dum noon hay gooto anndaa musiiba mo dum waawi roondaade."

Laamdo oo hebbitii wi'i: "Miin galle am helee! Hol peeleele cuusdo wadde dum?"

Doon Mawdo jaagorde oo, hebbitii wi'i: "Ko goonga tigi Aladiin haali. Yeccito ndaara bale dee." Ndeen Laamdo yeeyiima yi'i no yimbe bee mba'i jartodinde nii tan, o yamiri tafoowo ko'e oo, yoo o naattin silaama mum, tonngita Aladiin, dacca dum. Laamdo oo yamiri soofaaji mawdi dii, kadi yoo nganndin yimbe bee Aladiin wellitaama. Ndeen oon kabaaru yanii, yimbe bee corondiri, caaki. Yimbe bee ndaani weltaare e danndude fittaandu Aladiin nduu. Ndeen Aladiin woppaama, o ummini hoore, o ndaari Laamdo to woni too e dow galol hubeere. O wi'i e daande yurminiinde: "Laamdo! Mido naagi maa kadi gedel godngel; njid mi ko kaalanaa mi, hol ko mbadmi?"

Laamdo wi'i: "Mbele ada naamnditoo ko mbad daa? nabbu doo mi hollu maa!"

Aladiin nabbidi e Laamdo. Laamdo ina ardii yeccitaaki haa be njottii nokku do darotonoo ina yeeba galle Aladiin doo; Laamdo wi'i: "Jooni



ndaar ban yoo ban y'eewaa so tawii maa yi'i galle maa oo, maa taw kay maa haal do galle oo woni?"

Aladiin ndaari haa juuti yi'aani hay huunde. Hakkille makko jiiɓii. Hakke Alla e oo kaawis, Aladiin ronki dañde konngol ko jaabii Laamɗo. Laamɗo heddii ina ferferta, Alla e mum heppude. O woni e rewde, omo refto: "Hol to galle maa oo woni? Hol to biɗɗo am woni?"

Doon e doon Aladiin yalti e dey'yere, wi'i: "So goonga, galle oo alaa doo; mi waawaa kadi wi'de ma ko doo galle oo woni. Kono huunde nde kumpitii mi ko miin alaa fof ko mbaɗ mi heen."

Laamɗo wi'i: "Miin mi wonndaaka galle maa oo! Ngoy'a am tan ko biɗɗo am oo.

Miin biɗɗo am oo ina burani mi galle maa oo laabi miliyon. Njif mi ko nji'taa mo, so wonaa duum alaa fof yeeso gacce ngo kollataa mi haa mi waasa haɓɓitde daande maa ndee."

Aladiin wi'i: "Ee! Laamɗo cañɗo! Midɗo ñaago maa nde ndokkataa mi lajal e nder balde capande nayi; so tawii ngaal lajal timmii maa mi huufnu aadi, mi adda hoore am haa sara danɗi maa, mbaɗaa mi ko wel maa."

Laamɗo oo wi'i: "Mi jaɓii, mi rokiima balde capande nayi de mbi'daa dee, kono hoto sikku dum firti ko ada dada. Kala do mbaawɗaa naatde e duunde Baaba Aadama hee maa mi yi'te."

Aladiin runtii ina wondi e gacce mawɗe e sunaare lugidnde. O ñippi gite makko leydi, omo taccita galle Laamɗo, omo wonndi e jiiɓru mawndu. Omo yaha, omo wirtoo soofaaji dii, been fof e wonnoode sehilaabe makko, alaa heen fof jeeyiido, moni heen fof heddii ko ina mool-moolna hade makko heptinde dum. Hay gooto hollaani yeeso ina anndi mo. Hoore Aladiin waklitii, o natti anndude ko o yahata, ko o waɗata walla ko o haalata.

Aladiin woni e yiilaade galle yoo galleyel, omo naamndoo mbele yimɓe nji'aani galle makko. Kala mo o hawri kadi ko duum o naamndotoo.

Naamnaali puuyɗi di o naamnotoo dii wadi woni heen njaggiri mo ko o kaangaado, jokkondirnoobe e makko haa heɓi nokku bee sunaare jaggi dum'en.

O woori noon balde tati e wuro ngoo, omo yaha, omo arta alaa ko o ñaami so wonaa ko o sakkaa. Noon o woori omo denngi denngina, nde wonnoo hoodere makko jalbiino e wuro hee no feewi, fittaandu nduu ronkiti muñde nguurndam e sahare ndee. O ullii e ladde. O woppi laabi mawdi, o rewi e lappi, omo seeka ladde, omo wondi e ngaanumma mawdo.

O yahri noon haa o yottii e daande weendu sahnga futuro; ko doon noon yammeende mawnde jaggi mo. Hoto njiiloytoo mi huɓeere am? Hol diiwaan? Hol leydi? Hol fof e nokku e nder Aduna hee to nji'tatmi feccere fittaandu am, hono biɗɗo Laamɗo oo? O wi'i e hoore makko: "Mi fotaani nii tampinde hoore am mette e sunu, potmi ko diwde mi fiyoo e weendu nduu, mi yooloo." Kono nde tawnoo ko o juulɗo teddindo diine mum, o siftorii o juulaani tawo.

O woni e heblaade omo salligoo. Nde tawnoo oon banje e weendu nduu ina wadi fownde heccere, ndeen o fuddiima soodaade juude makko e yeeso ngoo tan, o regi. Omo jogori wi'de e weendu nduu puñcan tan haa o loggi e haayre nde pele didi tooweendi.

Nafi mo tan ko omo wadnoo feggere nde ñenngotoɗo Afriknaajo oo wadannoo mo e fedeendu ndee o naatannoo e nder leydi saanga nde ñenngotoɗo nulatnoo mo yoo o addanoy dum fitirla kaa. Doon tan o woogi feggere ndee e haayre nde o haggi ndee. Doon tan jinne peeñannooɗo mo nde ñenngotoɗo oo joorti e makko leydi ndee o salii weedde dum fitirla kaa feeñani mo.

Jinne wi'i: "Hol ko njid daa? Midɗo mi, ko mi maccuɗo maa. Midɗo doofto maa aan e denndaangal boornii ɓe ndee feggere, miin e maccube feggere ndee kala."

Aladiin, mo damtindaare mawnde jaggunoo, naji sabu Alla e weltaade. O heɓɓitii, o wi'i: "Daɗndu am kadi laawol godngol. Haalan am to huɓeere mahanno daa mi ndee woni walla nii ngartiranaa mi nde jooni-jooni ɗo nde joodinoo ɗoo."

Jinne oo wi'i: "Ko njamirdaa mi koo, mi jeyaaka e jamirooje pot mi siinude. Miin ko mi maccudo feggere ndee tan ada waawi rokkude ndeen yamiroore jinne fitirla kaa."

Aladiin wi'i: "Tawde ko noon, mi yamirii ma yoo a nawam e dow kattande feggere ndee to huɓeere am ndee waawi wonde e aduna hee kala. Naw am toon haa njodɗinaa mi e dow falanteere joom suudu am Badarul-Buduur."

Hade makko joofnude, tawi jinne oo sajjitii maa mo nawii mo Afrik e hakkunde ñaargo wooto puɗi to galle makko oo woni ɗoo. Oon nokku noon ina ɓadii teeru. Jinne oo joyɗini mo e dow falanteere Badarul-Buduur, hono o wi'runoo ɗum nii. Fof ko e hojom gooto. Jamma oo fof e niɓɓidde, Aladiin heɓtinii hoɗorde mum ndee, o heɓtinii cuudi Badarul. Nde yahnoo haa jamma oo fuddii gantinde, Aladiin ɓosi haa heɓi fooɓre lekki ngooti joodii ɗoon. Ko ɗoon ɓernde makko fuddii feerde, o woni e miijaade malu garando oo, tawi alaa ɗo ummii so wonaa e baawɗe. Hakkille makko woni e aɗde e ɗiin miijooji.

Nde tawnoo o joodiima balde jeegom o ɗaanaaki, ko miijooji tan kodii mo, ɓoyaani ɗoygol wi'i mo cas. O ɗaanii e les fooɓre lekki kii.

Ndeen yahii haa weeti, alaa fof ko adii welde Aladiin so wonaa nande cirkaali colli baalnoodi e lekki ki o waalnoo e les mum kii, haa teenji cirkaali colli baaldi e ñaargo puɗi leɗɗe wonngo e hoɗorde makko ngoo. Aladiin woni e yahndaade e saraaji hoɗorde Badarul. O woni e miijaade hol sabaabu boomaare makko ndee. Nde miijo juuti, o faami addi bone ko welsindaare fitirla kaa. Heddi omo ñiŋtoo yeebaare makko. Ko oon subaka dey Badarul-Buduur fini law ko meeda wadde e nguurndam nde tawnoo ko jontaado cejanaado cegeneeki yoo ñaacir mawɓe, walla mbi'aa yaɓɓa daagoo; ko oon woni Badarul-Buduur ɓiɗɗo Laamɗo. Ko Badarul-Buduur kadi wi'etee deey'a golloo.

Ñalawma kala ñenngotoodo oo ina to laawol gootol, ɗum noon ko weli mo, metti mo alaa ko o waawi heen, sabu hakkunde makko e Badarul-Buduur welaani. Alla e Badarul ñaadde e makko, kanke ñenngotoodo oo

o ronkii tan yoo o suus Badarul. Enen fof noon eden nganndi ko hadi hakkunde ñenngotoodo e Badarul welde. So ada rokka bernde, rokku dum ko yidi.

Doon do Badarul-Buduur fini ina boornoo comci mum, haa gooto e horbe makko werlii gite mum e falanteere, sooyinii Aladiin. Ndeen kordo oo yenanaa ma ko Aladiin, o dogi no doole makko potnoo, o haalanoyi Badarul-Buduur.

Badarul, Alla e welo-welo ronki faamde oon kabaaru. Nde tawnoo ko woni ngoy'a so bettii dañat ko sorti e hakkille. Aladiin raanani falanteere yuurnii, haa yi'i feccere fittaandu mum ina annga no gertogal njidngal lelnude nii.

Alla e dille falanteere nde mbelamma woni sabaabu, Aladiin jeertii. Nde o nannoo dillere ndee, o ummini hoore e faayre haa o hawri e yeeso Badarul-Buduur. O weeyni junngo, o yahdini heen mooso, duum yoni salminaago mbelamma yawtu ngo aadi. Badarul yamiri yoo o udditane damal mooltorgal ngal o ara dow. Damal ngal udditaa, Aladiin ñabbi fa'i to hodoorde joom suudu mum Badarul-Buduur.

Hay gooto waawaa jantaade wellamma mo be kebi e yi'tondirde be caggal nde moni e maɓbe fof damtindii yi'de gido mum kedde nguurndam.

Fooyre gidli huɓɓii. Be njaɓɓondirii, be kaayotirii, be piilpiiltondirii, be uurnondirii, be buuccondirii, be ngostondirii kala maale peññinooje gidli hakkunde gido e gido, caggal nde be ceerti ko wonaa maayde. Nde yahnoo haa duum benni Aladiin yetti konngol wi'i: "Hade am yeewtidde e maa hay huunde mido ñaago maa nde kaalantaa mi hoto fitirla nayeewa ka mbaɗnoo mi e booli suudu yeewtirdu hade mi yahde waaño kaa woni?"

Badarul-Buduur heɓɓitii, wi'i: "Mi faayiino tigi ko kanja woni sabaabu boomaare men. Etee ko miin woni sabaabu oo."

Aladiin wi'i: "Wonaa aan! Ko miin ngati mido waawnoo mooftude ka e nokku ceniido. Jooni, ngoppen duum! Ngoye den annude: Hol mo ka woni e juude mum, hol no ka artirta?"

Badarul fillanii mo no bone oo kala ardi haa wostondiri fitirla kaa e fitirla ñenngotoodo oo. Aladiin tay'i haala makko wi'i: "Jooni kay a anndinii kam, tawde ko e Afrik ngonmi. Mo kaaldaa oo, buri neddo fof wonde jamfante. Haalde bonde makko e jamfantaagal makko yontaani tawo. Jooni kay haalan am to o mooftata fitirla kaa."

Badarul wi'i: "Fitirla kaa o wakkoto ka, mido jogii heen daliilu, sabu o gollorii ma fitirla ka e yeeso am, tawi omo rokka mi njeenaari coftinirdi." Aladiin wi'i: "Joom suudu am, njaafu daa mi dey, sabu naamne dee keewi, kono anndu ko de nafaore am nafaore maa."

Badarul wi'i: "Gila naatmi e oo nokku fa'de hannde, ñenngotoodo oo arata doo tan ko ñalawma fof laawol gootol. Alaa ko wadi duum ne so wonaa satteende kollu moo mi ndee, sabu mi hollaani mo yeeso yidde; ko duum dey hadi mo heewde doo koyde. O woniri tan ko yidde egginde gidli am e hoolaare am e maa, haa mi jaba wonde joom suudu makko. O yidata anndinde mi ko mi wantaa yiite e aduna tawata kadi ko baaba am habbitii daande maa ko booyi.

Sahaa fof ne omo wi'a kaa neddo mo yobataa diminna, ko a jamfante sabu ngaluuji maa dii fof ko e makko ngummii, kam e gede godde e ko way noon. Nde tawnoo jaabawol am e makko ko goytaali e sunu tan o booyataa. Mido anndi noon fof ko haa o yeewndoo mi, kadi o beloo mi mbele maa mi yidtu mo. So dum booyi ko gittoowo mi e sago am hay so tawii ko doole makko o wadirta, mido joodtorii dum. Kono aan feccere fittaandu am, garal maa ittanii kam kala denyere walla kulol njoginoo mi."

Aladiin wi'i: "Mido anndi kay wonaa mehre wadi bernde deeyde, kono mi haalan maa no ndadirten e bone oo gaño ko ndee feere: ko maa mi yaha noon nder wuro haa mi arta; ma mi artu hedde naange e hoore. So mi artii ma mi haalane feere njogii mi e no gollirtaa feere ndee haa mbaawen hebde sago men. Hoto haawe noon so a yi'ri kam comcol godngol. Yamir tawa so mi arti mi darotaako to damal moggorgal ngal. Mi yottoto tan mi naata."

Ndeen Aladiin yaltii galle oo, o woni e lemaade banjeeji fof haa o yi'i demoowo gooto ina dawa. Aladiin yabbiti koyde, hebtii demoowo oo, o

wi'i: "Ar ngostondiren comci." Daraaki ɓe mbirnii e sopoyuru. Ndeen ɓe ngostondirii Aladiin tiindi ko sahare. Aladiin sorsorti e laawoñ haa yanti e laawol julaabe coneele e podde. Omo yaha haa o naati e yeeyirde wootere, o naamndii yeeyooɓe ɓee conndi ngootiri. Jeeyoowo oo ndaari Aladiin, miiɗii Aladiin ko baasɗo, sabu comci ɗi o ɓornii ɗii kollata ko waawaa jogaade ngalu coodoowu conndi ndii, sabu conndi ndii ina tiidi.

Aladiin holliti miiɗo mum jeeyoowo oo. Aladiin foodi dannga mum, itti heen kanɗe, wi'i yoo jeeyoowo oo yeey ɗum hakke ko o sokli koo. Jula ɓeti, soomi. O wi'i: "Addu menkelde kanɗe." Aladiin weedi mo. Aladiin daraaki to sahare too, so wonaa nde o soodata koo ñaami. O heñii, o arti to galle Badarul-Buduur. Aladiin yottii naati fa'i to Badarul wi'i: "Hakke maa aɗde ñenngotoɗo oo, mi hoolaaki so tawii maa jaɓ feere ñaagoto maa mi yoo a wad ndee. Mido ñaago maa nde cuudataa ko woni e maa heen sahaaji nii so yidii njaɓaa wadde ko muusat maa haa tan mbaawaa sertude e oo cobɗo haa nji'toyaa baaba maa. Feere ndee nani so a jabii: ɓoorno wutte maa ɓurɗo labeede, so ñenngotoɗo oo arii njaɓɓo ɗaa ɗum no moyyi, tawa noon o jeertotaako, njogodaa jikku kolliroowo, so ɓooyi maa yidtu mo, so on njoodii ma, oɗon njeewta anndinmo, ngon ɗaa ko e etaade yejjitde mi. Ko ɗuum woni daliilu nii aɗa bismoo mo. So ɗum yawtii aɗa yidi meedon hirtodaade, mbele aɗa meeda yarde e konnjameeje leydi maɓɓe ɓurɗe welde. Mido anndi so a haalanirii mo noon o waasataa ndaartoyde deen njarameeje. E oon sahaa yettaa ndii ɗoo conndi mbadaa ɗum e wootere e jardude dee, ɓamdu ɗum e horɓe maa ɓee, so a yamirii ɓe ɓe ngadda. Reento noon no feewi hade maa jiiɓde tinndinooje dee. So on ñaamii haa on kaarii, on njarii haa ɓooyii, njamiraa yoo a addane paalel maa koñnjam. So a hebii paalel ngel tan mbi'aa ñenngotoɗo oo yoo on ngostondir, sabu teentinde welo-welo ngo ngondon mum ngoo, maa yi'i o salotaako, etee o yarat haa laaɓa. So yarii noon haa o gaynii maa yi'i o wona e firlaade e leydi omo haay'o. Kono aan so tawii a yidaa yarde e paalel makko ngel, aɗa waawi yarkinaade tan, o anndataa. Sabu no conndi ndii wa'i heewde nii nde o annditta tawata ko golle ngasii."

Ndeen Aladiin gaynii lelnude peeje kuutorteede haa be ndada e ñenngotoodo oo, be koota to be ngumminoo, Badarul wi'i: "So goonga haalettee ko mbi'daa koo, ko huunde muusnde e am no feewi, kono noon hol no wadetee tawde ko en yidbe seertude e oo gaño compudo!"

Badarul-Buduur jaɓi wadde ko Aladiin yamiri koo. Aladiin nde gayni tinndinooje joginoo, yalti fa'i e saraaji hodorde ndee, ina fadi haa jamma ara nde baditoo damal moggitorgal ngal. Gila nde Badarul-Buduur seerndaa e gidɔ mum mo horsini hono Aladiin, wodɗitina baaba mum, aduna soofti ɗum, Badarul welsindii njoodɗdam mum, hay laaɓal wondaaka kam fof e wonde iwdi Laamɗo. Ñande fof ngañgu makko ina beydoo mawnude kala nde o yi'i ñenngotoodo oo, sabu kadi anndude leepte makko dee ummii ko e kaa fitirla kiidka wostotiraaka e kesa, etee horbe bee kadi keptinii ñenngotoodo oo gila e laawol mum gadanol ngol ari doon ngol.

Badarul naatii taarorde, lootii haa wadti delkude. Horbe bee moori mo moorol ɓurngol yoodde, o ɓoornii comci makko gaaɓɗi, ɓurɗi yahdude e ko o yidfi wadde koo.

Paftol ngol o dadii ngol fof ko kanje e kaaye dime delkooje (jamaa). Jawe makko dee ko jamaa e kaaye dime ñilkooje jahdude e paftol ngol no feewi.

Ndeen Badarul ñaantiima haa yoodi tawi hay dara ñakkaani, o joodii e joodorde makko o fadi ñenngotoodo oo. Ñenngotoodo oo ndeen waktu mum yontii tan o ari.

Ndeen ɓiɗɗo Laamɗo oo sooyi maa mo tan omo naata e yeewtirdu mum nduu, o ummodii e njoodɗdam ɗam fof, o joofanii mo jodnde ɗo o joodotoo, mbele be njoododoo. Ñenngotoodo bompilaa, sabu oo ñilko ñilko ngondo e Badarul, dee gite keelele ɗe oo suka debbo jogii ina ndaara mo, edee kaaye dime jalbooje ɗe oo suka debbo sacci ina siŋkii. Mijooji kodii ñenngotoodo; diin mijooji ko no Badarul jaggirnoo mo, no Badarul gollortonoo mo e hannde no Badarul jaɓɓorii mo, wertani mo yeeso teddugal. Oo waylo-waylo mo ñenngotoodo yi'i e Badarul jaggii ɗum kaawis.

Ñenngotoodo nde tawnoo sikkatnoo haa jooni, kono adan nii, wi'i ne joodo cebbet joodorde, kono nde wonnoo Badarul ko ko fewjannoo mo do o joodii, o faami so o joodaaki doon feewataa ko duum o dooftii, o joodii doon.

Ndeen be njoodiima, Badarul yeewi ñenngotoodo ndaarki kollirooji wonde o natti jogaade e makko ngañgu. Badarul wi'mo: "Hannde maa haawe no mba'mi nii, sabu maa a wi'i mi waylii ma, kono maami haalane: mette e sunu fof ko ko ngeggi e fittaandu am nduu. Jooni alaa ko jidmi so wonaa ko ina walla mi yejjitde ko benni. Mi miijiima ko kaal daa e Aladiin koo etee ne fitina Baaba am oo woppataa mo omo wuuri. Dum noon hay so mi woyii mo kaaddi nguurndam am, bojji am ngartirtaa mo. Tawde mi wadii ko waddinoo hakkunde am e makko haa to añañeere makko, jooni alaa fof ko hadata mi ndaartude ko muñtini mi. Ko duum woni sabaabu waylo waylooji di nji'daa dii. Finnde mum ko mi yamirii horbe am bee yoo keblu hiraande, ko enen kirtodtoo. Miin noon ada anndi njogiimi tan ko koñjam Siin, tawde noon ko e Afrik ngonmi ada waawi ndartude so maa dañan'en e ley'yi koñjam Afrik burdi welde."

Ñenngotoodo oo, nde wonnoo dañi ko ko sikkaano heñii woni e jumpude e nafaore koñjameeje Afrik haa teenti e diiwaan mo o woni oo. O wi'i: "Mido moofti koñjam njaarojam e duubi jeedidi booygol, so a renndinii njameeje dee kala ko koñjam am dam buri welde. So a rokkii kam yamiroore mi dogat mi addoya e majjam butelaaji didi mi arta jooni jooni."

Badarul Buduur wi'mo: "Ina metta mi nulde ma, sinno ko sago am, ko goddo nulatno daa toon."

Ñenngotoodo oo wi'i: "Alaa e sago maa mi yaha, sabu so wonaa miin, hay gooto anndaa to cektirgal ngal woni, fawti heen kadi ko miin gooto anndi sirilu no udditirta baafal faawru nduu."

Badarul-Buduur wi'i: "Tawde ko noon yah, kono hoto leel, sabu no leelir daa fof ko noon kappirat mi yi'de ma, ada anndi mi yidaa yeeweende. Hoto yejjit kadi ko aan tan jaggata yimbe e hiraande."



Ñenngotoodo oo noon Alla e mbellamma yahdu e gartugol fof woni gootum. (Hay so a wadti duleendu!) Nde o runtinoo omo yaha, Badarul sikkitanoo nii wonde o leelataa, dum wadi nde o artata fof tawi gaynii golle mum, yettii conal kal Aladiin addunoo yoo dabrir ñenngotoodo oo, wadii dum e Paalel, o joñi banje.

Be njoodii ñe kuccondiri. O hucciti e Badarul, Badarul hucciti e makko ina wadti hakkille mum to ñaamde iwrata too. Badarul Buduur wi'i: "So a yidii ada waawi yamirde kolli e njimri kono tawde ko miin tan e maa buri welde ko yeewtere."

Ndeen ñenngotoodo nanii nde daande, oo suka debbo, ñenngotoodo dañi heen weltaare mawnde. Ñenngotoodo oo yi'ri dum no teddungal godngal nii.

Be ngoni e ñaamde haa ñooyi, biɗɗo Laamɗo oo naamndii njaram. O yari, o teddiniri ñenngotoodo oo, o wi'i: "A haalii goonga dey ndeke mi feeraa meedde koñjam mbayɗam nii welde."

Ñenngotoodo wi'i: "Laare koñjam ɗam beydiima wadde faayiida e dow ko mantu ɗaa ɗam koo."

Badarul wi'i: "Anne jaggu njaraa e dow teddungal am, maa anndu min ne mi deey'aani."

Ñenngotoodo jaggi paalel leyɗii ngel, wi'i: "Mi weltiima no feewi e ko mooftandaa mi paalel ngel koo e oo ɗoo ñalawma. Miɗo waawi yarlitaade miin e hoore am dey mi meedaani yarde ko wa'i nii welde."

Ko noon ñe ngoniri, ebe ñaama, ebe njara haa timmi laabi ɗiɗi. Doon noon nde tawnoo Badarul wadii gaatuleeje haa hebindii ma ñenngotoodo oo, o wirnii hakkille mum, o yamiri yoo paaloñ mabbe ɗiɗoñ koñ mbaɗe koñjam haa heewa, gooto kala ñe totta dum paalel hono no rokirnoo yamiroore yoo gollire nii. Horbe dooftii yamiroore.

Badarul wi'i: "Miin dey mi anndaa no yidbe ɗiɗo mbaɗata so ina njara, kono to Siin leydi amen, so yidbe ina njarda ngostondirat njaramneeje, gooto kala yara e teddungal godɗo oo."

Ñenngotoodo nde tawnoo ko e sago Badarul yahata, fawaani heen daande.

Doon tan Badarul tebbii paalel ñenngotoodo ngel, o weedii ñenngotoodo oo paalel badngel conndi ngel. Ñenngotoodo beydii weltaade nde tawnoo o yi'ri golle Badarul wadata dee ko teddungal mawngal. Badarul kañum woni e yarkinaade. Ñenngotoodo hono hojom tawi foobtiima paalel musiiba ngel; hay tobbere o heddaani heen. Nde tawnoo nde o yarata ndee koo leyŷitinooɗo, o ronki yoo o artir hoore. Ndeen o woori noon ko juuti, o leyŷitii, o saami, o ajjii, tawi hakkille sortiima, o anndaa ɗo o woni.

Badarul Buduur somaani yamirde yoo Aladiin udditane damal moggitorgal ngal nde tawnoo horbe bee ko feewnitaninoobe ɗum. Ko ɗum wadi ɗoon e ɗoon ngal udditaa. Aladiin naati. Aladiin yi'i ñenngotoodo oo ina lappii, ɗoon Badarul diiri, yaaɓani Aladiin ngam hollirde weltaare mum.

Aladiin wi'i: "Beltagol yontaani tawo, njaafɗo dee! Ngoppon mi e suudu nduu miin tan, mbele mi yeewa no pewjir mi kootol men Siin ko ɓuri yaawde e yaajtaade.

Ndeen ɓe njaltii, Aladiin diirani ñenngotoodo oo ɗo lelii ɗoo. O ɓoorti mo, o tawi fitirla kaa ina soomorii no Badarul wi'runoo mo nii. O yetti ka, o woogi; tan jinne oo feeñi wi'i no woowi wi'de mo nii. Aladiin wi'i jinne oo: "Jidmi ko ɗuggitaa hodorde ndee, jooni jooni nawtaa nde Siin, ñippaa nde to nde darinoo ɗoo.

Jinne oo wirnii, roondii hodorde fukkoyi Siin e nokku ɗo nde darinoo ɗoo fof e majannde yitere. Anndini ɓe hodorde ndee yahii tan ko nde jinne oo ɗuggitta nde ndee dillii e nde o ñippata nde ndee, kadi nde dillii. Aladiin tellii to suudu biɗɗo Laamɗo too, o jaɓɓii mo, o wi'i: "Badarul jooni dey mido felliti maa en keɓ wellamma janngo."

Oon sahaa fof tawi ko Badarul gasnaani hirtaade, Aladiin ko jooni bernde mum sukkitii e ñaamde. O yamiri yoo ñaamde makko nawe to suudu jaɓɓordu ɓurndu yoodde too. Kiraade dee nawa toon gila nii ɗe

memaaka, tawi Aladiin e joom suudu mum njarii koñnjam ñenngotoodo Afriknaajo oo.

Caggal duum, be payti suudu maɓɓe. Haa hannde be njokki e mbelamma hakkunde gido e gido mum.

Laamɗo e miiɗooji. Gila hoɗorde ndee duggitaa yahdi e biɗɗo Laamɗo hono Badarul, yimɓe mbaɗii fof mbele hakkille Laamɗo ina arta, ndonki. Laamɗo kay ko damtindii ɗo maa yi'tu biɗɗo mum. Holaare hakkunde makko e esiiko, hono Aladiin eggii, anndaaka so ina hoɗta. Laamɗo natti ɗaanaade, wonaa jamma wonaa ñalawma; alaa fof ko welata Laamɗo. Ina woownoo won e najooje so sunu jaggii mo haa heɓii nokku joom mum etoo faalkisaade; kono ko Laamɗo koo ko ko beydotoo tan huɓɓude.

Ndeen nde welnoo ndee, ko subaka tan o darotonoo e yeebirde, o yeeɓa hoɗorde Aladiin ndee, kono gila hoɗorde ndee duggitaa, ñalawma fof omo daroo, omo ndaara nokku ɗo nde wonnoo ɗoo laabi keewɗi. Duum ina jeyaa e ko beydi sunu makko, sabu hesɗitintu miiɗooji makko e biɗɗo makko. Sabu waktu fof omo miiɗoo o waasii ɓurɗo tiidde mo e aduna, tee o wontaa yi'tu Badarul.

Ndoogu ina fooyina tan haa Laamɗo oo darii ɗo darotonoo ɗoo, woni e sooynaade nokku ɗo hoɗorde Aladiin ndee darinoo ɗoo. Hawri ko oon jamma e hoore mum hoɗorde ndee artii ɗo nde wonnoo ɗoo.

Laamɗo oo ina wondi e sunaare e mette mum, werlii ndaardi mum no woownoo wadde nii tan ina sikka ko boowal yi'ata, tan haa gite mum pawii e galle Aladiin. Ndeen o yi'i hoɗorde ndee, o sikki ko ɓurtungal ɓuuɓol huurii ɗoon. O yeewtindii kadi no feewi, o tawi sikke alaa ɗum ko hoɗorde Aladiin ndee tigi arti ɗo wonnoo. Ko ɗoon dey mbelamma e jam lomtii sunu e mette. O heñii, o fa'i suudu makko, o yamiri yoo o haɓɓane puccu makko. O addana puccu, o waddii, o hartii puccu, omo sikka o jogoraani yottaade nokku Aladiin oo.

Nde tawnoo Aladiin ina miijinoo ko wa'i nii ina waawi aroyde; Aladiin finii gila subaka law boornii comci mum jooddi, heboyi suudu bismordu too joodii. O woni toon haa o sooyinii Laamdo ina ara, o yaaccii, o tellii, o jaabboyii esiiko; o walli dum jippaade.

Laamdo wi'i: "Aladiin! Mi waawaa wi'de ma tawo hay dara so wonaa mi jaabi biddo am oo. Aladiin nawi Laamdo to suudu Badarul Buduur. Tawi Aladiin haalaniino joom suudu mum wonde be ngarti e leydi mabbe, yoo o naanto.

Laamdo buuccii yeeso biddo mum laabi keewdi, gite keddi noon ina mbala gondi weltaare.

Biddo oo ne holli mo kala maale gilli mbelamma hakkunde biddo e jinnaado mo damtindinoo. Laamdo oo ronki hay haalde, sabu no bernde mum wa'i heccidde nii, nde wonno tawi ko o woyii biddo oo bojjii maaydo. Biddo oo ne ko noon wa'i e mum.

Laamdo wi'i: "Biddo am, mido sikki tan ko mbelamma ko nji'daami koo wadmaa wayde no a meedaa sunaade nii. Mido anndi noon a suninooma no feewi. Nawiraado no nawiradon e oo galle nii, waawaa waasde wondude e ngoya. Njiddi noon ko mbele ada reftanoo mi ko jolnoo koo fof e yolde ko en nji'ondiraani koo, tawa noon a suudaani hay huunde."

Badarul-Buduur wi'i: "So a yi'i mi waylaaki no feewi, wadi noon ko ko puuddii mi foofde tuggude hanke fa'de hannde koo, ko nji'tumi joom galle am, feccere e fittaandu am, ko oon woni gittu do mi e dee geyyelle. Ko njabbi moo mi, buucci moo mi koo, ko duum anndani mi wa'tude nii. Wonnoo mette am fof ko ko dakkita sara maa aan e joom galle am koo. Kulol kadi beydii ko mawnude e Aladiin, sabu mido anndi alaa fof ko o wadi e ko hebi min koo. Tee mido hulnoo hade fitina maa mawnude burto maa doole mbi'aa maa coddita legal daande makko, tawa noon o wonaa sabaabu jahgol amen. Mi haalanmaa ko faati e cefagol amen, Aladiin alaa fof ko wadi heen. Hoore cefagol amen e laaci mum fof ko miin e hoore am."

Badarul–Buduur fillanii baaba mum, gila do ñenngotoodo oo rewnoo haa wostotiri e mum fitirlaaji, haa no be puuntiri mo, haa no be mbardi mo. O wi'i: "Ko heddii koo mi daldii Aladiin yoo siimtane."

Aladiin ne haali no wadnoo kañum ne haa dañi sago mum e ñenngotoodo oo.

O ñaagii Laamdo oo so ina waawi yoo ñabbu to bismordu too, o holla dum do buur ñenngotoodo oo fi'tiri dum. Ndeen Laamdo oo ñabbii haa yi'i no posone oo wardi ñenngotoodo oo, o jabii Aladiin, o foodi Aladiin e makko, o buuccii dum, o wi'i: "Maa njaafu daa mi dey ko fitina e gilli biiddu deenoo wadnude mi koo. Ko fitina tan wadnoo noon. Tiidno daccan am hakke."

Aladiin wi'i: "Miin kay alaa fof woytoraandu ndu njogiimi e maa, ko ari e am kala ko oo kudaado mo Alla hufi addi e am. So a dañoyii mudda juutdu maa mi haalane sifaa goddu burdu bonde mo o wadnoomi, ko Alla e moyfere mum tan dadndunoo mi."

Laamdo wi'i: "Jooni kay kaadnen doon oo tanaa, ndaarten no mbeltori den."

Aladiin yamiri yoo banndu ñenngotoodo oo werloye, mbele ndiwri e kulloñ ina ñaama haa mbeltoo. Laamdo yamiri yoo kabirde mbeltinirdi fittaandu ko wa'ino: kolli, bawdi, moolooji, liite, billille, haa e ko nanndi heen, yoo ngadde. Laamdo hokki yamiroore wonde balde sappo yoo wuro ngoo won e neema, weltodoo e makko, sabu gartugol Badarul–Buduur e Aladiin. Ko nii kadi dey Aladiin dafiri laawol godngol e musiiba jogornoodo warde dum. Kono dey gasaani, sabu wonaa oon kadi woni wadtaan. O jamfaama laawol tatafol ko e ngool payden jooni.

Ñenngotoodo oo ina dacci miñiraado moolanaado moole, maa mbi'aa nii ko kanke buri mawniraado oo yoorde bernde; etee omo jogitii gede kulbiniide.

Kambe dido be keewaani wondude: oo heedata ko fudnaange, oya wonaa hirnaange. Hitaande so dartiima ko ndeen gooto e mabbe fof

wadata tiimngal mum, ndarta goddo oo yeewa so ina e jam walla so won tiidalla jogii noddudo ballal goddo oo.

Ndeen woni hitaande, sahaa oo heedi, ñenngotoodo yetti makatumru mum ndu tiimirta nduu, tiimi. Nduun makatumru kala do o yahata ko o cinndiido ndu no mawniraado oo wadata nii. O fonndi ceenal haa foti, o tobbi. O yaltini Naasara e Aamara, o yaltini Baddana kay e Segel, Gabari Waagaf wondude Gabari Kiis. O faati Saamara, o leyfii butel e arsiikan kiis. Tareet e daamara kaalaani hay dara. Seyfara e labiyal nootaaki. Nde yahnoo haa booyi, segelaaji didi njalti les. O yi'i ndiyam e nibbere, o anndi mawniraado oo ko jarnaado posone tee ne maayii. O anndi mawniraado waraa ko leydi Siin, o anndi nokku do o waraa doo, o anndi kadi ko e laamorgo leydi ndii, o anndi bardo oo ne ko esi mum Laamdo oo.

Ndeen miñiraado ñenngotoodo anndii gede dee fof, o haftii, o wi'i: "Jooni kay joodnde alaa, sabu nimsa e sunu tan ngartirtaa maaydo. Jooni heddii tan ko yoftonoyaade mo." Doon tan, o waddii puccu makko, o fawii e laawol omo tiindii Siin. Omo tay'a nade, omo juuwa e beeli, omo seeka laddeji, omo tacca jeereede haa o yottii leydi Siin. O yottodii e tampere mawnde. Daraaki o yottii laamorgo ngoo, o heftini tigi ko doo tiimngal makko sifinoo. O jippii, o nanngi jippordu. E nder gisaane oo noon ko miin binndudo oo beydi heen gede keewde mbele daarol ngol ina beydoo jirwude.

Ndeen yahii haa weetii, o naati e wuro ngoo. Wuro ngoo noon o naatiraani e maggo wonde wuro ngoo ina yoodi alaa njoodndam wuro ngoo safaani mo. Haaju makko ko ndaartude kabaruuji haa o waawa timminde anniya ummindoo mo oo.

O naatii noon e nokkuuji keewdi areede, do jamaanu heewi renndude. O naatii e nokku gooto, doon ko pijirlooji tan. Bee ina pija, be ina joodii ina caakta kabaruuji, bee ina ciifta joljole jamanuuji e kaawisaaji. Kanke miñiraado ñenngotoodo oo noon ko jappudo nofru tan omo hedoo. Ko

doon ne o nani yimbe bee ina njeewta bure, soknaagal e kaawniide debbo bi'eteedo Faatim. Oon Faatim noon ko maaydo, ko golle mum tan ngoni e yeewteede. Kanke ne nde o nani dum o fadanii haa o laaftindoo, o sikki oon Faatim mo be kaalata maa waaw jiiɓtude ko o ndaartata koo. Ko duum wadi o noddi gooto e mabbe, o ñaagii yoo oon haalan mo sifaa keeriido, hol ko oon debbo woni e hol kaawisaaji di o wadata.

Mo o deeyi omo naamndoo dum oo wi'i: "lih jam! A yi'aani oon debbo tawo? Kadi a nanaani mo? Wuro ngoo fof ina yeeɓaa mo, sabu dewal makko Alla, koorkaaji makko, duudagol makko e wonde mo yeru moyfo. So wonaa Altine e Aljumaa o yaltataa, koo guufniido tan do gootel. Ñaldi di o yaltata dii ne, kala nde o yalti, omo wada golle moyfe de limtotaako. Alaa fof ne mo hoore mum muusata, mocca dum ronka yoo sellu."

O fadaani nii haa oon gayni daarande mo gede Faatim, o wi'i: "Hol to Faatim oo tawetee e leede wuro ngoo?" Oon sifanii mo. Ko e diin kabaruuji di o hebi o tuugnii haa o lelɓi feere makko bonnde bonnoore nde njogorden haalde ndee.

Ndeen o faamii no debbo oo siforii, o ruttii e nokku mo kaalno den oo, yimbe ina njoodii oon sahaa ina njara ataaya, nde tawno ko waktu nguleeki, won heen ina burannoo dum waalde e oo nokku, sabu buuɓol mum. Caggal nde o yobi joom nokku do o jippinoo doo; o dacci haa jamma; o tiindii to Faatim kormaado ko ndeen innde debbo oo anndiraa e nder wuro ngoo. Nde o yottii, o hebaani caɗeele udditde damal suudu Faatim kormaado. Ñenngotoodo naati, uddiri damal seese. Ndeen o naati o sooyɓii e nder lewlewal Faatim ina lelii e dow diwre wertaande limcel daago, o baarii e cuurel hee. O battii debbo oo, o duufti labi ki o sinndunoo, o finndini mo.

Ndeen Faatim muɓɓitii gite, goram kaawis mawdo jaggi dum e yi'de gorko ina jiimi e mum ina tami labi ina ndaarta warde dum.

Doon tan ñenngotoodo oo ɓami laɓi kii fawi ɗum e ɓernde Faatim. O wi'i: "So a wullii walla a yusiima tan mi adoo Alla e balde maa. Ummo dow! Tee mbadaa kala ko njamir maa mi."

Faatim leldinoo ko e comci mum, ummii ina gergerta kulol. Ñenngotoodo oo wi'i: "Njidmi tan ko ngostondiren comci, tottaa mi wutte maa, yettaa mo am."

Be ngostondiri boornanteeri. Ndeen ɓe ngostotirii haa gasi, o wi'i Faatim: "Njidmi jooni ko ngoobanaa mi yeeso am ngoo e mba'di maa, tawa noon selaani selmbaani."

Ko o haaldata e Faatim koo fof, Faatim ina gergerta kulol. O wi'i: "Hoto hul, mi woondirii e Joomiraado mi warataa ma."

Faatim naatni mo e nder cuurel mum. Yetti ndiyam ngoobojam e genndukel gootel e goobirgal o moomi e yeeso ngoo haa hawri, o wi'i: "Jooni kay yeeso ngoo fof hawri tee firtotaako, jooni kay en nanndii, alaa fof ko seerndi en."

Faatim ina jogino moori yoos ɗi fawatnoo e hoore mum, itti fawi ɗum e hoore ñenngotoodo oo, o yetti kaala o kaalotonoo, o feewnani mo, o holli mo no wadirtee.

Ndeen ɗum timmii o totti mo kurus keɓoowo e koppi, o wadi sawru balammaaru ndu o jogotonoo nduu e junngo makko; o huccitini mo e daarorgal. Faatim wi'mo: "Ndaar, nanndugol waawaa burde doo."

Ñenngotoodo o tawi wa'ii no yidirnoo nii. Kono o huuɓnanaani Faatim aadi. Hade yiiyam deelaade wada batte, o deddu Faatim haa buubi. O daasi Faatim haa o heɓni ɗum mbalka nokku uufnirɗo o werlii ɗum heen. O waali omo jogii mbaydi makko ndi o wostondiri e Faatim ndii. Ndeen yahii haa weeti, kanke fof e anndude wonaa ñalawma jaltugol Faatim, o yalti ko saanga waktu gadano walla ɗiɗaɓo, nde tawnoo omo anndi yimɓe ɓee naamndotaako tee ne so naamndiima omo jogii ko o jaabii ɗum'en. Nde wonnoo anniya makko mo o joginoo ko wadde Aladiin gede bonde kulɓiniide ko ɗuum wadi o adii ko maantaade ko to hodorde Aladiin heedti. Nde o yalti, o jaggi laawol, o tiindii toon.



Ndeen yimbe bee cooyiima omo yaha, ndogi kucci e makko ina njoodtorii ko Faatim. Nde yimbe bee njottii taartii mo, bee heen ngoni e ñaagaade duwaaw makko, hono ngoownoo waddude e Faatim nii, bee ina buuccoo juude makko, wodbe burbe reentaade bee ngoni e buuccaade cebe wutte makko, bee ina ñaagoo yoo moccan dum'en ko'e mum'en, walla o faddina dum'en e muusu ko'e.

Kanko ne heddii omo wada no yimbe bee nganndirtaa wonaa Faatim mo be cikkata oo wondi e maɓbe. O yahri noon haa o yottoyii to hodorde Aladiin too. Yimbe ko ina toba tan, moni fof ne heñoo mbele ina yattoo mo. Joom en semmbe bee nana ceekira jamaanu oo doole mum'en ina njuuwa ina pa'i e makko. Dille dee keewii haa yottoyii ma Badarul-Buduur to lelinoo e suudu mum bismordu. Ndeen biɗɗo Laamɗo oo naamnii ma dillere ndee ko woni, gooto e horbe makko bee tawi humpitiima wi'i: "Dum ko Faatim kormaado!" Moni fof ina yidi idaade e makko, mbele omo moccana dum hoore mum mbele ina sella. Doon tan yidde jokkondirde mo e oo debbo jaggi Badarul nde wonnoo o booyi nande Faatim kormaado kabaruuji mum e moyƴere mum.

Ndeen mawɗo moraabe oo faamii duum e yeeso biɗɗo Laamɗo oo, o wi'i: "So tawii tan yidde maa e oo debbo ina yottimaa nokku, amin mbaawi addande ma Faatim kormaado haa ɗoo e dow yamiroore maa." Badarul jaɓi wi'i yoo moraabe nayo njah ngaddoya mo. Ndeen yimbe bee nji' moraabe bee ina njalta e galle Aladiin hee ina tiindii e jamaanu oo; moni e maɓbe fof woni e dogde, be carondiri. Ko doon ñenngotoodo beydii heñaade ina tiindii e maɓbe; nde tawnoo ko dum maale kollirooje feere makko woni ko laawol peewal, o etii suudde mbelamma oo. Ñenngotoodo fuddiima daminaade jamfa mum woni ko e feewde.

Ndeen moraabe bee njottiima, gooto e maɓbe wi'i: "Debbo kormaado! Biɗɗo Laamɗo oo ina yidi yi'de ma. Ar rew e amen!"

Doon tan ñenngotoodo oo wi'i: "Dum koy ko teddugal mawgal! Mi ɗooftiima. Mi jaɓii ko o ñaagii kam koo."

Nde o naati suudu bismordu nduu, o yi'i Badarul; o woni e duwaade. O woni e ñaaganaade dum cellal, kisal, ɓamtaare e kumtagol denndaangal

haajuuji. O wadi feere fof haa o hey'ni e hakkille bi'ddo Laamdo oo wonde ko o kuldo Alla, o boornii wutte ji'aado Alla diggudo.

Badarul-Buduur nde tawnoo joomiraado oo tagi dum tan ko moy'yo ko duum saabi o jogotaako sikkitaare e hay gooto. Badarul sikkata no wa'i nii ko noon moni fof wa'i, o sikkata bi'do rewata ko Alla fof ko goondudo; duum ina jeyaa e ko beydi jaawgol makko goondingol makko ñenngotoodo oo. Ndeen oo Faatim mo wonaa Faatim haljitii haalde. Badarul wi'i: "Neenoy am, a jaaraama e dii duwawuuji moy'yi. Mido jogii hoolaare maa Geno jaban en ko ñaagi den koo. Bado mi doo. Joodo sara am."

Ñenngotoodo oo joodii e wondude e yankinaare mawnde.

Badarul-Buduur wi'i: "Mido ñaagi maa gedel gootel tiidno woto salano mi. Njidmi tan ko ngondaa e am, mbele ada haalana mi no nguurdu daa mbele mido yetta e yeruuji maa moy'yi dii haa mi rewra dum Alla."

Ñenngotoodo oo jaabii wi'i: "Mido ñaago maa yoo a tiidno mbaasaa ñaagaade mi huunde nde mi waawoytaa, so wonaa mi welsindi dewal am Alla."

Badarul-Buduur wi'i: "Duum kay hoto wonane cadeele, mido jogii cuudi keewdi di kodaaka. Ada waawi subaade heen suudu welndu ma fof cuudodaa heen tawa ada waawa rewde e mayru Alla no njidirdaa."

Ñenngotoodo mo hay huunde addaani dum so wonaa boomde Aladiin e joom suudu, somaani juutnude ngantu, kanke fof e nanndude e neddo moy'yo, keewdo gacce. O jabi ko Badarul ñaagii mo koo. Alaa fof ko burnoo tiidde mo, so wonaa yo o naat e cuudi hee haa o waawa wadde ajaande makko.

Badarul - Buduur wi'i: "Ummo, rew e am mi holloy maa cuudi dii."

O tawi kañji fof ko di laabdi, bertaadi haa peewi. O subii heen wooturu burndu hakindaade e njoodndam, hay mbertateeje ndu heewaani. O wi'i: "Nduu yonii kam, hay kayru nii e ndu yoodiri mi haa diwti."

Badarul - Buduur yidi hoddu e oo jamfante kudaado, mbele o bismoo mo to suudu bismordu too be kirtodoo, kono ñenngotoodo oo salii; sabu omo anndi so o yahii toon be nganndat o wonaa Faatim kormaado. Faatim wi'i Badarul: "Miin ñaamatmi tan ko mburu e biibe ledde jonde."

Omo ñaago tan yoo Badarul daccu mo tan o hirtoo to suudu makko too. Badarul jaɓi wi'i: "Neenoy am, wadiri no welir maa, kono so a haljitii hirtaade hoto yejjit mido fad maa."

Ndeen ɓe ngaynii Faatim ari.

Badarul wi'i mo: "Mido weltii e ngaraangal maa doo. So duum yawti mido daminii maa wadan am du'aawu yoo barke heddo e hodoorde am ndee. Hade am noon naatnude ma e hodoorde ndee, cuurel yoo cuurel mido yidi miiɗo maa e hodoorde ndee."

Ndeen Badarul haalii ko haali koo, oo gastaado e mba'di Seydaane, ba'do no keewdo gacce tawa alaa fof ko wondi so wonaa seydanaagal e njoor ɓeram, ummini hoore wi'i: "Wooro, nduu bismordu wondi fof ko yoodde haa wonti kaawis. Kono noon miin fof e wonde luurdaado, sabu am waasde yi'rude no aduna oo fof yi'rata njoodndam nii, ko gedel gootel ɗakki mi e hodoorde mon ndee."

Badarul-Buduur wi'mo: "Holi ngeel gedel? Tiidno halan am ngel. Mi nanii tee mi goondinii wonde hay batte ɗakkaani e hodoorde ndee, kono aan tawde a yi'i ko ɗakki, haalan am mi ñawnda dum jooni jooni."

Ñenngotoodo oo wi'i: "Maa njaafɗo daa dey, miiɗo am ngoo so woodi wadde nafoore ko wi'de tan sinno wofoonde laamu cofal weeltinaama e doosgal gonngal hakkunde mbildi ndii. Hodoorde ndee dañataa nanndo e njookli naye aduna dii fof. Hodoorde ndee maa wadatno kaawis ɓurɗo mawnude e nder duunde baaba Aadama ndee."

Badarul wi'i: "Hol ndiwri mbi'eteendi laamu cofal? Holi no wofoonde mayri heɓortoo?"

Ñenngotoodo oo wi'i: "Ko ndiwri moolanaa ndi moolee, kodoori to ceɓtam cereeli haayre wi'eteende Kookaas. Pewjando on lelngo hodoorde ndee ina waawi dañande on wofoonde wootere."

Badarul-Buduur heddi ina yetta Faatim gastaado e yi'ande mum ndee. Yeewtere jokki e fannuuji godɗi, kono haala wofoonde ndee nana wada yah- ngartaa e hakkille Badarul. Jooni ko haa Aladiin arta raddo tan nde o yottina dum kaa haala. Wonii jooni balde jeegom ko Aladiin yahi artaani tawo.

Ñenngotoodo oo ne humpaaka dum, kono yidi ko humtude haaju oo gila Aladiin artaani. Doon do Ñenngotoodo oo waynotoo Badarul ina faati suudu mum ina leloyoo haa Aladiin saami e dow maɓɓe.

Ndeen Aladiin yottiima, o naatoyi to suudu Badarul; o salmini mo, o jaɓɓii mo, o uurnii mo, o buuccii mo. Duum fof noon joom suudu banndu mum fistaani (softaani).

Aladiin jeertii, wi'i: "Laare am! Aan dey wonaa nii mbayatno daa! Haalan am ko mettu maa? Mi woondirii Alla! Hoto suudam hay huunde kala no doole am potiri maa mi wad haa mbelto daa. Anne laare, hoto wadam noon! Njidmi ko mbelto daa."

Badarul wi'i: "Ko dum huunde nde alaa yiya! Mi sikkaano adum feeña e am, tawde ko noon hay batte mi suudataa ma; cikkatnoo mi ko galle men oo alaa nanndo kadi maa neddo fof naat ndaara haa tampa tawa yaltinaani heen ella, sabu galle oo yoodde e timmude. Kono hedo mi hollitmaa miijo am ngoo yeewaa. A sikkaani so wofoonde laamu cofal weeltinaama dow e hakkunde doosgal mbildi ngal alaa fof hanjkaadi ko njakkata e hodorde ndee?"

Aladiin wi'i: "So a tawii e hodorde ndee ella tan mi tawat heen ella! Dum ko bolle puuyde! Maa yi'i no cafrir tumi ndee ñawannde haa sella, tee ko ko buri yaawde ne. Maa beydo faamde kadi ko yidde maa woni yidde am! Kala ko woni muuyo maa yoo taw ko jam!"

Doon tan Aladiin seerti e Badarul; o njabboyii dow to suudu maɓɓe bismordu too. O yetti fitirla kaa nde tawnoo gila o dadi e boomaare ndee, o nattii welsindaade fitirla kaa. O woogi fitirla kaa, jinne oo feeñi.

Aladiin wi'i jinne oo: "Hodorde ndee ina njakki wofoonde laamu cofal. Ko duum tan njakki, mido yamir maa, yoo a wad feere kala haa oon ayiiba iwa."

Ko adii nde Aladiin ina joofna konngol, jinne oo siiki. Alla e siikaango ngoo heewde doole, bismordu nduu yerbi, Aladiin woni siññude ina ger-gerta, ina daal-daalna.

Jinne oo wi'i: "Ko mbi'daa koo? Aan jeliido oo!"

Jinne oo feekorii noon e daande nde nganndu daa ina siññina gorko jaambaro. O wi'i: "Miin e wonndiibe am bee ko min mbaɗan maa koo fof yonaani ma, haa aɗa yoba min ndii njoɗdi mbonndi. Waasde ma yobde diminna yottiima haa ko aɗa ñaagoo mi yoo mi addane Kaliifa am haa ko mido weeltina dum e hakkunde doosgal mbildi? Ngaal bonnedaagal haani ko aan e joom suudu maa e hoɗorde ndee kala ndooytine don haa ngonton ndoondi.

Kono, a malaama sabu a wadaani heen hay huunde; kadi ñaagunde ndee wonaa e maa adii ummoraande. Anndu Aladiin ndee feere ummorii ko e miñi mum ñenngotoodo Afriknaajo oo, gaño maa mo mbardaa warngo ngo haandi. Omo doo e galle maa hee! O suudii ko e mbaydi Faatim kormaado, caggal nde o wari dum! Ko kanke holliti joom suudu maa ndee feere, haa joom suudu maa duuñmaa e ñaagaade ndee ñaagunde roondiinde kataa. Faandaare makko tan ko warde ma mbele o yoftonoo mawniiko mo mbardaa oo. Jooni, ko aan reentotoo."

Ndeen jinne oo gaynii haalde, majji.

Aladiin ne nanii haala jinne oo e wasiyaaji mum. O naniino haala Faatim kormaado ina haalee, o majjaani kadi no o dowliri e moccugol ko'e.

Aladiin ruttii to suudu Badarul-Buduur, haalanaani hay gooto ko jolti hakkunde mum e jinne oo koo. O joodii, o fawi juude e hoore, o wi'i omo wonndi e hoore heloore. Badarul biɗɗo Laamɗo oo nuli yoo Faatim kormaado adde mbele mocca joom galle mum. Nde yahnoo haa nulaado oo ruɗtii, Badarul woni e fillanaade Aladiin sabaabu gargol Faatim e galle hee.

Faatim yottiima.

Aladiin wi'i: "Neenooy am! Miin dey mi weltii ma e garaangal maa e galle hee; muuso hoore ina fiyi mi doo, mido ñaago maa yoo a moccu am; mido joortii ne a gantotaako, maa a wadan am no mbaɗirantaa wofbe bee nii."

Aladiin turi hoore. Faatim fa'i e makko tawi junngo mum ina fawii e banje wuttulo do njuulaawi kii mooftii e wutte mum doo. Faatim anniya mum wonaa moccude muusalla Aladiin; alaa ko warde dum. Aladiin ne

nde tawnoo lonnginaa ma gede Faatim, woni e sunnaade. Nde Faatim naatani heblaade golle, Aladiin sajjitii junngo makko hade makko memde njuulaawi kii, yeryi njuulaawi kii e makko, o bekkiti bernde ndee, o werlii mo. Faatim gostaado seerti e wonki e dow Alluwal leggal. Badarul wulli, wi'i: "Eh! Joom galle am, feccere fittaandu am! Holi bone ko mbaɗɗaa? A warii Faatim kormaado!"

Aladiin, dillaani, daalaani, wi'i: "Joom suudu am, gido am! Mi waraani Faatim Kormaado, ittu mi fittaandu mum ko jamfante karmudo jogornoodo warde mi so mi tintaano."

O wi'i: "Oo gorko mo nji'daa ko bonɗo mo Alla bonni."

O ñoorti comci ñenngotoodo oo, o wi'i: "Ko oo wari Faatim Kormaado, heɓti comci Faatim, siŋkii e mba'di Faatim. Duum fof mbele ina waakoo mi. Oo mo nji'daa, ko miñi mum ñenngotoodo Afriknaajo dahnoodo on oo."

Caggal duum, Aladiin haalani joom suudu mum Badarul no Jinne oo habriri dum gede dee kala. Nde o gayni yeewtude, o itti neewngu. Ko nii kadi Aladiin daɗiri e boneeji bee ñenngotoobe, oo mawniraado e oo miñiraado.

Duubi seeda pawtii heen Laamɗo oo hono Baaba mum Badarul-Buduur, maayi tawi naywii okos. O maayii, o ɗaccaani dono gorko, ko duum waɗi Badarul ronti laamu, oon ne waɗti jappeere ndee e juude joom galle mum, hono Aladiin. Kambe ne ɓe nguurii duubi e banndi mum, ndeen ɓe maayii. Be ngoppi ɓesngu mbarkinngu ngu yonta gardo fof siimtata bure mum.



